

陈拾遗集

陈子昂

文硕阁

wenshuoge.com

目录

关于我们	3
提要	5
原序	6
卷一	7
卷二	15
卷三	24
卷四	31
卷五	38
卷六	45
卷七	53
卷八	65
卷九	75
卷十	83
附录	86

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

【臣】等谨案陈拾遗集十卷唐陈子昂撰子昂事蹟具唐书本传及卢藏用所为别传唐初文章不脱陈隋旧习子昂始奋发自为追古作者韩愈诗云国朝盛文章子昂始高蹈柳宗元亦谓张说工着述张九龄善比兴兼备者子昂而已马端临文献通考乃谓子昂惟诗语高妙其他文则不脱偶俚卑弱之体韩柳之论不专称其诗皆所未喻今观其集惟诸表序犹沿排俚之习若论事书疏之类实疏朴近古韩柳之论未为非也子昂尝上书武后请兴明堂太学宋祁新唐书传赞以为荐圭璧於房闼以脂泽污漫之其文今载集中王士禛香祖笔记又举其大周受命颂四章进表一篇请追上太原王帝号表一篇以为视剧秦美新殆又过之其下笔时不复知世有节义廉耻事今亦载集中然则是集之传特以词采见珍譬诸荡姬佚女以色艺冠一世而不可以礼法绳之者也此本传写多讹脱第七卷阙两叶据目錄寻之禡牙文祭海文在文苑英华九百九十五卷吊塞上翁文在九百九十九卷祭孙府君文在九百七十九卷又送崔融等序之後据目錄尚有饯陈少府序一篇此本亦佚英华七百十九卷有此文今并葺补俾成完本英华八百二十二卷收子昂大崇福观记一篇称武士曩为太祖孝明皇帝此集不载其目殆偶佚脱今并补入俾操觚挥翰之士知立身一败遗诟万年有求其不传而不能者焉乾隆四十六年八月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

原序

陈拾遗集原序

苏文忠称韩昌黎文起八代之衰文家以为名言诗自三百篇而下千五百年屈子离骚阮嗣宗咏怀陈伯玉感遇而已昌黎不遇明王而二子者竟处纂秘之朝晦其文而独显其意於诗其调达其旨微其情激而志愤厌薄当世范熔古昔真得风骚之意文宗之评诗祖之许盖自其高流良非阿好不徒以辞矣伯玉当唐文明初举进士武氏奇之时有难去诸臣煽祸始深武健罗织之狱称武曌意时有难仕然明风槩而救生民公志也是故谏迁梓宫而活饥眚请建明堂以调天和兴太学以敦人伦而教胄子中间抨桀纣幽厉隋炀陰阳舛戾天地诟黷人怒神怨以警动武曌而潜易其恶条州郡人瘼天下危机谏开边衅凿蜀山奏措刑招谏官大凡八科以亨拯含灵而其机要於引贤而安宗子此其志固狄仁杰俦也史臣病其上周颂以媚武氏其辞指固含蓄汉扬子云处莽朝作美新文南丰曾子解之畧曰雄遭莽际仕非为禄生非避死辱於莽而就之似明夷箕子美新逊言盖所不得已视辱仕莽轻矣若以为病则箕不当为囚奴孔子不当见南子也王临川亦云然夫以子云伯玉较之感遇之旨激伯玉所有雄所无也敦人伦召天和招谏引贤安宗子之疏切伯玉所有雄所无也独恬於利禄雄有之伯玉有之而王曾二子犹然引箕子孔子以明其槩文士口听耳食何敢望王曾又焉得抨击伯玉也且又载子昂未仕时痛自修饬方仕时武曌数引见占对慷慨而貌鄙野少威仪此已狴犴朝阙桎梏轩冕微露素衷史臣有所不察又载武曌已篡为周复数召见条对?切辄罢乃为一县令所淫刑以死其论对不具载安知非逆鳞去酷吏乃希合曌旨史氏讵能知之耶夫以伯玉之才独步当时高视百代曌业奇之数引对在廷诸武二张公视之细蠓营蝇借少自寸屈争相腥附直奚啻寻文而遭淫刑以死此公之渊邈人莫能名而良悲所遇之不幸也故以为公志似狄梁公而逸调过之才似韩昌黎而艰危则甚显晦因时成败遘会何暇谭哉嗣宗时露愤疾世难乎免幸司马氏保全之今言二君诗者试沈思默对味味外之味致韵外之致即字字可痛哭流涕孟子曰诵其诗读其书以论其世又曰以意逆志是为得之嗟夫士隐约闇修卒与世违无以明志多矣然亦安知後无子云哉故今刻伯玉集而序之如此隆庆五年岁辛未秋八月望日南丰邵廉书於建宁郡之蒔蔬处

卷一

钦定四库全书

陈拾遗集卷一

唐 陈子昂 撰

诗赋

鹿尾赋【并序】

甲申岁天子在洛阳余始解褐守麟台正字太子司直宗秦客置酒金谷亭大集宾客酒酣共赋座上食物余为鹿尾赋焉

天之浩浩兮物亦芸芸性命变化兮如丝之棼或以神好正直天盖默默或以道恶强梁天亦茫茫此仙都之灵兽固何负而罹殃始居幽山之藪食乎丰草之乡不害物而利已每营道而同方何忘形而委代迺化情之不忘卒罟网以见逼受庖割而罹伤岂不以斯尾之有用而杀身於此堂为君雕俎之羞厕君金盘之实承主人之嘉庆对象筵与宝瑟虽信美於兹辰詎同欢於畴日客有感而叹者曰命不可思神亦难测吉凶悔吝未始有极借如天道之用莫神於龙受戮为醢不知其凶王者之瑞莫圣於麟遇害於野不知其仁神既不能自智圣亦不能自知况林栖而谷走及山鹿与野麋古人有言天地之心其间无巧冥之则顺动之则夭谅物情之不异我心又何竞於猜矫故曰天之神明与物推移不为事先动而辄随是以至人无已圣人不知予欲全身而远害曾是浩然而顺斯

感遇【三十八首】

微月生西海幽阳始代升圆光正东满陰魄已朝凝太极生天地三元更废兴至精谅斯在三五谁能徵

右一

兰若生春夏芊蔚何青青幽独空林色朱蕤冒紫茎迟迟白日晚嫋嫋秋风生岁华尽摇落芳意竟何成

右二

苍苍丁零塞今古缅荒途亭堠何摧兀暴骨无全躯
黄沙漠南起白日隐西隅汉甲三十万曾以事匈奴
但见沙场死谁怜塞上孤

右三

乐羊为魏将食子殉军功骨肉且相薄他人安得忠
吾闻中山相乃属放麇翁孤兽犹不忍况以奉君终

右四

市人矜巧智於道若童蒙倾夺相夸侈不知身所终
曷见玄真子观世玉壶中窅然遗天地乘化入无穷

右五

吾观龙变化乃知至阳精石林何冥密幽洞无留行
古之得仙道信与元化并玄感非象识谁能测沈冥
世人拘目见酣酒笑丹经崑仑有瑶树安得采其英

右六

白日每不归青阳时暮矣茫茫吾何思林卧观无始
衆芳委时晦鶗鴂鸣悲耳鸿荒古已颓谁识巢居子

右七

吾观崑仑化日月沦洞溟精魄相交会天壤以罗生
仲尼推太极老聃贵窅冥西方金仙子崇义乃无明
空色皆寂灭缘业亦何成名教信纷籍死生俱未停

右八

圣人秘元命惧世乱其真如何嵩公辈诼譎误时人
先天诚为美阶乱祸谁因长城备胡寇羸祸发其亲
赤精既迷汉子年何救秦去去桃李花多言死如麻

右九

深居观元化悱然争朶颐谗说相啖食利害纷??
便便夸毗子荣耀更相持务光让天下商贾竞刀锥
已矣行采芝万世同一时

右十

吾爱鬼谷子青溪无垢氛囊括经世道遗身在白云七雄方龙鬪天下久无君浮云不足贵遵
养晦时文舒之弥宇宙卷之不盈分岂图山木壽空与麋鹿羣

右十一

呦呦南山鹿罹罟以媒和招摇青桂树幽蠹亦成科世情甘近习荣耀纷如何怨憎未相复亲
爱生祸罗瑶台倾巧笑玉盃殒双蛾谁见枯城蘖青青成斧柯

右十二

林居病时久水木淡孤清闲卧观物化悠悠念无生青春始萌达朱火已满盈徂落方自此感
叹何时平

右十三

临岐泣世道天命良悠悠昔日殷王子玉马遂朝周宝鼎沦伊谷瑶台成古丘西山伤遗老东
陵有故侯

右十四

贵人难得意赏爱在须臾莫以心如玉探他明月珠昔称夭桃子今为春市徒鸱鴞悲东国麋
鹿泣姑苏谁见鸱夷子扁舟去五湖

右十五

圣人去已久公道缅良难蚩蚩夸毗子尧禹以为谩骄荣贵工巧势利迭相干燕王尊乐毅分
国愿同欢鲁连让齐爵遗组去邯郸伊人信往矣感激为谁叹

右十六

幽居观大运悠悠念羣生终古代兴没豪圣莫能争三季沦周赧七雄灭秦嬴复闻赤精子提
劒入咸京炎光既无象晋虏纷纵横尧禹道既昧昏虐世方行岂无当世雄天道与胡兵咄咄
安可言时醉而未醒仲尼溺东鲁伯阳遁西溟大运自古来旅人胡叹哉

右十七

逶迤劳已久骨鲠道斯穷岂无感激者时俗颓此风灌园何其鄙皎皎於陵子世道不相容嗟
嗟张长公

右十八

圣人不利己忧济在元元黄屋非尧意瑶台安可论吾闻西方化清浄道弥敦奈何穷金玉雕刻以为尊云构山林尽瑶图珠翠烦鬼功尚未可人力安能存夸愚适增累矜智道逾昏

右十九

玄天幽且默羣议曷嗤嗤圣人教犹在世运久陵夷一绳将何系忧醉不能持去去行采芝勿为尘所欺

右二十

蜻蛉游天地与物本无患飞飞未能止黄雀来相干穰侯富秦宠金石比交欢出入咸阳里诸侯莫敢言宁知山东客激怒秦王肝布衣取丞相千载为辛酸

右二十一

微霜知岁晏斧柯始青青况乃金天夕浩露沾羣英登山望宇宙白日已西暝云海方荡潏孤鳞安得宁

右二十二

翡翠巢南海雄雌珠树林何知美人意娇爱比黄金杀身炎州里委羽玉堂陰旖旎光首饰葳蕤烂锦衾岂不在遐远虞罗忽见寻多材固为累叹息此珍禽

右二十三

挈瓶者谁子姣服当青春三五明月满盈盈不自珍高堂委金玉微缕悬千钧如何负公鼎被敝笑时人

右二十四

玄蝉号白露兹岁已蹉跎羣物从大化孤英将奈何瑶台有青鸟远食玉山禾崑仑见玄凤岂复虞云罗

右二十五

荒哉穆天子好与白云期宫女多怨旷层城闭蛾眉日耽瑶台【台一作池】乐岂伤桃李时青苔空萎绝白发生罗帷

右二十六

朝发宜都渚浩然思故乡故乡不可见路隔巫山阳巫山彩云没高丘正微茫竚立望已久涕落沾衣裳岂兹越乡感忆昔楚襄王朝云无处所荆国亦沦亡

右二十七

昔日章华宴荆王乐荒淫霓旌翠羽盖射兕云梦林竭来高唐观怅望云阳岑雄图今何在黄雀空哀吟

右二十八

丁亥岁云暮西山事甲兵羸粮匝邛道荷戟争羌城严冬阴风劲穷岫泄云生昏暝无昼夜羽檄复相惊攀局竞万仞崩危走九冥籍籍峰壑里哀哀冰雪行圣人御宇宙闻道泰阶平肉食谋何失藜藿缅纵横

右二十九

竭来豪游子势利祸之门如何兰膏美【一作叹】感激自生冤衆趋明所避时弃道犹存云渊既已失罗网与谁论箕山有高节湘水有清源唯应白鸥鸟可为洗心言

右三十

可怜瑶台树灼灼佳人姿碧叶映朱实攀折青春时岂不盛光宠荣君白玉墀但恨红芳歇雕伤感所思

右三十一

索居独几日炎夏忽然衰阳彩皆阴翳亲友尽睽违登山望不见涕泣久涟洏宿昔感颜色若与白云期马上骄豪子驱逐正蚩蚩蜀山与楚水携手在何时

右三十二

金鼎合还丹世人将见欺飞飞骑羊子胡乃在峨眉变化固非类芳菲能几时疲痾苦沦蹶忧瘁日侵淄眷然顾幽褐白云空涕洟

右三十三

朔风吹海树萧条边已秋亭上谁家子哀哀明月楼自言幽燕客结发事远游赤丸杀公吏白

日报私讎避仇至海上被役此边州故乡三千里辽水复悠悠每愤胡兵入常为汉国羞何知七十战白首未封侯

右三十四

本为贵公子平生实爱才感时思报国拔劒起蒿莱西驰丁零塞北上单于台登山见千里怀古心悠哉谁言未忘祸磨灭成尘埃

右三十五

浩然坐何慕吾蜀有峨眉念与楚狂子悠悠白云期时哉悲不会涕泣久涟漣梦登绥山穴南采巫山芝探元观羣化遗世从云螭婉娈将永矣感悟不见之

右三十六

朝入云中郡北望单于台胡秦何密迕沙朔气雄哉籍籍天骄子猖狂已复来塞垣无名将亭堠空崔嵬咄嗟吾何叹边人涂草莱

右三十七

仲尼探元化幽鸿顺阳和大运自盈缩春秋迭来过盲飈忽号怒万物相纷𩇑溟海皆震荡孤凤其如何

右三十八

观荆玉篇【并序】

丙戌岁余从左补阙乔公北征夏四月军幕次于张掖河河洲草木无他异者惟有仙人杖往往藂生幽朔地寒与中国稍异余家世好服食昔尝饵之及此役也已息意兹味戍人有荐嘉蔬者此物焉余輒然而笑曰始者与此君别不图至是而见之岂非神明嘉惠欲将扶吾壽也因为乔公昌言其能时东莱王仲烈亦同旅闻而大喜甘心食之已旬有五日矣适有行人自谓能知药者谓乔公曰此白棘也公何谬哉仲烈愕然而疑亦曰吾怪其味甘今果如此乔公信是言乃讥余作采玉篇谓宋人不识玉而宝珉石也余心知必是犹以独见之故被夺於衆人乃喟然叹曰嗟乎人之大明者目也心之至信者口也夫日照五色口分五味玄黄甘苦亦可断而不惑矣而路旁一议二子增疑况君臣之际朋友之间乎自是而观则万物之情可见也感采玉咏作观玉篇以答之并示仲烈讥其失真也

鸛夷双白玉此玉有淄磷悬之千金价举世莫知真丹青非异色轻重有殊伦勿信玉工言徒悲荆国人

鸳鸯篇

飞飞鸳鸯鸟举翼相蔽亏俱来绿潭里共向白云涯音容相眷恋羽翮两逶迤苹萍戏春渚霜霰遶寒池浦沙连岸净汀树拂潭垂年年此游翫岁岁来追随凤凰起丹穴独向梧桐枝鸿鴈来紫塞空忆稻粱肥乌啼倦永夕鹤鸣伤别离岂若此双禽翻飞不异林刷尾青江浦交颈紫山岑文章负奇色和鸣多好音闻有鸳鸯绮复有鸳鸯衾持为美人赠勗此故交心

与东方左史虬修竹篇【并书】

东方公足下文章道弊五百年矣汉魏风骨晋宋莫传然而文献有可徵者仆尝暇时观齐梁间诗彩丽竞繁而兴寄都絶每以永叹思古人常恐逶迤颓靡风雅不作以耿耿也一昨於解三处见明公咏孤桐篇骨气端翔音情顿挫光英朗练有金石声遂用洗心飭视发挥幽郁不图正始之音复覩於兹可使建安作者相视而笑解君云张茂先何敬祖东方生与其比肩仆亦以为知言也故感叹雅制作修竹诗一篇当有知音以传示之

龙种生南岳孤翠郁亭亭峰岭上崇岑烟雨下微冥夜闻鼯鼠叫昼聒泉壑声春风正淡荡白露已清泠哀响激金奏密色滋玉英岁寒霜雪苦含彩独青青岂不厌凝冽羞比春木荣春木有荣歇此节无凋零始愿与金石终古保坚贞不意伶伦子吹之学凤鸣遂偶云龢瑟张乐奏天庭妙曲方千变箫韶亦九成信蒙雕斲美常愿事仙灵驱驰翠虬驾伊郁紫鸾笙结交嬴台女吟弄昇天行携手登白日远游戏赤城低昂玄鹤舞断续彩云生永随衆仙去三山游玉京

奉和皇帝上礼抚事述怀应制

大君忘自我膺运居紫宸揖让期明辟讴歌且顺人轩宫帝图盛皇极礼容申南面朝万国东堂会百神云陛旗常满天廷玉帛陈钟石和睿思雷雨被深仁承平信娱乐王业本艰辛愿罢瑶池宴来观农扈春卑宫昭夏德尊老睦尧亲微臣敢拜手歌舞颂惟新

洛城观酺应制

圣人信恭已天命允昭回苍极神功被青云秘籙开垂衣受金册张乐宴瑶台云凤休徵满龙鱼杂戏来崇恩踰五日惠泽畅三才玉帛羣臣醉徽章缛礼该方覩升中禅言观拜洛回微臣固多幸敢上万年杯

白帝城怀古

日落沧江晚停桡问土风城临巴子国台没汉王宫荒服仍周甸深山尚禹功岩悬青壁断地险碧流通古木生云际归帆出雾中川途去无限客思坐何穷

度荆门望楚

遥遥去巫峡望望下章台巴国山川尽荆门烟雾开城分苍野外树断白云隈今日狂歌客谁知入楚来

岷山怀古

秣马临荒甸登高览旧都犹悲堕泪碣尚想卧龙图城邑遥分楚山川半入吴丘陵徒自出贤圣几凋枯野树苍烟断津楼晚气孤谁知万里客怀古正踟蹰

晚次乐乡县

故乡杳无际日暮且孤征川原迷旧国道路入边城野戍荒烟断深山古木平如何此时恨噉噉夜猿鸣入峭峡安居溪伐木溪源幽邃林岭相映有奇致焉

肃徒歌伐木鸛楫漾轻舟靡迤随回水潺湲泝浅流烟沙分两岸雾岛夹双洲古树连云密交峰入浪浮岩潭相映媚溪谷屡环周路迴光踰逼山深兴转幽麝鼯寒思晚猿鸟暮声秋誓息兰台策将从桂树游因书谢亲爱千岁覩蓬丘

宿空舸峡青树村浦

的的明月水啾啾寒夜猿客思浩方乱洲浦寂无喧忆作千金子寧知九逝魂虚闻事朱阙结綬鸛华轩委别高堂爱窥觐明主恩今成转蓬去叹息复何言

宿襄河驿浦

沿流辞北渚结?宿南州合岸昏初夕回塘暗不流卧闻塞鸿断坐听峡猿愁沙浦明如月汀葭晦若秋不及能鸣鴈徒思海上鸥天河殊未晓沧海信悠悠

入东阳峡与李明府船前後不相及

东岩初解?南浦遂离羣出没同洲岛栖泊异渚濱【品彙作沿回异渚濱】风烟犹可望歌笑浩难闻路转青山合峰回白日曛犇涛上漫漫积浪下沄沄倏忽犹疑及差池复两分离离间远树蔼蔼没遥氛地入巴陵道星连牛斗文孤猿啼寒月哀鸿叫断云仙舟不可见遥思坐氛氲

陈拾遗集卷一

卷二

钦定四库全书

陈拾遗集卷二

唐 陈子昂 撰

杂诗

西还至散关答乔补阙【知之】

葳蕤苍梧凤嘹唳白露蝉羽翰本非匹结交何独全昔君事胡马余得奉戎旃携手向沙塞关河缅幽燕芳岁几阳止白日屡徂迁功业云台薄平生玉佩捐叹此南归日犹闻北戍边代水不可涉巴江亦潺湲揽衣度函谷衔涕望秦川蜀门自兹始云山方浩然

还至张掖古城闻东军告捷赠韦五【虚已】

孟秋首归路仲月旅边亭闻道兰山战相邀在井陉屡鬪关月满三捷虏云平汉军追北地胡骑走南庭君为幕中士畴昔好言兵白虎锋应出青龙阵几成披图见丞相按节入咸京宁知玉门道翻作陇西行北海朱旄落东归白露生纵横未得意寂寞寡将迎负劒空叹息苍茫登古城

度峡口山赠乔补阙知之王二无竞

峡口大漠南横絶界中国藂石何纷紜小山复翕赭远望多衆容逼之无异色崔嵬半孤断逶迤屡回直信关胡马冲亦距汉边塞岂伊河山险将顺休明德物壮诚有衰势雄良易极邐迤忽而尽泱泱平不息之子黄金躯如何此荒域云台盛多士待君丹墀侧

题祀山烽树赠乔十二侍御

汉庭荣巧宦云阁薄边功可怜骢马使白首为谁雄

题居延古城赠乔十二

闻君东山意宿习紫芝荣沧洲今何在华发旅边城还汉功既薄逐胡策未行徒嗟白日暮坐对黄云生桂枝芳欲晚薏苡谤谁明无为空自老含叹负生平

蓟丘览古赠卢居士藏用【七首并序】

丁酉岁吾北征出自蓟门历观燕之旧都其城池霸迹已芜没【一作昧】矣乃慨然仰叹忆昔乐生邹子羣贤之游盛矣因登蓟楼作七诗以志之寄终南卢居士亦有轩辕遗迹也

轩辕台

北登蓟丘望求古轩辕台应龙已不见牧马生黄埃尚想广成子遗迹白云隈

燕昭王

南登碣石馆遥望黄金台丘陵尽乔木昭王安在哉霸图怅已矣驱马复归来

乐生

王道已沦昧战国竞贪兵乐生何感激仗义下齐城雄图竟中天遗叹寄阿衡

燕太子

秦王日无道太子怨亦深一闻田光义匕首赠千金其事虽不立千载为伤心

田光先生

自古皆有死狗义良独稀奈何燕太子尚使田生【一作田光】疑伏剑诚已矣感我涕沾衣

邹子

大运沦三代天人罕有窥邹子何寥廓漫说九瀛垂兴亡已千载今也则无推

郭隗

逢时独为贵历代非无才隗君亦何幸遂起黄金台【末缺】

初入峡苦风寄故乡亲友

故乡今日友欢会坐应同寧知巴峡路辛苦石尤风

赠赵六二首

回中烽火入塞上追兵起此时边朔寒登陇思君子东顾望汉京南山云雾里

赤螭媚其彩婉变苍梧泉昔者琅琊子躬耕亦慨然美人岂遐旷之子乃前贤良辰在何许白日屡颓迁道心固微密神用无留连舒可弥宇宙揽之不盈拳蓬蒿久芜没金石徒精坚良宝委短褐闲琴独婵娟

答韩使同在边

汉家失中策胡马屡南驱闻诏安边使曾是故人谟废书怅怀古负劔许良图出关岁方晏乘障日多虞虏入白登道烽交紫塞途连兵屯北地清野备东胡边城方晏闭斥堠始昭苏复闻韩长孺辛苦事匈奴雨雪颜容改纵横才位孤空怀老臣策未获赵军租但蒙魏侯重不受谤臣诬当取金人祭还歌凯入都

征东至淇门答宋参军【之问】

南星中大火将子涉清淇西林改微月征旆空自持碧潭去已远瑶华折谁遗若问辽阳戍悠悠天际旗

万州晓发放舟乘涨远寄蜀中亲友

空蒙岩雨霁烂漫晓云归啸旅乘明发犇桡鸢断矶苍茫林岫转络绎涨涛飞远岸孤烟出遥峰曙日微前瞻未能眇坐望已相依曲直多今古经过失是非还期方【一作岐方】浩浩征思日駢駢寄谢千金子江海事多违

赠严仓曹乞推命录

少学纵横术游楚复游燕栖遑长委命富贵未知天闻道沈冥客青囊有秘篇九宫探【一作采】万象三筹极重玄愿奉唐生诀将知跃马年非因墨翟问空滞至龙川

答洛阳主人

平生白云志早爱赤松游事亲恨未立从宦此中州主人亦何问旅客非悠悠方谒明天子清宴奉良筹再取连城璧三陟平津侯不然拂衣去归从海上鸥宁随当代子倾侧且沈浮

酬晖上人秋夜山亭有赠

皎皎白林秋微微翠山静禅居感物变独坐开轩屏风泉夜声绝【一作杂】月露霄光冷多谢忘机人尘忧未能整

酬晖上人秋夜独坐山亭有赠

钟梵经行罢香林坐入禅岩庭交杂树石瀨泻鸣泉水月心方寂云霞思独玄寧知人世【旧避讳作代】里疲病得攀缘

酬李参军崇嗣旅馆见赠

昨夜银河畔星文犯遥汉今朝紫气新物色果逢真言从天上落乃是地仙人白璧疑冤楚乌裘似入秦摧藏多古意历览备艰辛乐广云虽覩夷吾风未春风歌空有问龙性詎能驯宝劒终应出骊珠会见珍未及冯公老何惊孺子贫青云倘可致北海忆孙宾

酬晖上人夏日林泉见赠

闻道白云居窈窕青莲宇岩泉流杂树石室千年古【品彙作岩泉万丈流树石千年古】林卧对轩窗山陰满庭户方释尘事劳从君袭兰杜

酬田逸人见寻不遇题隐居里壁

游人献书去薄暮返灵台传道寻仙友青囊卖卜来闻莺忽相访题凤久徘徊石髓空盈握金经闭不开还疑缝掖子复似洛阳才

东征答朝臣相送

平生白云意疲薾媿为雄君王谬殊宠旌节此从戎按绳当系虏单马岂邀功孤劒将何托长谣塞上风合州津口别舍弟【至东阳步趣不及眷然有怀作以示之】

江潭共为客洲浦独迷津思积芳庭树心断白眉人同衾成楚越别岛类胡秦林岸随天转云峰逐望新遥遥终不见默默坐含嚬念别疑三月经途未一句孤舟多逸兴谁共尔为邻

居延海树闻莺同作

边地无芳树莺声忽听新闻关如有意愁絶若怀人明妃失汉宠蔡女没胡尘坐闻应落泪况忆故园春

李二书斋【崇嗣】

灼灼青春仲悠悠白日昇声容何足恃荣吝坐相矜愿与金庭会将待玉书徵还丹应有术烟驾共君乘

题田洗马游岩桔槔

望苑长为客商山遂不归谁怜北陵井未息汉陰机

古意题徐令壁

白云苍梧来氛氲万里色问君太平世【旧避讳作代】栖泊灵台侧

送别出塞

平生闻高义书劒百夫雄言登青云去非比白头翁胡兵屯塞下汉骑属云中君为白马将腰佩騂角弓单于不敢射天子伫深功蜀山余方隐良会何时同

同宋参军之问梦赵六赠卢陈二子之作

晓霁望嵩岳白云半岩足氛氲含翠微宛如瀛台曲故人昔所尚幽琴歌断续变化竟无常人琴遂两亡白云失处所梦想暖容光畴昔疑缘业儒道两相妨前期许幽报迨此尚茫茫晤言既已失感叹情何一始忆携手期云台与峨眉达兼济天下穷独善其时诸君推管乐之子慕巢夷奈何苍生望卒为黄绶欺铭鼎功未立山林事亦微抚孤一流恻怀旧且睽违卢子尚高节终南卧松雪宋侯逢圣君骖馭游青云而我独蹭蹬语默道犹懵征戍在辽阳蹉跎草再黄丹丘恨不及白露已苍苍远闻山阳赋感涕下沾裳

和陆明府赠将军重出塞

忽闻天上将关塞重横行始返楼兰国还向朔方城黄金装战马白羽集神兵星月开天阵山川列地营晚风吹画角春色耀飞旌宁知班定远独是一书生

同旻上人伤壽安傅少府

生涯良浩浩天命固谆谆闻道神仙尉怀德遂为邻畴昔逢尧日衣冠仕汉辰交游纷若凤词翰宛如麟太息劳黄绶长思谒紫宸金兰徒有契玉树已埋尘把臂谁无托平生固亦亲援琴一流涕旧馆几沾巾杳杳泉中夜悠悠世【旧避讳作代】上春幽明长隔此歌哭为何人

咏主人壁上画鹤寄乔主簿崔著作

古壁仙人画丹青尚有文独舞纷如雪孤飞暖似云自矜彩色重寧忆故池羣江海聯翩翼长鸣谁复闻

登蓟丘楼送贾兵曹入都

东山宿昔意北征非我心孤负平生愿感涕下沾襟暮登蓟楼上永望燕山岑辽海方漫漫边沙飞且深峨眉杳如梦仙子曷由寻击劒起叹息白日忽西沈闻君洛阳使因子寄南音

送魏大从军

匈奴犹未灭魏绛复从戎怅别三河道言追六郡雄鴈山横代北狐塞接云中勿使燕然上惟留汉将功

送殷大入蜀

蜀山金碧路此地饶英灵送君一为别凄断故乡情片云生极浦斜日隐离亭坐看征骑没唯见远山青

落第西还别刘祭酒高明府

别馆分周国归骖入汉京地连函谷塞川接广阳城望迴楼台出途遥烟雾生莫言长落羽贫贱一交情

落第西还别魏四懔

转蓬方不定落羽自惊弦山水一为别欢娱复几年离亭暗风雨征路入云烟还因北山迳【一作返】归守东陂田

送客

故人洞庭去杨柳春风生相送河洲晚苍茫别思盈白苹已堪把绿芷复含荣江南多桂树归客赠生平

春夜别友人二首

银烛吐青烟金樽对绮筵离堂思琴瑟别路绕山川明月隐高树长河没晓天悠悠洛阳道此会在何年紫塞白云断青春明月初对此芳樽夜离忧怅有余清泠花露满滴沥宇檐虚怀君欲何赠愿上大臣书

遂州南江别乡曲故人

楚江复为客征棹方悠悠故人悯追送置酒此南洲平生亦何恨夙昔在林丘违此乡山别长谣去国愁

送东莱王学士【无竞】

宝剑千金买平生未许人怀君万里别持赠结交亲孤松宜晚岁衆木爱芳春已矣将何道【一作何迹】无令白发新

送梁李二明府

负书犹在汉怀策未闻秦复此穷秋日芳樽别故人黄金装屡尽白首契逾新空羡双鳬舄俱飞向玉轮

送魏兵曹使嵩州【得登字】

阳山淫雾雨之子慎攀登羌笮多珍宝人言有爱憎思酬明主惠当尽使臣能勿以王阳叹邛道畏峻嶒

江上暂别萧四刘三旋欣相遇

昨夜沧江别言乖天汉游宁期此相遇尚接武陵洲结绶还逢育衔杯且对刘波潭一弥弥临望几悠悠山水丹青杂烟云紫翠浮终媿神仙友来接野人舟

送著作佐郎崔融等从梁王东征

金天方肃杀白露始专征王师非乐战之子慎佳兵海气侵南部边风扫北平莫卖卢龙塞归邀麟阁名

春晦饯陶七於江南同用风字

黄鹤烟云去青江琴酒同离帆方楚越渭水复西东芙蓉生夏浦杨柳送春风明月相思处应对菊花丛

夏日晖上人房别李参军崇嗣

四十九变化一十三死生翕忽玄黄里驱驰风雨情是非纷妄作宠辱坐相惊至人独幽鉴窈窕随昏明咫尺山河道轩窗日月庭别离焉足问悲乐固能并我辈何为尔栖皇犹未平金台可攀陟宝界絶将迎户牖观天地阶基上宵冥自超三界乐安知万里征中国要荒内人寰宇宙萦弦望如朝夕宁嗟蜀道行

遇荆州崔兵曹使宴

輶轩凤凰使林藪鷩鷩冠江湖一相许云雾坐交欢兴尽崔亭伯言忘释道安秋光稍欲暮岁物已将阑古树苍烟断虚庭白露寒瑶琴山水曲今日为君弹

遇崔司议泰之冀侍御珪二使

谢病南山下幽卧不知春使星入东井云是故交亲惠风吹宝瑟微月忆清真凭轩一留醉江海寄情人

赠别崔司议冀侍御

有道君匡国无机余在林白云峨眉上岁晚来相寻

登蓊城西北楼送崔着作融入都

蓊楼望燕国负剑喜兹登清规子方奏单戟我无能仲冬边风急云汉复霜棱慷慨竟何道西南恨失朋南山家园林木交映盛夏五月幽然清凉独坐思远率成十韵

寂寥守穷巷幽卧空林松竹生虚白阶庭怀古今郁蒸炎夏晚栋宇閤清阴轩窗交紫霭檐户对苍岑凤蘊仙人籙鸾歌素女琴忘机委人代闭牖察天心蛺蝶怜红药蜻蜓爱碧浔坐观万象化方见百年侵扰扰将何息青青长苦吟愿随白云驾龙鹤相招寻

秋园卧疾呈晖上人

幽寂旷日遥林园转清密疲痼澹无豫独坐泛瑶瑟怀挟万古情忧虞百年疾绵绵多滞念忽忽每如失缅想赤松游高寻紫庭【一作白云】逸荣吝始都丧幽人遂贞吉图书纷满床山水藹盈室宿昔心所尚平生自兹毕愿言谁见知梵筵有同术八月高秋晚凉风正萧

卧疾家园

世【旧避讳作代】上无名子人间岁月賒纵横策已弃寂寞道为家卧疾谁能问闲居空物华犹忆灵台友栖真隐大霞还丹奔日御却老饵云芽寧知白社客不厌青门瓜

月夜有怀

美人挟赵瑟御月在西轩寂寞夜何久殷懃玉指繁清光委衾枕遥思属湘沅空帘隔星汉犹梦感精魂

于长史山池三日曲水宴

摘兰藉芳月祓宴坐回汀泛灏清流满葳蕤白芷生金弦挥赵瑟玉柱弄秦箏岩榭风光媚郊原春树平烟花飞御道罗绮照昆明日落红尘合车马乱纵横

登泽州北楼宴

平生倦游者观化久无穷复来登此国临望与君同坐见秦兵垒遥闻赵将雄武安君何在长平事竟空且歌玄云曲衔酒舞薰风勿使青衿子嗟尔白头翁

夏日游晖上人房

山水开精舍琴歌列梵筵人疑白楼赏地似竹林禅对户池光乱交轩岩翠连色空今已寂乘月弄澄泉

春日登金华观

白玉仙台古丹丘别望遥山川乱云日楼榭入烟霄鹤舞千年树虹飞百尺桥还疑赤松子天路坐相邀

羣公集毕氏林亭

金门有遗世鼎实恣和邦默语谁相识琴樽寄北窗子牟恋魏阙渔父爱沧江良时信同此岁晚迹难双

宴胡楚真禁所

人生固有命天道信无言青蝇一相点白璧遂成冤请室闲逾邃幽庭草未暄寄谢韩安国何惊狱吏尊

魏氏园亭人赋一物得秋庭萱草

昔时幽径里荣耀杂春丛今来玉墀上消歇畏秋风细叶犹含绿鲜花未吐红忘忧谁见赏空此北堂中

陈拾遗集卷二

卷三

<集部,别集类,汉至五代,陈拾遗集>

钦定四库全书

陈拾遗集卷三

唐 陈子昂 撰

表

为义兴公求拜扫表

臣祸衅所鍾早日孤露坟茔莫扫松柏凋荒臣之不天实有攸咎死罪死罪昔先臣下世遗训未忘而殃罚不图家祸潜构兄弟无故并为参商中冓之言所不可道孤臣不孝万死余责死罪死罪然臣之负谴实陷无辜吏议不明以投魑魅自泣血去国寄命南荒历年被病再罹【再罹二字疑误】生死炎山涨海气瘴穷天戴白之老俗无闻者孤臣疲荼岂望须臾分谓委骨穷溟饵身鱼鼈狼荒之鬼永悲长逝不意庆云垂泽天焕宠流拂拭雾露生见白日踊跃昭泰情何以胜死罪死罪而余殃未泯凶祸荐臻亡兄济江合家沦溺嫂侄俱逝一不生存寻途未中臣妻又殒重叠亡歿契濶山川至止之日生意尽矣誓将死守陵墓没齿家园不图恩幸曲成宠章仍及题舆别驾职是恩州再造生涯天实为德死罪死罪臣自归日浅茔庙未修荆棘荒然祭祀无主今即便祇王命远职边夷岁月方賒拜扫何日瞻言出涕感咽崩摧伏惟陛下仁养羣生孝理天下万物咸遂各得其宜臣独向隅有以长戚伏愿天慈愷悌怜悯孤穷寬以简书之刑賜其告归之请使得骏奔西土长号北陵获申存没之悲生謁园茔之树稽顙松阕谢不睦之辜肉袒山门祈自新之路刻誓肌骨奉以周旋然後退死蛮夷沈骸粪土甘心朽灭庶无遗恨倘昊天鉴照孤誠可哀则臣之鰥生志毕今日不胜崩迫之至

为将军程处弼辞流表

粪土臣某言臣以殃衅侄构凶逆臣合宗族诛戮以显国刑不谓天慈哀矜宥从寬典全臣骸骨生甯遐荒穷魂再造以崩以跃【中谢】臣闻忠臣事君如子事父穷痛之至则呼所亲何者君父恩深臣子恳切况臣蒙陛下恩遇如子於母今为子不孝为臣不忠长辞阙庭永没荒裔悲穷痛恨荼毒谁依即使朽骨埋魂长灭泉壤恳誠莫展幽翳明恩寔恐隱匿於君不尽臣节明神诛殛瞑目貽殃輒敢隳裂肝心罄竭誠懇殘喘冒死期以少谢伏惟圣母神皇陛下哀怜垂察【中谢】臣闻犬马贱畜尚知主恩草木无心犹感德化臣虽驽猥不足比人负荣怀恩能无感激臣山东孤贱朝无亲故性识愚钝材无可堪非能矫节立方饰行轨物假借名誉

为时吹嘘遂得宿卫阶墀忝迹郎将勤劳莫纪尸素已多任经十有三年竟无一阶升録臣之弩劣於此可见而贪冒荣宠尚不知归陛下应天受图恢纂大业又不以臣弩钝特见褒昇擢任中郎委以心膂在职未几即检校将军才逾一年又加正授未盈三岁贵显朝端宠渥隆崇莫与臣比每刻肌骨晓夜思惟臣以何功谬私天造超羣越辈显赫明朝应由天性专愚守一守直行不负物心不愧神恩忠事君竭力养母所以圣慈幽鉴曲照恳诚宠任无疑委同亲近不然愚臣何以叨此殊恩臣凶险罪深母不终养爰初遭疾以至终亡天慈再三降医赐药酒脯珍膳继踵臣门优问殷勤若同亲戚臣之母子何德於天子贵母荣恩礼重叠臣诚不孝至顽至嚚蒙此恩荣岂无感戴臣愚性为善不愿人知非敢自矜用为侥幸皇天后土实鉴赤心臣往任郎将之日陛下特以臣贫赐银及彩臣以天恩非分矜憖赐臣怀戴之心祈恳冥报遂用於天宫寺写经造像半为圣人半为老亲臣以君亲之恩所宜并报报是常理不合【合疑作令】人知自尔造成一无知者臣今日获罪不合上言寔以事君之心所宜罄尽善恶有隐恐负赤诚恐臣长没黄泉无见圣日区区之意安可不陈臣每以陛下恩深微臣命浅尝愿湮宗灭族获报万分何图诚効未申凶孽先集逆天反道背德辜恩污辱门宗亏缺臣节此臣所以摧心泣血仰天号咷长负陛下之恩终无上报之日烦冤荼毒心肝以糜比者待罪幽囚以殒身碎首为奉陛下赐书示喻照察臣心所以捧戴偷生假息残喘今既蒙寛法兄弟获全投窜遐荒甘御魑魅臣之庆赖复何可言所恨亡母弃背即遭此祸几筵涂炭孤魂存者流离亡者哀痛含酸幽显为世【旧避讳作代】所悲应由臣不孝不忠延此祸衅以何面目将见先臣以何心顔拜辞天阙生死无措永诀於今即以某月日部勒妻子奔波就道即应死灭腐草幽泉伏愿圣母神皇陛下至尊宝神为万姓加膳天下禔福以佑苍生壽若南山永永无极

为宗舍人谢赠物表【三首】

草土臣某顿首稽顙上言今日中使某至奉宣勅旨以臣母丧赠物若干以给凶事孤臣鞠凶礼辱天赠稽顙拜命号絶迷图【中谢】孤臣不天早失父兄弟孤藐并未成人亡母哀惻鞠育见保不坠於地以及於兹私门幽显为庆荣忝之望非有始图陛下亲亲敦心未属悯臣孤贱惠降恩休孤门载昌寔始天造母子之赖以喜以惶兢兢孤臣未知攸答陛下又恢大运崇号徽章时复私臣弟兄超登显位母子光宠荣养以全岂臣单微官能及此早逝先没以为亲荣而天不祸臣延及老母号愬无及荼毒烦冤陛下降哀又见悯悼惠赐礼物过越典章生荣死哀重叠若此孤臣残喘胡顔冒德而臣之迷塞荒谬礼经先远之期又劳赐问有无之礼忧若家人天实为之臣复何及即此殒絶期以谢恩号咷崩鲙伏表迷塞不胜荒迫

第二表

草土臣某云云言今日伏奉恩勅以臣亡母初七特降上宫若干人给事黄门若干人赐物若干段以给护斋事天恩过礼伏念号惶孤臣殃衅尚未殒灭荼毒如昨奄将一旬崩号无及肝心糜殒陛下慈惻哀念孤穷复忧斋祭恐有阙礼既赐束帛又降上宫恩慈再三若犹未足自国之宠贵未闻此荣草茅孤臣何以堪处不日销灭永负圣恩号泣旻天以崩以愬不胜荒迫之至

第三表

草土臣顿首稽颡言伏奉某月日恩勅以臣亡母迁祔特降勅给人夫及车牛服用物若干以护送灵柩至京祇奉恩私顿首崩殒臣未亡灭假息苫庐日月永往奄及先远荒迷在疚不知礼仪陛下哀矜悯其不逮恐有颠沛忧及亡灵备物象设并自天赐祖载莹送又悉官供威仪在途魂魄光宠行路延伫咸以为荣孤臣穷凶何图至此天德弥厚残喘待终泣血扶灵方灭归路号感恩造穷絶迷图不胜号噎恋恩殒絶

为将军程处弼谢放流表

臣某言臣无教训家有逆子臣合污宗灭族以显国刑天慈哀矜放从流窜臣为庆赖已是非图今月遂蒙天恩以臣所坐流刑特从放释穷骸枯骨一朝再生踊跃章惶再崩再殒【中谢】臣山东孤子朝无亲故性识愚鲁非有才能陛下超羣越辈崇以荣宠昔任郎将十有三年遂无涓尘一阶升录自陛下践极谬荷恩私冒宠叨荣超絶时辈从郎将检校将军才逾一年即加正授皆从宸眷非有因人宠渥隆崇莫与臣比臣之孤贱荣显知慙臣又凶殃积罪甘投魑魅孤负陛下之恩永为遐荒之鬼肝脑涂地无以微酬岂谓天造曲矜恩及枯骨收骸沟壑返魄幽泉使魑魅穷魂重生圣日粪土残命不灭荒陬荷德戴恩万死无报不胜感荷再生之庆

为人陈情表

臣门衰祚薄少遭险衅行年三岁严父早亡慈母鞠育衰憊相养臣又阉羸少多疾病零丁孤苦仅得成人老母悯臣孤蒙恐不负荷教诲师氏训以义方家贫无资纺绩以给束修衣褐并出母指臣既无姊妹寡有兄弟衡门独立惟形与影母子相视惻惻靡依罹此艰虞历二十岁臣稍以成立忝迹朝班薄禄微资始期色养私情既获母子相欢殃罚不图老母见背攀号何及泣血涟洟于时日月非宜权殡京兆岁序迁速於今某年臣本贯河东坟隧无改先人丘垄桑梓犹存亡母客居未归旧土宿草成列拱树荒凉兴言感伤增以崩咽今卜居宅兆将入旧莹明年吉辰最是良便除此之际未有克期臣谬齿王人职在驱役今岁奉使已至居延单行虏庭絶漠千里臣虽万死无答鸿恩恐先朝露有负眷知伏惟陛下仁隐自天孝思在物哀臣孤苦降鉴幽冥使臣来年得营葬具斩草旧域合骨先坟保送羁魂获申子道乌鸟之志获遂私情迁窆事毕驰影奔赴虽即殒歿甘心无憾

谢免罪表

臣某言今月日司刑少卿郭某奉宣勅旨以臣所犯特从放免伏对恩命魂魄飞扬【中谢】臣巴蜀微贱名教未闻陛下降非常之恩加不次之命拔臣草野谬齿衣冠臣私门祖宗幽显荣庆岂止微臣一身而已臣宜肃恭名节上答圣恩不图误识凶人坐缘逆党论臣罪累死有余辜肝脑涂地不足塞责陛下弘慈育之典寬再宥之刑矜臣草莱悯臣愚昧特恕万死赐以再生身首获全已是非分官服具在臣何敢安臣若贪冒宠私腆顔恩造复尘旧职以玷清猷

蝼蚁微心实慙面目臣伏见西有未宾之虜北有逆命之戎尚稽天诛未息边戍臣请束身塞上奋命贼庭効一卒之力荅再生之施庶陛下威命绥服荒夷愚臣罪戾时补万一若臣获死锋镝为厉犬羊古人结草寔臣恳愿不胜大造再生荷戴之至

为丰国夫人庆皇太子诞表

臣妾某言今月日伏承轩宫载诞皇嗣克昌品物咸欢天人交庆臣妾闻圣人多子祝美於尧年螽羽宜孙称道乎周颂自非璿图配永宝祚灵长何以茂对天休光绍大业伏惟皇太后陛下星虹授祉月梦延祯余庆集於天孙荣光流於帝子玉衣方泰瑶渚增辉某窃宠中姬承恩外戚涂山之庆既裕於夏台高禖之祠未陪於殷荐窃以黄污之品可享王庭玄柜之微有芳天献岂图美於丰侈信有厚於由衷敢用拟议苹蘩精诚菽藿洗心而荐窃希瑶席之珍洁意而羞以陪金鼎之实谨献食若干輿冒黷珍膳沾污象筵迫用慙惶伏表悚灼

为乔补阙庆武成殿表

臣某言臣以今日奉勅於武成殿唤臣入问骨笃禄等贼请降事臣以愚瞽得践赤墀对扬天休具奉其状天恩特赐臣温顔又降问云洛阳宫室皆隋朝营制岁月久远多有隳颓楼阁内殿凋落者衆补一坏百无可施功唯此武成确然端立土木丹彩光色如新不知何故得自如此卿之博识应知其说臣当时造次畧奏其梗槩退而再省未涉万分臣恭惟圣言緬求神象研几太极幽赞元符上以稽验神谋旁以合契冥数信有至道允在於兹臣闻圣人有言曰清明在躬志气如神嗜欲将至有开必先先天降时雨山川出云此盖言神应必有其物陛下至尊至神为天下主幸御羣品威统百灵宸居尊严品物昭泰自天而佑於是用宁抑臣又闻物之有灵如人之有神神之和畅则支体便利用人繁昌则物必丰茂所以见其俗知兴废之数覩其气识盛衰之由服物犹然况其大者今陛下应天受命括地登枢先飞名於秘籙终膺图於宝座今则当千载之运得一统之元帝气氤氲祚基於元命皇图幽藹象显於天成夫以德之休明尚被草木化之昭庆且变烟云况皇皇真君龙居其极武成合庆土木增荣独超衆殿夫何足怪臣闻敬其事者必载其文美其业者必颂其德臣所恨才非墨妙思乏笔精不能赞扬休祚歌咏圣德臣请以此事付之史臣亿代知神万载知述伏愿天恩特垂降许

为程处弼庆拜洛表

臣某言臣粪土残魂合甯荒裔特蒙陛下施再生之德赦万死之诛起骨九泉同列编户臣诚万死无以上答况恩全贱命生在帝乡伏见陛下至德配天化及草木天不爱宝洛出瑞图地不藏珍河开秘籙陛下恭承天命因顺子来建立明堂式尊显号成之匪日功若有神万国咸欢百灵同庆元正肇祚品物惟新陛下郊祭旻天总受羣瑞神灵庆戴万福攸宜斯寔旷古莫闻於今始见螻飞蠕动莫不欢心臣以粪土穷骸不合辄同朝贺以古来大礼莫盛於今昔登封泰山七十四主明堂布政无三数君诚以陛下道冠古今恩溢天地昆虫草木犹或相欢况臣久蒙驱策今日又拔死为生沟壑残骸而得再造遂得恭闻大礼侧听鸿名臣伏惟宇宙之中含气之类蒙恩负德独臣最甚向非陛下慈造曲被鸿私臣已灰灭遐荒肝涂边壤岂得尚

存骸骨恭闻圣庆臣所以匍匐冒死不避诛戮冀申蝼蚁之情以同鸞雀之庆然臣自惟罪累不可比人在於礼经尤宜自絶所以屏营粪土不敢先闻今既万国礼终百神庆毕昆虫鸟兽亦并欢宁故臣蝼蚁之诚始敢昧死上贺臣伏知冒礼违法罪合诛夷臣生见明时预闻嘉庆臣今即殒灭实万死为荣不胜欢踊戴贺之诚

为人请子弟出家表

臣某言臣以险衅私门不造亡父故某官先臣某早先朝露永谢休明日月不居星纪云暮伏以先臣策名委质冠带早年始自解巾即陪轩禁终於结绶累忝荣私三历名卿职参於河海八居州牧任叨於股肱而报効莫闻零落先及启足之日露首知惭是以臣克奉诏言志期冥报请以当家子弟三两人奉为高宗大帝出家归道而孤?在疚遗属未申奉以哀号实贯心髓今者大帝登僊之忌以及兹辰先臣恳诚未效他日所以乞遂冥愿敢覬天恩庶菩提之因发挥於正觉涅槃之证幽赞於宸阶先臣夙心无恨泉壤伏愿上天降鉴微诚可哀因缘获展存没交庆不胜崩迫【云云】

为陈御史上奉和秋景观竞渡诗表

臣某言伏见某月日御制秋景务余聊观竞渡故陈先作式伫来篇凡六韵天文爰降品彙咸亨金简潜开瑞图斯见臣闻白云兴咏汉游汾水之祠黄竹申歌周舞瑶池之驾然而志崇远轍事或劳人故文思之化未光太清之道攸阙伏惟圣母神皇陛下大虹齐圣感月含神玄德茂於皇阶文明照於天下用能提玉斗挹璿衡百神景从三灵协赞青云出洛爰开受命之符赤甲荣河终御兴王之宝非穷神之至德者其孰能与於是哉既而黄屋务闲紫极时暇洞庭张乐思接轸於轩游舫水披图想同骖於尧辇然远而劳物者未若近而安人动而勤已者岂比静而神泰於是徙金蹕鸣玉銮清禁林御池殿肃波神而戒事命舟子为水嬉彩鷁莲歌乍起吴江之引青龙桂楫时讴越女之风鸟逝虬惊沸珠潭而竞逐雪飞电集横玉浦而流光信可以娱乐性灵发挥文物皇欢允洽白日俄光於是奏薰风於管弦咏丛云於林籥帝歌爰作天藻攸彰黼帐帷宫縟文房之綉彩祥云瑞景霏翰苑之荣光信探道於元苞得斯文於紫极太平允矣元首康哉方欲朝明堂之宫受羣后之瑞尊崇显号光启圣图封玉嵩丘以接千年之统泥金少室攸增万岁之规卓哉煌煌圣君之表也微臣曲学蓬户窃位兰台未闻骢马之謠非有雕龙之思鞠躬霜署谬覩於天章逖听钧台侧闻於帝乐天文尊贵不远於下臣帝宝珍崇曲宣於近贵窃以君唱臣和固不隔於尊卑宫变商从方允谐於金石辄用斋心扣寂假翰求词将以攀日月之末光继萤燭之微照不胜【云云】

为朝官及岳牧贺慈竹再生表

臣等言臣闻天视自我民视天听自我民听故尧臣方命降震怒之灾姬圣尊仁受昭事之福先王乃以恭畏上下祇奉天人於是有昭德塞违惩恶劝善所以明枉直正典刑一昨伏奉恩勅宣示司农卿宗晋卿所奏日者王德寿等承使失旨虐滥无辜灾感蝗虫毒痛慈竹宁岁为之饥饉毗庶以之流离冤魄冥申玄感上彻乃降明制发德音恤淫刑蠲虐典於是幽魂雪愤

遺囑昭蘇枯竹由其再生蝗虫为之稻書?蠢動色瘴疔收氛當天札之凶年致昇平之稔歲非夫聖靈昭感天人合符何吉凶之徵報同影響天下幸甚臣等聞聖人法天所以順物小人違道則必亂常故虞稱欽明嚴四凶之罪魯有仁義正兩觀之誅所以邦家用昌苛慝不作王某等色厲內荏心僻行堅弄措刑之文為商夷之法以訟受服同惡自尤竟招殛竄之辜允肅政刑之序今者蒼鷹斂翼乳虎含牙朝廷無腹誅之憂天下有刑措之頌信可以懲殘創酷誘善旌冤永清侮弄之階共登仁壽之域臣等謬贊台閣忝守藩維寔思仰奉大猷以穆中典幸屬至聖崇德小人勿用凡在庶品實百恒歡雖成康頌聲文景默化刑清政肅曾何足云伏乞書之國經頒示天下使四方風動萬國歸仁垂范後昆以為世則臣無任慶拚之至

為赤縣父老勸封禪表

臣聞帝功既大必昭告於上玄元命攸尊必升封於厚載故七十四主能恢萬代之規三五六經以為百王之典伏惟陛下應天受命握紀登樞包括乾坤之靈亨毒神明之化故能開天寶闡地珍溫洛所以升圖榮河由其荐籙羣神既贊衆瑞交馳謳歌於是大歸禮樂以之咸備陛下奉順天意允答神休垂顯号以居宸建明堂而治物百寮惟允萬國咸寧然則嵩岳神宗望玉璣而來禪天中僊族仁金駕而崇封實大禮之昌期膺告成之茂典況神都為八方之極太室居五岳之尊陛下垂統紫微大昌皇運報功崇德允協神心應天順人雅符靈望皇圖盛業實在於茲臣等叨預堯封久忘帝力竊聞聖人封禪天下所以會昌山岳成功皇壽由其配永臣等既為陛下赤子陛下又為萬姓慈親實愿上报天功下順人望勒成嵩岳大顯尊名不勝【云云】

為永昌父老勸追尊中山王表

臣聞子貴親榮聖人典禮故姬文受命尊太王之名漢祖登宸加上皇之号而皆事美帝籍業盛昌圖臣伏見中山大王道合先天功成佐命昔高祖神堯皇帝義旗爰建大号初興首贊皇基定策京邑用能神驅電掃應天順人龍躍紫微光宅區夏實賴大王之德翼成高祖之勲開國成家猶未奉答況陛下應天受命協運披圖正显位於明堂昭大明於天下功崇五帝業盛三皇可謂寶極洪名尊崇光大今者追尊之义猶闕於显陵榮親之典未聞於帝号臣聞商周革命封杞宋之君春秋正名美虞晉之祀夫以興王繼絕尚不闕於禮經況乎大孝尊親豈可亏於祀典臣等澹和白屋沐慶玄門幸為可封之人叨遇永昌之運伏見陛下則天法地崇孝臨人方且示天下以事親正皇猷以達禮蒼生之慶實賴惟新不任區區伏請上中山大王尊号遠以光祖宗之德下以順黎元之望

為百官謝追尊魏國大王表

臣等昨陳愚懇請上魏國大王尊号天慈恩孝降順羣情宇宙咸歡品物知泰【云云】臣聞一人有慶萬國歡心況乎道洽奉先義光尊号伏惟聖母神皇陛下鑲宮受命寶極披圖以大孝而居尊勤至仁而育物用能光於四海化及萬方緬惟尊祖之儀實美前王之典宸心載穆盛百辟之誠求帝冊終開見千年之盛禮蒼眈以之禔福皇極由其永昌凡在含靈孰不欢庆

为建安王献食表

臣谬籍葭莩叨荣圭社元戎出塞违凤扆而逾年班师入朝拜鸾闈而有日而策勋饮至频承湛露之恩献寿奉觞未申行潦之荐所以白茅微藉愿享於钧台黄污菲诚思奉於瑶水谨辄献食一百輦伏知金鷄瑞鼎盈上帝之珍羞玉女行厨尽羣仙之品味以兹菲薄有陋苹蘩多慙在藻之欢窃有献芹之志所愿皇慈俯纳丹慊获申天子万年永庆南山之寿微臣百拜长承北极之恩无任诚恳之至

陈拾遗集卷三

卷四

钦定四库全书

陈拾遗集卷四

唐 陈子昂 撰

表

为李卿让本官表

臣某言伏奉月日恩勅依旧授臣中大夫守司农卿臣枯骨再生更蒙宠命魂魄兢越不知所图【云云】臣实庸愚本无名节庇身公族窃轩冕之余假翼宗枝滥衣冠之末因循宠服累历荣班素飧之责每深劾拙之勤未补横被逆贼徐敬真以私仇架祸诬臣云与叔孝逸交通逆竖狱官执法寘以极刑臣腰领之诛已甘灰粉泉壤之魄分隔幽明不图天地之恩再生枯骨日月之照曲被幽泉察臣非辜愍臣无罪不牵文法之议特垂赦宥之慈蝼蚁微躯复得全活自非陛下克明克圣至德至仁臣之魂骸不保今日臣免死为幸岂敢期荣陛下重加宠章还臣旧职典司宗伯以睦周亲愚臣胡颜敢冒朝典况臣叔孝逸推使未回在於愚臣更须待罪安敢私职以玷国章伏恳天恩照臣愚恳不胜感戴生荣之至

为陈舍人让官表

臣某言伏奉今日诏书以臣为凤合舍人荣命自天宠章非次祇奉惶越颠沛失图【中谢】臣以诸生宦不期达徒以时逢昭泰迹忝周行非有君子瑚璉之材通儒青紫之秀已得评刑北寺执宪南台鵷鸿之政无闻骢马之荣已极陛下天飞践阼云纪命官阳琯初开庶政惟始金章玉式允待其人如臣疲弩宜所遐弃岂图尚矜庸劣昭覩钦明任同信臣宠优时辈预参详於诏狱叨獎渥於宸阶省已循躬实知非分陛下不以荣过其量职越其才遂欲超絶亲贤参掌枢要司言凤綍挥翰龙池愚臣何言敢冒天造臣闻紫机务重青琐任隆位匪其人政由有阙臣才无经济识昧典章将何以光赞帝猷奉扬休命物无异议政允其中臣虽小人必知不可何况乎君子岂曰能贤伏望妙选时英旁求衆议玆曰惟允以弼良图愚臣恳诚非敢饰让

为司刑袁卿让官表

臣某言伏奉某月日勅授臣某官祇拜宠光魂魄飞越【中谢】臣闻王者敬慎懋在典刑天下允平取兹廷尉苟非其任法不虚行臣本庸微名术无纪皆缘际会昭遇盛明谬得敷历簪

裾陪奉鹭綢繆荣禄荏苒平时毫发之功无闻於官守素飡之责每积於公朝何尝不悚迫惟忧夙夜祇畏而天恩方被宠命仍加复蒙玺诰之荣骤覩银章之贵永言非据稽首知慙伏惟神皇陛下恭已受图任贤兴化方期合符皇极代理天工臣亦何人敢妨贤路伏见某官弱冠登仕早有能名每以清白洗心不为寒温变节诚使荣加天宠职察云司必能利用文明哀矜庶狱弼成五教无藉於虞臣载光三典允谐於周议愚臣暗昧不识大猷请乞以所授官让与某官庶使官允其才名不失实圣明有得人之盛愚臣无冒责之讥实在圣慈鉴非虚谬

为张着作谢父官表

臣某言臣父某守官不谨获罪自躬犯非清廉法宜不赦实由臣为子不孝使父陷刑天恩不肃严科放全首领臣得父子相见已是非图岂谓天泽无涯更垂休命臣父子兄弟免罪从荣载惶载殒实庆实跃【中谢】臣父子凡品守道幽微天恩矜悯见垂采録叨承恩幸厠列陪臣自侍奉已来於今十有八载虽业艺无纪劳勩不闻小心恭勤庶免愆过明明昊天实昭实察不敢有二不敢有私夙夜兢兢祇惕若厉所以父母兄弟皆荷恩私叨职谬官并预供奉摩顶至趾岂足上酬愚臣兢兢实慙实悚不意臣父衰髦恃宠忘公贪润微财取犯朝宪应是臣不忠不孝事父无良廉耻不羞几谏有阙遂使陷於刑法有玷国章臣之万死无补此责刻肌刻骨泣血泣天恨负圣恩以媿朝列臣宜代父蒙罪自殒阙庭不合偷安尚求苟免诚以天波昭洗得更自新所以忍垢偷生克躬自励期効万一补过酬恩灰躯糜骨以甘心愿伏惟神皇陛下恩同父母矜照恳诚信其赤心实有罄竭【云云】

为资州郑使君让官表

臣某言伏奉月日制以臣为资州刺史恭承玺命祇拜宠章匪服知慙循荣如失【中谢】臣学慙名术才乏器能而宝历逢时金章坐忝题舆佐岳无展骥之庸剖竹专城阙悬鱼之化坐啸徒积主诺空慙伏惟陛下革命开基造天立极方且宏宣帝典大启皇猷而四岳观风不虚其任六条班政允属其才臣疲朽已侵循良久昧将何式光刺举允协得人伏愿博选英才克谐金议使人光共理政治惟良大周之命惟新愚臣之责攸息其所让人具如别状

为武奉御谢表

臣某言伏奉某月日诏书以臣为尚食奉御肃恭休命祇拜宠章荣庆既崇慙荷交集臣才亏琢玉学昧羸金徒以席宠葭莩容光日月叨承云渥既广天工而策更恩昇位非德举无阶而进坐致於青霄有庆方来载光於朱紱臣闻瑶庭任切攸称六尚之荣玉食礼尊实总八珍之贵臣术慙缘鹤业匪参龙将何致美琼芳式和金鼎鸿私曲被殊宠降临天命既不可违圣恩允宜祇戴循涯揣分实非所图

为王美畅谢兄官表

臣某言臣兄某前某官特蒙恩诏擢授豫州司马未及赴任即以某月日改亳州司马再三策

命叨荷恩私在臣宗門實為庆幸【中謝】臣兄自解巾從仕三十余年五為縣宰三遷州佐政皆通顯職實恭勤直道在公有終始之節平心應物無造次之愆在於周行頗蒙推荐近屬虺貞構逆惑亂豫州誣誤平人自貽泉滅陛下憫荊河之俗遭此無辜吊汝濱之人使其昭慶以為奉揚皇化者必藉其才撫馭窮人者亦資其德臣兄貞固濫承天獎遷授豫州在於天恩實為超擢今者未及赴任復降授亳州重疊承恩翻同貶降朝廷體例實亦為尤臣兄弟叨榮濫竊非天慈改授不合冒聞但以始者承恩蒙越抽擢今有何過遂同左遷區區懇誠輒敢祈訴天澤伏愿皇慈有裕降昭獎之恩臣兄竭忠獲展才之地小臣死日猶生之年

為金吾將軍陳令英請免官表

臣某頓首死罪上言臣聞軍政不臧春秋責帥故楊干之亂魏絳致戮所以國有明賞下無濫功臣幸以常才文武兼闕始年十八投筆從戎西踰流沙東絕滄海南征北伐無所不至席寵門緒忝迹軒墀屬高宗崇德深仁孝理天下以臣祖父兄弟一門五人皆仗節盡忠身死王事遂超臣不次授原州都督臣時年三十二職兼五印榮絕一時皆緣此恩累忝藩翰持節統部前後八州皆居塞垣當賊冲要國之重寄莫與臣比雖無長策恤戎伏胡恭守朝章保完免失屬陛下大聖矜老容愚不以臣弩怯更加寵命授以青紫遣督幽州林胡構凶王師出討士馬云集軍務星繁糧饋戈甲動以億計臣無田疇鄉導之策又乏杜預度支之才空竭疲單晝夜不息以勤補拙首尾三年彌縫闕漏幸無乏張玄遇等不謹師律賊得乘機遂敢長驅燕陲深入趙際臣又無李牧東胡之畧實愧吳起西河之守使凶狡斂■〈襄父〉遂擾邊鄙論之國宪合劓頸謝罪陛下又不以臣為辜更授清邊軍副大總管五月恩制六月到軍逆虜天亡臣又無効至於軍功戰籍叙勲定勞副職日淺未及精核大兵旋旆王師獻功而漢庭將軍未聞辭第云中太守已論增級今乃竊功謬賞有忝朝章忠誠殉節不昭國議實由臣身濫其職任過其才上不能允副聖心中不能匡正戎律傍招物議有紊軍容臣罪何逃孰執其咎伏愿乞賜骸骨貶歸私第式清朝序永觀師貞不勝惶懼

制曰卿出鎮窮塞作牧蓟門雖無破陣之功終有扞城之効且膺巡警未可懸車

為副大總管屯營大將軍謝表二首

臣聞玃狁不恭周王致其大戮將軍失律漢將被其嚴刑未有逆命驕天而逋畔鼓之罰亡師沮眾遂寬載社之誅伏惟天冊金輪皇帝陛下肅恭上帝子育羣生萬國所以宅心百蠻由是屈膝而契丹凶狡敢竊邊陲毒虐生靈暴殄天物皇兵順伐仗仁義以共行窮寇奸回凭險阻而猶鬪臣等仁虧聖略智昧詭圖遂以熊羆之師挫於蛇鼠之旅誠合結纓軍辜祇罪國章陛下以堯舜深仁且緩三苗之伐禹湯罪已不与萬方之辜遂得齒劍余魂更參授鉞之任死綏亡魄復同挾纊之恩四夷慕義以來蘇三軍感恩而拚舞痍瘡再起俘馘是圖將士同心誓雪孟明之耻殤魂共憤思抗杜回之讎臣等殉義忘身報恩惟死不任感激慶戴【云云】

臣某言伏奉某月日子前赦書赦臣萬死才削見任官秩還復本將軍名始慶再生即榮寵命宛轉踴躍感戴慙惶【中謝】臣聞齒門受律本合忘生對敵臨戎殉節惟死此乃國家恒典軍政嚴科臣妄以庸才謬叨重任不能深圖遠算馘丑摧凶以宣廟略之威永息邊人之患屬

前军挫衄士卒奔亡臣後继驱驰战鬪交合川谷地险客主势殊步马相悬左右受敌决命争死力尽涂穷遂以貔貅之师衄於?蜚之衆诚宜刎首谢国杀身报恩陛下洪汤禹之仁务寛大之典愚臣同孟明之侣遂免严诛白骨再荣丹慊未泯誓将枕戈尝胆殄灭梟凶躬为士卒之先以雪殇魂之愤肝脑涂地少荅鸿私不胜荷戴再生荣幸之至

谢衣表

臣今月日千骑田楷至伏奉恩勅赐臣紫衫皂衫袴等一副臣万死枯骨垂朽蒙荣载战载殒肝心涂地【中谢】臣以弩朽叨承重任凭奉圣略诛讨元凶实合震曜天威俘斩逆首而智力浅短进退无规被王孝杰陷锋於前臣则接战於後躬先士卒苦鬪山林自辰至酉杀贼无数崑谷峻狭车乘相阨旋被孝杰败兵回相冲突逆贼乘便衆袭臣军士卒被伤裨将多死臣决命争首陷阵摧凶日暮兵疲疮痍相半鸟散山谷人无鬪心臣独无依遂失师律即欲刎颈阵下委骨显诚实恐身死寇塲未雪国耻所以含垢忍辱图死阙庭今月六日至幽州即囚系狱户延颈戢魄唯待严刑汤镬在前分委灰土岂谓天慈矜鉴回宪增荣以其伏鑽之魂更辱赐衣之宠烦冤踊跃载兢载惶泣血尝胆誓复国讎刻骨刻肌敢忘天造不胜已死再生感戴欣跃之至

为建安王贺破贼表

臣某言今月日得辽东都督高仇须等月日破逆贼契丹孙万斩等一十一阵露布并捉得生口一百人送至军前事三军庆快不胜踊跃臣闻天之所弃虽暴必亡人之共讎在远弥戮况凶羯遗丑未及蝼蚁固作孽以招诛自辜恩而取灭伏惟陛下威加四海子育百蛮鬼神尚不敢违凶狡岂能逃罪逆贼万斩等天夺其魄生自为殃仇须等谨奉庙谋远凭国讨短兵才接羣逆销亡返风回烟薰睛掩目此乃天威潜运神道密周岂止人谋抑由灵助今尽灭殃病婆固折股饥灾兼至凋弊日滋未加天兵应自糜烂臣训励士马今月尅行大军一临凶寇必殄献俘在即拜阙有期预喜承恩思胜庆贺

为河内王等论军功表

右金吾卫大将军兼检校洛州长史河内郡王臣懿宗加爵一等勲五转司宾卿兼羽林大将军建安郡王攸宜加爵一等勲七转臣某等言伏奉月日制书録臣等在军微功特加前件勲封嘉命聿至宠渥载优伏对慙魂殒首颠越【云云】臣闻古者名将先士卒而後身故其功勳末世庸将穷人力以宠已故其政乖然则箠轲投河三军告醉刳印在手万夫以离夫与衆共功专已独利成败之理兴亡继焉赏者国之大数据不可忽日者林胡构孽敢乱燕陲陛下徵义兵诛不道天下士庶麤集星驰皆忘身忧国纾患却难至於躬先矢石血涂草莽冒艰险历寒温气腾青云精贯白日诚亦勤矣虽则圣灵威武逆虏自灭然士卒戮力亦尽其劳今大功未酬衆议犹在而臣等弩怯猥加先封臣等不能折冲边庭还师衽席今坐加茅土之赐以先将士之勤使鷩冠虎臣将何以劝今战士留滞於外府军吏咨嗟於下寮臣等胡顔敢冒天造夫赏一劝百犹恐未孚利一阻万其弊谁救爵命不可以招谤国章不可以假人伏愿天光

俯回昭发军礼请以臣等前件勋封回授战亡人及立功将士等上以明国之大赏下以雪臣等谬功使人悦忘劳士感知死然後兵可训励贼可诛屠此诚国之元经不可苟而利者臣等不胜区区

为建安王谢借马表

臣攸宜言伏奉圣慈勅借臣廐马四匹星旗方列天马忽来祇拜恩荣拚跃兼集臣名慙白马阵昧青龙伏凭庙胜之威窃总元戎之首皇师久露凶羯未孚方欲亲负干戈身先士卒金山深入期突厥之功玉壶遂临叨得骏之赐昔开东道今见西来感燕骨而长鸣君恩罔报向朔云而骧首蹠顿方擒坐驰千里实愧三军宠贵非图荣多增惧

奏白鼠表

臣某言今月日臣等令中道前军总管王孝杰进军平州十九日行次渔阳界昼有白鼠入营孝杰捕得笼送者身如白雪目似黄金顿目踉伏帖若无气将士同见皆谓贼降之徵臣闻鼠者坎精孽胡之象穿窃为盗凶贼之徒固合穴处野居宵行昼伏今白日归命素质伏辜天子之徵兆实先露自孝杰发後再有贼中信来不谋同词皆云尽灭病死亲离衆溃匪朝即夕臣训兵励勇敢乱侮亡昔宋剋鲜卑苍鹅入幕今圣威远振白鼠投营休兆同符实如灵契凡在将士孰不欢欣执馘献俘期在不远

为僧谢讲表

僧某言一昨预内道場讲恩勅殊獎赐有褒称死罪死罪某实颛蒙昧於至道徒以早栖真实委质香缘遂以滥越殊私光昭宠渥日者法宫闻道讲赐承恩叨玉塵之荣预金闺之议遂得对扬真会咫尺天威徒有明恩卒无幽赞不能絶王倪之问以默夸词息毗耶之言冥通得天休光被曲见称扬羣议允怀猥忘其陋顾揣涯分实膺心顏将何翼亮緇徒发挥玄极以念嘉惠忧惕惟忧载怀愚瞽而心况知愧无任惭荷之至

谢药表

臣某言伏奉中使宣勅旨赐贫道药总若干味肃恭休命敬受惭惶猥以眇身叨蒙大赖室殊方丈同问疾之荣施等医王感能仁之惠虽赭鞭神授未可比其英蕤赤斧仙图固以谢其灵气方将驻兹营魄蠲彼衰痼以要上品之经将希大年之壽人微惠重荅施何阶不胜【云云】

为乔补阙论突厥表

臣某言臣以颛蒙叨幸近侍陛下不以臣不肖特勅臣摄侍御史监护燕然西军臣自违阙庭历涉秋夏徙居边徼无尺寸之功臣识暗劣孤负圣明然臣久在边隅夙夜勤灼莫不以蕃事

为念俾按察之比以突厥离乱事迹参验委曲穷问往来窃有以得其真莫不自为鲸鲵递相吞食流离残饿莫知所归臣诚愚不识事机然窃以往古之变考验於今乃知天亡凶丑之时陛下收功之日然臣闻之难得易失者时也易遇难见者机也圣人所贵者去祸於未萌今陛下体上圣之资开太平之化匈奴为中国之患自上代所苦久矣今天降其灾以授陛下万代之业在於今时臣请以秦汉以来事迹证明之伏愿陛下少留圣听寻绎省察天下幸甚臣闻始皇之时并吞六国制有天下按剑叱咤八荒犇驰然匈奴强梁威不能服牧马河内以侵边疆始皇赫然使蒙恬将四十万衆北筑长城因以逐北取其河南之地七百余里当时燕齐海岱赢粮给费徭役烦苦人以不堪故长城未毕而閭左之戍已为其患二世而亡莫不始於事边也至汉兴高祖受命率羣雄乘利便以三十万衆窘迫白登七日被围仅而获免自是历吕太后至孝文帝单于桀骜益凌汉家文帝徒以逊词致献金帛但求其善和而已不敢有图贾谊所以哭之痛文帝以天下之盛而卑事戎狄以倒悬天下也景帝时边受其患於是汉武践阼以承六代鸿业属乎文景玄默之化海内乂安太仓之粟红腐而不可食内库之钱贯朽而不可校财力雄富士马精强忿匈奴之骄慢将报先帝之辱遂使王恢韩安国将三十万衆以马邑诱单于师出徒费竟无毫发之功於是大命六师专以开边为务首尾三十余年中国骚然大受其弊至於国用不足军兴不给租及六畜筭及船车盗贼羣兴京师起乱竟不能制单于之命一日而臣服之汉宗衰残几至覆社稷也故汉武晚年厌兵革之弊乃下哀痛之诏罢轮台之游封丞相为富民侯将以苏中国也至宣帝代罕复出师属匈奴数穷天降其祸虚闾权渠单于病死右贤王屠耆堂代立骨肉大臣自不相服又立虚闾权渠子为呼韩邪单于击杀屠耆堂诸名王贵人各自分立为五单于更相攻击以至大乱残虐死者计万亿数畜产耗减十至八九人以饥饿相燔烧以充食於是寄命无所诸名王贵人右伊秩訾且渠当户以下将兵五万稽首来降於是北方晏然靡有兵革之事直至哀平之际边人以安臣窃以此观匈奴之形察天时之变盛衰存亡之机事可见也然则匈奴不灭中国未可安卧亦明矣夫以汉祖之畧武帝之雄谋臣勇将势盛雷电穷兵黩武倾天下以事之终不能屈一王服一国宣帝承衰竭之後抚疮痍之人不敢惕然有出师之意然而未有遗矢之费而臣仆乎单于之长者其故何哉盖盛衰有时理乱有数故曰圣人修备以待时是以正天下如拾遗陛下肃恭神明德动天地今上帝降匈奴之灾孽遗陛下之良时不以此时顺天诛建大业使良时一过强敌复兴则万代为患虽後悔之亦不及矣古语曰天与不取反受其咎今天意厚矣陛下岂可违之哉臣比在同城接居延海西逼近汉南口其磧北突厥来入者莫不一一臣所委察比者归化首尾相仍携幼扶老已过数万然而疮痍羸惫皆无人色饥饿道死颇亦相继先九姓中遭大旱经今三年矣野皆赤地少有生草以此羊马死耗十至八九今所来者皆亦稍能胜致始得渡磧磧路既长又无好水草羊马因此重以死尽莫不掘野鼠食草根或自相食以活微命臣具委细问其磧北事皆异口同辞又耆老云自有九姓来未曾见此饥饿之甚今者同罗仆固都督早已伏诛为乱之元既自丧灭其余外小丑徒侵暴自贼耳本无远图多猎葛复自相讎人被涂炭逆顺相半莫知所安回鹘诸部落又与金州横相屠戮羣生无主号诉嗷嗷臣所以愿陛下建大策行远图大定北戎不劳陛下指挥之间事业可致则千载之後边鄙无虞中国之人得安枕而卧者岂不在陛下断哉且匈奴为中国患非独秦汉之间臣窃惟先圣时卫公李靖盖中国之一老臣徒藉先帝之威用妙胜之策当颉利可汗全盛之日因机逐便大破虜廷遂系其侯王裂其郡县将六十年於今矣使中国晏然斥堠不警书之唐史传之无穷至今天下谓之为神况陛下统先帝之业履至尊之位丑虜狂悖大乱边陲皇天遗陛下以鸿基

之时陛下又得复先帝之迹德之大者其何以加若失此机事以过徒使李靖竖子独成千载之名臣愚窃为陛下不取也伏见去月日勅令同城权置安北都护府以招纳亡叛扼匈奴之喉臣伏庆陛下见几於万里之外得制匈奴之上策臣闻隗嚣言汉光武见事於万里之外制敌应变未尝有遗今陛下超然神鉴远照实所谓圣明之见覩於无形也臣比住同城周观其地利又博问谙知山川者莫不悉备其地东西及北皆是大磧磧并石鹵水草不生突厥尝所大入道莫过同城今居延海泽接张掖河中间堪营田处数百千顷水草畜牧供巨万又甘州诸屯犬牙相接见所蓄粟麦积数十万田因水利种无不收运到同城甚省工费又居延河海多有鱼盐此可谓强兵用武之国也陛下若调选天下精兵采拔名将任以同城都护臣愚料之不用三万陛下大业不出数年可坐而取成臣比来看国家兴兵但循於常轨主将不选士卒不练徒知驱市人以战耳故临阵对寇未尝不先自溃散遂使夷狄乘利轻犯国威兵愈出而事愈屈盖是国家自过计於敌耳故非小丑能有异图臣窃以为陛下今日不更为之图以激励天下忠勇但欲以今日之兵今日之将冀收功於异域建业於中兴则臣之愚蒙必以为未可得也陛下即以突厥为万代之患则臣所言愿加照察若以夷狄荒服不臣小人非所敢谏臣今监领後军某等取某月即度磧去计至某日及刘敬同谨当亲按行磧计至彼已来地形及突厥灭亡之势当审虚实续以闻奏伏愿陛下省臣此章为国大计傥万有一可中者请与三事大夫熟图议之此亦万代一时也伏愿少留圣意闲暇念之天下幸甚陛下采臣刍蕘臣请执殳先驱为士卒启行横行匈奴之庭以报陛下臣死之日庶无遗恨不胜【云云】

陈拾遗集卷四

卷五

钦定四库全书

陈拾遗集卷五

唐 陈子昂 撰

碑文

昭夷子赵氏碑

昭夷子讳元亮字贞固汲人也本居河间世为大儒至祖攄尤博雅耽道隋徵入学士与同郡刘焯俱至京师补黎阳郡长始居汲焉有二子礼舆礼辕舆官至临颖县丞辕为校书郎并着名当代昭夷礼舆季子也元精冲懿有英雄之姿学不常师志在遐远年二十七褐衣游洛阳天下名流翕然宗仰羣蒙以初筮求我昭夷以玄轂发机故蓬居穷巷轩冕结辙时世议迫厄不容其高乃屈身泥蟠求禄下位为幽州宜禄尉到职逾岁默然无言唯采药弹琴咏尧舜而已州将郡守穆然承风君之道标浩如也因巡田入陇山见乌支丹穴密有潜遁之意苍龙甲申岁在大梁遭命不造发痼疾而卒时年四十九呜呼哀哉天下士人闻之知与不知莫不为之垂涕盖伤其有济世之量而无长世之年夫上德道全器无不顺中庸以降才好则偏有张也之庄无展也之道好由也之勇缅回也之仁侈宰予之言遗澹台之行务端木之智忘甯武之愚或正而不奇或达而过杂君独五味足六气和通衆贤之不兼畅羣才之大适虽不至於圣道其殆庶乎故人间言物饱其义吾尝论人事有十君得其九一不至者命也夫於戏名闻天下而不達於堂上智周万物而不适於一人也其时欤其事欤君故人云居沙门释法成嵩山道士司马子微终南山范阳卢藏用御史中丞钜鹿魏元忠监察御史吴郡陆余庆秦州长史平昌孟洗雍州司功太原王适洛州参军西河宋之问安定主簿博陵崔璩咸痛君中天鼎飪不食百代祀德故老或云以为名者德之表諡者行之迹君囊括世道位屯时艰困乎艱脆光景不耀乃共稽陟旧行考諡定名问於元蓍象曰明夷于昭夷昔叹才位不兼大运有数常哀时命而作颂云诸公以余从君之游最久故秉翰参详叙其颂曰

天道宏运兮物各有时匪时不生兮匪运不成昔者元精回濇阳九滔灾大人感生尧禹恢能陰阳既和玄帝传家五百数终杰骖暴邪子乙提运水火革明匪贤不昌尹乃阿衡六百运徂受始淫狂西伯考元历在躬昌匪雄不决匪谋不臧姜牙皓首实逢其良投钧指挥奄有八荒周有天下七百余年太公之後不闻大贤岂无仲尼负道周旋无势一挈无土一?然则大运之所来时哉时哉时隘业隘运巨功巨苟非其时草木为伍昭夷作颂尔又尝着汲人默记言变化之事且曰清尔灵龟永宴息乎浩初

临邛县令封君遗爱碑

叙曰苍生蚩蚩其动也直盖颡蒙乎圣人浩浩其汲也【汲也下疑有脱误】教务王皇中乎则时至其理道之君公弼其机驭之师之非能骏尊上帝保义黎元虽则荷天之宠析人之爵行其礼乐骤覩於中和裕其廉平载闻於謡颂我之遗爱者不从事於是耶尝试论之公名某字某渤海蓀人也昔后稷有德於邠文王受图於镐珍符册命始自於西周珪社建侯奄荒於东土裘鼎轩冕有家代焉曾祖子绣齐颖渤海三郡太守霍州刺史隋通直郎通州刺史荣分麾盖道遇循良时雨洽於齐陈惠风被於唐楚祖德为北齐著作郎隋扶风郡南阳县令芸局覩奥见天下之图石柱闻琴知君子之化父安壽皇朝尚衣直长怀州司马亳州刺史湖州刺史良二千石闻乎共理之尊肇十二州策多刺举之首公则使君第某子也冲和诞命光大含章实公侯之子孙有山河之气象明不外饰默昭於玄机敏实内融养蒙於用晦故其廉不直物恕必由衷崇善足以利仁自强足以从事有朋友之信焉有闺门之肃焉非夫恭人其孰能景行行之者也年始若干为国子生言从太学之游以观先王之道某年以明经擢第解褐守恒州参军秩满补许州司法参军许惟旧国陈实多巫君子丰明利用乎狱载以课最累加秩焉又转洛州司兵参军藁台悦服一旦成市非利器者政以多荒公实佐之官无留事信矣乎能其理者有其任济其业者享其功我岂蒙求勿思其理某年选补临邛县令夫蜀都天府之国金城铁冶而俗以财雄弋猎田池而士多豪侈此邦之政旧难其人公按轡清途下车而宰览其謡俗永叹於良图想其风流慨然於惠化以为太上之理因人者也通变之机随时者也必使无讼不亦由吾用乎利贞夫何在物於是谋其教令肃其仪刑敬其事以顺其人正其闻以利其义以为昔者圣人之务本也在于稼穡有稼穡然後可以养人故公之劝人也用天之道分地之利以为昔者圣人之利用也实在财货有财货然後可以聚人故公之化居也贸迁有无和其衆寡以为昔者圣人之事生也谨其制度然後可以富故公之节用也饮食有节车服有数以为昔者圣人之事死也慎其丧祭有丧祭然後可以睦人故公之送死也葬之以礼祭之以礼以为昔者圣人之用狱也崇其法制有法制然後可以禁人故公之恤刑也唯齐非齐有伦有要夫如是者岂苟其利哉惟欲洁乎其源正乎其本慎之於谋始要之於用终将使敎■〈襄攵〉矫?由是以息孤寡不穀由是以宁者哉夫然後磨之以仁琢之以义使男女异路班白不提熙乎其若春肃乎其若神然後文以礼乐以几于淳朴道岂远乎呜呼旻天不悦降此荼毒某年以太夫人忧去职于时公之莅始逾年矣然一载考绩是用未成百姓哀惶人吏嗟怨咸云我父矣而人悴矣乡望老人前某官等五百余人或金堤之秀玉宇之英而服美於寛允严祇於教义遂走之州府诉之上官冀夺其哀摧礼终秩不谋而同者日有百数司马元公帝王之胤也康歌协化盛德在人悯烝庶之求思嘉我君之懿绩以为古之借寇者何以踰是哉遂用畴咨旧章允怀毗诵夺之公礼上之於文昌台非将协赞天工慰彼黎庶君子之教而日见之哉班白之老胥吏之徒又以天子在宸勤毖孝理我君云迈谁其嗣之千余人复连表诣阙投匭乞君以墨綬从事遑遑焉若有望而未至也郁陶增思寤寐永叹将欲思谟不朽想见懿德乃相与言曰昔者君子思其人而爱其树蒙其泽则歌其诗封君之仁我无金石乎又述其行状访余以铭勒之事县丞等有弼谐之美刀笔之能永思清风叹息仁化尉安定梁慎盈知名之士也墨妙几於草圣文义总於辞雄昔仕京畿左迁此职自以为赞封君之化有日矣承封君之德有年矣夫其忠信之教寛猛之机古之官人君其殆庶乎父老之请允矣余竭来旧国传?其实恭闻其去思而亲覩其遗爱余所备者敢博斯文犹惧後生有言以为口

实河东薛稷隋内史公之孙也文章之伯而时所宗故凭其实录寄之为颂其词曰

天地之间有渤海焉伯宗伯谷神山在焉精气飞腾生良宰焉良宰寔生代禄代卿君達好遗
风云上征武兴察孝州郡有声陈其弓冶戴其簪纓筮仕斯邑我龟观贞深期高悟絕策远明
既至肃肃其来英英临事若祭视人如嬰三农慙用折狱以情轻重共用谷货以平我裳既裘
我簋斯盈於惟我君张仲孝友家膺五福堂享三壽温清不违喜惧无守枯鱼衔索疾风过牖
匪降自天谁执其咎棘心劬劳匪莪伊蒿彼苍不吊惟其永号借寇为请惠此嗷嗷曾是奔告
谓天盖高昇仙桥下赤车使者客於临邛文雅雍容观风万里谒帝九重嗟嗟其旧椎牛击钟
问於子墨借翰雕龙专思君兮不返伐石登山山高兮望远怀车马於言告欲弦歌於言偃人
寔去思我无愧词

续唐故中岳体玄先生潘尊师碑颂并序

尊师业尚冲密勤愍幽深理心事天所保惟嗇絕圣弃智不耀其光故真盛冥期珍图秘学性
与天道不可得而闻也若乃崇标旷迹遐情远意志摩青云蓬视紫闕高宗每降銮輦亲诣精
庐尊师身不下堂接手而已每叹曰大丈夫业於道不能投身霄岭灭景云林而疲痼此山以
烦世主吾之过也遂欲东求蓬莱孤舟入海属天皇敦笃斯道祈欸逾深踟蹰山隅絕策未往
既而金革有命鑣轡遗区於戏昔姑射有神人尧轻天下崆峒有至道轩屈顺风玄冥高踪万
古同德何其盛哉尊师有弟子十人并仙塋之秀然鸾姿凤骨眇爱云松者惟颍川韩法昭河
内司马子微皆稟训瑶庭密受琼室专太清之业遗下仙之俦谷汲芝耕服勤於我盖历岁纪
也始尊师受籙於茅山昇玄王君王君受道於华阳隐君陶公陶公至子微二百岁矣而玄标
仙骨雅似华阳夫阶真蹈冥练景游化者其必有类乎法昭等永惟尊师灵迹洞业高深迈古
而弃世往矣其若之何乃斲石幽山申颂玄德其颂曰

观元化兮求古之列仙得瑶图与金鼎信元符之自然神与道而惟一天与人兮相连苟精守
以专密必驾景而凌烟丹丘不死兮羨门弟子黄宫度世兮吾体吾玄体玄之至德兮洵淑美
冲心养和宝元始初学茅山济江水乃入华阳洞天里道逢真人昇玄子授以宝书青台旨令
守崧山玉女峯云栖穷林今五纪圣人以万几为贵而我以天下为累圣人以大尊为尊而我
以天下为烦是以冥居於畏垒寄遗迹於轩辕有唐高宗兮天子之光好道乐仙思云乡千旌
万骑兮翠凤凰邀我汝海兮箕山阳朝拜白茅夕紫房斋心洁意缅相望祈问玉真及玉皇何
以得之受天昌黄庭中人在子身窅窅冥冥精【一作情】甚真去汝骄气与淫神勤能思之
道自亲遂解形而遗世乘白云以上宾弟子不知其所如也乃刻石以思其人

汉州雒县令张君吏人颂德碑并序

至哉天子在穆清之中端玄默之化万国日见百姓以亲谁其昭宣令长其任也然则国有小
大政有污隆遭其和平则循理之功易值其凋瘵则革弊之业难况罹乎荐瘥救其涂炭力倍
於中而功不半之则尽其仁而泽未全洽惟我府君当钦明之世承苛慝之烬辑頽靡之余遂
能抚宁矜残淳耀敦懿改制立宪昭德显仁奇迹光乎曩贤惠风穆於兹日我行千里而得一

贤传曰夫用我者而岂徒哉府君姓张氏名知古盖汉少傅留侯之裔也昔留侯得沧海力士东执於秦遇黄石老人西归於汉山河钟鼎子孙保之世在关中今为宜州人也高祖艺周恒州司马曾祖欢隋许州司马祖雄唐并州榆次令考琳原州平原令皆稟瑚琏之器着经济之才大位不跻元德滋茂其昭祉复袭於我府君府君体英奇之姿冲希默之量齐敏内肃端简外融夫其孝友睦婣研几成务深断守节之固拨烦简要之能在於家邦闻其政矣起家补同州朝邑尉历大州郑县尉左金吾卫仓曹参军洛州洛阳主簿黄图左翊豪侠所凑赤墀佐理寔赖其能又迁雍州明堂县丞时皇帝恭默明台清问下吏西南矜寡有词上官曰刺史沓贪而苛县令威施而忍奸宄因衅羣行斂■〈襄文〉哀哉毗黎颠在荼毒朝廷悯之帝曰俞允哉乃用勅抚此荒邑噫嘻昔者苛政未作封境保安兹都冲要襟带全蜀百濮兼错万裔之泉宝利珍货尽四海矣殄残猛肆至蠹贼内讷始於硕鼠之侵终屠饿狼之喙杼轴既尽郛邑殆空悲夫仲尼云苛政虐於猛虎岂猛虎而已哉我府君殷然始宣皇明恭职事巡省黄发周爰令图所以绥亡固存蠲虐去暴与百姓更始者與人斐然乃作诵曰我有圣帝无令君遭暴昏桷惇寡纷民户流散日月曛君去来兮惠我仁百姓苏矣见阳春然不躬不亲庶民不信於是府君知人散久矣黷於诈罔已曰未遂躬六曹之务先五美之训下官斂手牟食革心人始翕如也初官户在版图者万有五千余家历政侵残逃者过半岁月永久庐井湮芜蠹蛸在堂蟋蟀空叹先是有勅天下逃人归复旧业者免当年租庸公以柔远能迓政之大端乃下令曰於戏天子诚悯斯人是用命我其讫有济若逋不及惠幽不能明吾之罪人部内有逃越他境能相率归者免一岁租及征徭若惇嫠贫窶不能自济者当别议优之其长正耆老可明喻此诚使被幽谷令既下克已示信或有逃者引首而归公亲循寧慰贍理其业於是小大悦赉远近承风四封诸道一朝景附夫负妻父戴子荷蓑提笠首尾郊郭者凡七千余家熙乎若鸿鴈之得春也既至矣则劳来之既止矣则安辑之或三年或十年旧馆已无乔木犹在公葺屋涂室薶陌开阡为其井疆人得其居矣田畯失业农野榛荒此邦膏腴利在江浸有金鴈白鱼二水是其朝云泽麓无虞沟畛填塞公濬其涂洫川浚始通人得就畊矣流亡初复贫窶兼半食不餬口力未贍农公又假富资贫耦耕分种助其銍刈岁以有年人得其食矣曩者征税横斂商旅不行贸迁有无?肆半絕公阜其货财交易复通日中噬嗑人得其利矣乃种树畜牧蚕鱼工贾什伯之器车服之庸婚姻之时丧祭之礼莫不尽为度数制其权衡征赋既均千室如一於是百姓允赖鼓舞而歌其歌诗凡六章题曰逃还乐其首章盖言天子之德也其二章悯前政之虐也其三章喜公惠之至也其四章言逃还之乐也其五章美公化行而奸慝不兴也其六章善政令平均赋斂不淫也时日月会於龙脰岁功成平孟冬百嘉备烝品物咸乂府君乃稽版籍考幽明亲巡乎邦庠存问乎鰥耄黄耆稚齿山原之民乃接手賡歌迎拥马首累乎道路者以百千辈昼肆酒夜聯烛羣舞蹈咏迎途饯郊皆歌前六章庆公惠也是以封内欢康境外萌动企仰德美有若神明府君尝因公事至成都成都之民驾肩相瞩盖籍甚其异也封人有丧者庐于墓侧鞠然在疚负土成坟公亲从寮吏吊其苦蓆自是礼让行焉学校兴焉长史河南窦公旌别尚贤廉简居政以公甄理颓弊跻美中和历政逋亡一朝狎至遂表其状奏之於阙庭属獯鬻孔亟戎车未暇郊垒既夷邦宪清穆刺史南阳张公幘帟卧理寛猛以济儒术兼优吏畏独坐人歌来暮甄综品鉴物无遗才又以公保邦乂民胜残去杀重理前秩昇闻宸扆夫昇闻者岂循良而已哉盖激清励贪聳善惩恶祈元嘉命优公宠章於是乡髦邦彦华发皓首或名淹玉垒家擅铜山如王弘马靖等若干人皆以政治仁显功着颂宣扬金帛嘉祉不日而至至则国肥矣去则民瘠矣凡我邦族其将畴依兄弟睦亲不可以从往也筐篚玉帛不足

以永贖也隔千里而不昧与百姓而长存非刻金石列图象扬弘懿崇耿光则顯然衆情孰克慰滿於是乃从旅嶠巖自金水之山得玉玫之石农夫田妇担扛力运皆惧公往遗像莫瞻共琢之磨之议之谋之子昂时因归寧采药岐岭父老乃载酒邀诸途论府君之深仁访生祠之故事永我以典礼博我以文章夫千里一贤义者所贵今百城一理公独有之不熙其烈光以示当世则孱弱者胡以激节贪垢者曷以悛心敢因此义及毗謡而作颂曰【阙】

九陇县独孤丞遗爱碑

彭州九陇县丞独孤君有恭懿之行果毅之才临官以庄敬事而信清名苦节勤恪励躬廉而不矜利以不浼有特立之操焉在位四年无一日自倦精专力务泽潜气通天彭之人陶然大化居秩岁满单车告归邦思其仁国咏遗爱乃树碑刻石追崇厥庸既颂叹之又思福之以金仙世尊慈善万物遂贡金铸像祈祉冥休悠悠之人至今称赖夫官不必贵政惟其才独孤丞上迫宰君下杂羣尉文墨教令不专在躬然力行务仁推诚爱物讴吟者不歌其宰颂议者必归於丞岂欺也哉吾每闻一言可以永宁天下者在能官人而已苟谬其任纲维以颓感独孤丞智效一乡惠孚百里况其大者乎於戏官人哉乃作颂曰

於维国家建官以理得人则盛匪人则圯英英我君清节素履恭寬敏惠将顺其美礼实在躬人以知耻岁秩其暮薄言归止祁祁吏人何嗟及矣涕恋沱若遗爱罔已瞻德树碑造真祈祉不有其惠孰能享此悠悠彭门千载有纪

唐故朝议大夫梓州长史杨府君碑

君讳越字复珪弘农仙掌人也其先帝高辛氏之裔周有天下晋受其封至宣公伯乔早基杨国若乃彤弓旅矢巨鬯赤苒则礼命之乐歌之崇天王之宠光保元侯之休祉其後十六代有杨宝者天锡黄鸟授以白环若曰命君子孙世登三事迨震秉赐彪四代五公烈光昭於汉室盛德充於海内金圭铭鼎至今为弘农世家也高祖椿魏尚书右仆射开府仪同三司司徒公进位太保加侍中给後部鼓吹致仕归邑赐安车驷马传制二人可谓国之元老帝之师臣功成名遂社稷之宝曾祖思善齐通直散骑常侍祖敬通镇远将军郑州治中邛州别驾父居同隋蒲州芮城县令皆国书旧史列于名节公即芮城府君之第二子也少而冲嶷苦节贞素家无玉帛室有琴书闻少连之风而悦之庶乎身中权行中清上以察乎道下以敦乎物不应州郡之命而有金玉之心尝叹曰以明月珠弹千仞雀吾不能也於是观宝龟之象心灭朶颐探金虎之爻志存幽履遂去家遁於嵩山经十余年丹山白云之志眇然矣属太宗文武圣皇帝初临天下物色幽人焚山榜道网罗遗逸君子若曰天下有道可以见矣於是始以角巾应命褐衣诣阙陈大道之宏誉论至公於天下帝曰俞尔言乃可底行若岁大旱用汝作霖雨今南山近塞北汉连胡石州边烽皇化未谥汝往钦哉辑乃人御乃敌以息匈奴之患始解褐授石州方山令樽俎在堂干旄在阶布大信於獯戎示折冲於衽席威名震曜乃昇闻也有勅授宪台监察御史绣衣始拜珥笔昇朝台阁以之生风豪贵由是敛手又勅直中书待制未几又迁秘书郎直中书省如故游凤凰之池观蓬莱之府是天下之荣践也又转宗正寺丞岁余帝思南史之才将崇东观之美又迁起居郎加骑都尉龙朔中天子将观兵於东夷以复先帝之业

凡居中者多出守旁郡是岁授公朝散大夫除冀州司马又转魏州司马同知州事於时天下雌韩而雄魏壮武而柔文公始厌承明初临外郡探究至面犯禁崇奸欲尝朱博之能以观龚遂之政公深钩潜往英机立断短服赭裾於是乎理麟德初兼梓州长史盖在华之南区彭之北鄙人豪俗侈政削公腴攢六国之遗昵杂三巴之奥壤公下车问俗观风立政先之礼让教以诗书抑浮羸禁蠹食至於堂叩钟磬家擅山川莫不为之节制行其典礼来暮之颂复起於斯时高宗大帝方接千载之统昇中泰山玉帛云趋朝者万国公预陪金蹕侍拜瑶坛白云既封皇庆斯洽加朝散大夫余官如故东山拜命西驾未归逢太岁之临辰感殷楹之梦奠遇疾薨於官舍时年六十四呜呼哀哉遗令薄葬不藏珠玉惟孝经一卷尧典一篇昭後嗣不忘圣道即以某年月日葬於西岳习仙乡登仙里之西麓遵遗命也嗣子嘉宾等哀号泣血柴骨殯心緬惟罔极之恩思崇永锡之道以为吾丘子没无助冥因季由兴叹空勤负米於是考羣圣之典探衆妙之门求所以昭报幽局赞祉冥籍则云金仙慈救宝手来迎若德崇於此则功济於彼是用归诚真谛祈佑能仁箝铁围而写容现金莲而得像遂於登仙麓莹之侧造阿弥陀像一躯坐高三丈并象变菩萨天人毕备全金涌出衆宝庄严云仙鬼神周罗上界珠幡羽盖围绕香林所以丕显尊灵光昭惠业達人之能事毕矣孝子之事亲终矣铭曰岩岩太岳洸洸长河歎云滃雾含灵仁和杨侯之国宛其中阿子孙瓜瓞轩盖骈罗

四代五公自于伯起蝉聯彪懿令闻不已二十户侯三十刺史世济其荣至我君子
戕戕君子皎有令光不宠我组而括我囊洗心岩遁抗迹云翔冥鸿不远白驹在场
解其萝袂绾我墨职边徼多虞猓狁孔棘之子之往允威允德干旄在阶烽火罢色
行行骏马绣衣之光烈烈董狐司史之良而我君子總其徽章出同严助政穆王祥
雄魏既康鄴蜀犹侈揽轡言迈题輿载理尺兵允戢乱绳攸靡天子登封拜服玉趾 大礼既毕
归路迟迟岁亦秋止天不慙遗呜呼毗吏号泣涟洏曷其往矣来暮歌思??孤子棘心哀疚永
号昊天眇泣冥佑莲花之国金池玉溜崇此香缘生彼穠秀
全金既涌衆宝斯庄考坟其左叔莹其傍香花围绕松栢成行千秋万岁祚祉无疆

梓州射洪县武东山故居士陈君碑

君讳嗣字弘嗣其先陈国人也汉末沦丧八代祖祇自汝南仕蜀为尚书令其後蜀为晋所灭子孙避晋不仕居涪南武东山与唐胡白赵五姓置立新城郡部制二县而四姓宗之世为郡长萧齐之末有太平者兄弟三人为郡豪杰梁武帝受禅网罗英豪拜太平为新城郡守寻加本州别驾弟太乐太蒙蒙为黎州长史都督护南梁二郡太守乐为本郡司马即君之高祖父也生曾祖方庆好道不乐为仕得墨子五行秘书而隱於武东山生烈祖汤仕郡为主簿遇梁季丧乱避世不仕生皇考广迴迴早卒君即迴之第二子也少孤而有纯德恭已饰行一日三省家世本以清白崇德迨君之孤素业空矣君有二兄养母以孝君顺至行同勤苦节夏不避暑冬不避寒蒸蒸服事行年四十有五入则孝出则弟谨而信泛爱衆而亲仁无余力也以是不忧於道逮亲终歿春秋已高从事不可以养矣乃辍干禄之学修养生之道山壑高居农野永岁雅闻汉有王丹者隐居不仕家累千金以自奉田稼勤者载酒肴从乡里承化以相惩沮乃叹曰彼王丹者是为政矣奚其为为政也由是始考林泽辟良田习山书务农政天道时变地道化成丘陵泉藪星岁云物靡不用心也原田莓莓粳黍稷稷汶阳之稼如云矣春日载华岁聿其秋白露时降百谷收熟君常乘乎肩輿省农夫馈田畯刑以肃惰悦以劳勩若孙吴之

用兵鸷鸟之搏击也卓彼硕田岁取十千仓库寔崇礼节恤惇寡赈穷乏九族以亲之乡党以欢之居十余年家累千金矣其邻国有媮衣食带刀剑椎埋胠篋之类鬪鷄走狗之豪莫不靡下风驯雅素曰里有仁焉吾何从也遂黜浮瀛之行肃恭俭之节修孝悌饰廉耻将欲效君之素业也时年已耳顺素无经世之情林园遗老玄默忘岁遂保先君武东山之故居行不由径非公事未尝至於州县也昔襄阳有龐德公谷口有郑子真东海王霸西山吕才皆避世之人养德退耕以求志轩冕不可得而羈忧患不可得而累逮於我君作者五人矣於戏古者至人不利苟得而不务近贵量腹而食度身而衣非其道万鍾不足丰也非其荣五鼎不足餌也躬勤耕稼植其杖而耘不答子路之问者岂我君之徒与绵绵罗网冥冥高鸿趯趯竹竿穆穆幽龙其与祸败之辽絕胡越哉然则两龚不免於兰焚二老不免於薇叹其近贵利耶夫上无忧悔下无饥寒含道以制嗜慾達命以顺生死仁以爱身智以养德俾尔耆而艾俾尔昌而炽君子保之以永壽考非我君者乎享年八十有五太岁壬辰五月十三考终厥命临终戒曰启予足启予手我闻古人有言珠玉而瘞之是暴骸於中原也古者不封不树後世圣人易之以棺槨吾不敢违圣人可具棺槨而已斂以常服坟无丘壠吾将庶几以奉先人之情也有子某等皆能祇奉遗训聿从先志长壽二年龙集癸巳某月某日载踰卜兆时吉始启殡昭告奉迁於旧莹武东山之阳礼也乡里会葬者千余人皆涕泣号慕悲纯德之不见咸曰君子没矣仁何以名陵谷不朽匪惟颂声小子不敏谨述乡人之教词曰肃肃我祖国始於陈中裔沦丧泊此江滨山川隆郁旗鼎氛氲生我君子於铄元真性孝肃悌惟仁善邻乐我耕稼忘我缙绅茫茫田藪岁也其春农人肃事君子犒勤孰为夫子植杖而耘弋者何慕鸿飞高云楚狂惧世夷叔求仁良图终矣不考于身我异於是非隐非沦抚化随运安排屈伸天年既没长夜何辰圣達不免宇宙同尘桐棺三寸岂我婁贫自古有礼吾从圣人嗟尔百代子子孙孙骄奢自咎天道无亲思我松柏恭俭是遵

陈拾遗集卷五

卷六

<集部,别集类,汉至五代,陈拾遗集>

钦定四库全书

陈拾遗集卷六

唐 陈子昂 撰

志铭

府君有周文林郎陈公墓志文

公讳元敬字某其先陈国人也五世祖太乐梁大同中为新城郡司马生高祖方庆方庆好道德墨子五行秘书白虎七变法隐於郡武东山生曾祖汤汤为郡主簿汤生祖通通早卒生皇考辩为郡豪杰公河目海口鸷颌虎头性英雄而志尚玄默羣书秘学无所不览年弱冠早为州间所服耆老童幼见之若大宾二十二乡贡明经擢第拜文林郎属忧艰不仕潜道育德穆其清风邦人驯致如衆鸟之从凤也时有决讼不取州郡之命而信公之言四方豪杰望风景附朝庭闻名或以君为西南大豪不知深慈恭懿敬让以为德也州将县长时或陈议青龙癸未唐历云微公乃山栖絶谷放息人事饵云母以怡其神居十八年玄图天象无所不达尝宴然坐谓其嗣子子昂曰吾幽观大运贤圣生有萌芽时发乃茂不可智力图也气同万里而遇合不同造膝而悖古之合者百无一焉呜呼昔尧与舜合舜与禹合天下得之四百余年汤与伊尹合天下归之五百年文王与太公合天下顺之四百年幽厉版荡天纪乱也贤圣不相逢老聃仲尼沦溺溷世不能自昌故有国者享年不永弥四百余年战国如糜至於赤龙之兴四百年天纪复乱羣雄奔突贤圣沦亡至於今四百年矣天意其将复周乎於戏吾老矣汝其志之太岁巳亥年七十有四七月七日巳未隐化於私馆孤子子昂愚昧鞠然在疚不知所从乃祗驯圣人卜宅之义是岁十月巳酉遂开拭旧莹奉寧神於此山石佛谷之中岗也铭曰

贤者避地邈其往兮凤兮凤兮谁能象兮呜呼我君怀宝不试孰知其深广兮悠悠白云自怡养兮大运不齐贤圣罔象兮南山四君不遭汉天子固亦商丘之遗壤兮

申州司马王府君墓志

君讳某字某先太原人也昔周文王有圣人之德甲子受图至我灵王诞膺丕显太子晋得凤凰之瑞恭揖羣后上为帝宾绵绵生人作我王氏迨秦有赧剪并吞诸侯晋有浑祥功格帝室魏至慧龙为贵种矣十二代祖卓晋常山公主子也始公主汤沐邑在汾陰永嘉沦夷不及南

度因树粉櫨而结庐焉卒葬於长寿原至今乡有太原之号也曾祖亮周开府仪同上大将军
隋信州刺史罽俎之师也祖俭隋离石郡守唐石州刺史赠岳州总管广武烈侯社稷之器也
父谌唐虞部郎中荆州大都督府司马商壁鄜许冀五州刺史加银青光禄大夫泸州都督金
水敏侯上柱国廊庙之才也敏侯有功於国始赐土田白茅苴之在鄂之曲因食采今为雍州
人君即敏侯之元子炳灵珍粹辉采幽黄愿而以恭寬而以栗青衿闻道已光大矣天子立大
学所以养贤公子齿上庠所以观国君休烈渊塞志业云翔年若干为国子生其中射策甲科
解褐补吴府参军事昔吴王帝之爱子国选英寮君三德允章六行既穆与某郡刘孝孙首光
此举诵诗三百和淑其仁而醴酒不恭楚筵亦废坐除滑州録事参军又转陇州録事参军时
乐城公刘仁轨以宰相之贵持节此州暖然推中主诺责下君提纲未几羣辖载孚公坐啸以
为能也举迁汾州平遥县令其地有台骀之怪蟋蟀之人君黄鼎介中鸣琴不下钟鼓既考风
俗允和帝曰良哉而格我政加朝散大夫迁岐州扶风县令昔尹翁归以文武之干缉熙此邦
黄图虽寧赤丸未义君以庚断甲距设甌投鉤赭裾始绳丕面咸革丁我敏侯艰遂茹哀苦庐
衾恤终纪是岁申国不理元寮仁才制加朝请大夫授申州司马属太夫人有羸老之疾去官
不之白华增勤彩衣是慕至於朝盥夕膳候色承欢夔夔斋栗蒸?不匱有若楚老莱子之为婴
儿也呜呼昊天不吊降我鞠凶太夫人以眉寿薨时君年已七十二矣礼以饮酒而君絶浆虞
以降哀而君泣血??在疚栾棘其心新谷未升匪莪以殞以某年青龙癸巳薨於某里第之正
寝孝之终也呜呼哀哉昔圣人五十而慕先子谓之至德今君七十二而尽其哀非敦笃允元
深仁淑德者畴能离此哉夫人弘农杨氏隋内史侍郎舟川公演之孙女也幼有淑德而美令
仪采繁昭华穠荷比秀至於内严闾训外匡君子麟趾以穆鷄鸣有章诚道暎公宫事宣彤管
晚年以儒因未究冥业惟深遂揭无生之筌将遗有漏之屣颺洁道行受莲花经理极翻三心
灭不二形妄缘尽归真化冥岁在丁酉处顺而往始我府君以悬车之岁从负米之勤夫人亦
能肃恭晨昏严祇左右夫至行莫大於孝崇义莫显乎忠君克勤於家尽力於国刑於妻子至
於朝廷夫矜而不与物或有违广而无适义所以比君好谦達礼研几成务摹其法器无不驯
从其事政无不理夫用我者而岂徒哉嗟乎矜而能廉利而不浼百行允备三事不阶臧文仲
其窃位与柳下惠其直道与有子四人长曰某官至武连县令先公而卒次子某等皆肃奉严
训景行高山達於家邦光於礼乐永号罔极泣血昊天始府君临终遗令薄葬墨龟未食青乌
不封权殡於某所需吉兆也龙集已亥律躔应鍾金鷄鸣玉狗吠黄腸密启丹旌徐飞始迁神
於某原之阳礼也青龙在左朱凤居右双衾共封二室同穴珠玉不瘞丘陇谁传刻此金石以
旌後贤

唐水衡监丞李府君墓志铭

君讳某字某赵国人也乃昔嬴楚睽孤豪杰云起广武君负霸王之畧为成安之师实欲北兴
帝基南面称创雄图未展大运陵颓传云有明德当代不显其後必有昌者自武至君二十四
代矣公侯宝玉刻鼎铭钟纷纶葳蕤世济不泯六代祖孝伯後魏部尚书秦州都督宣城公魏
之名臣载在青史曾祖某後周陕州芮城县令祖某属隋运版荡君子道消逊言遁时不显於
仕拜儒林郎父某唐隆州苍溪县丞襄州荆山县尉有高才而无贵仕君鍾常山之气炳漳水
之灵少尚名节躬行仁义始入太学以精理见知未几进士高第拜白水县尉寻转云阳尉屈
青云之资从黄绶之任虽吏道迫屑而遐情眇然秩满调补洛阳尉盘根利器尹守拭目迁怀

州司法禄不徇荣位以行道雅尚贞逊与衆趋少合泊上闻对策甲科授益州大都督府録事参军满岁擢授水衡监丞君所居清澹仁惠为政识真之士以公辅许之而好学笃道介如石焉故位不充量缙绅高其才烈士伏其义竟不能骧首云路长鸣天衢知与不知咸皆共叹有余恨也而君浩然冥顺独与化游方将幽采玄微精核通变天命不佑春秋若干遘疾终於官某岁某月安厝於某所礼也呜呼古所谓歿而不朽者有矣夫遗言余旨粲然可观有子曰某痛门风之将泯惧世业之罔传乃刊石纪德铭旌之曰

常山之灵和氏之英世有明德鍾此令名黃黻不貴拱璧为轻仕以弘道禄匪徇荣高志厉云思机入冥呜呼天乎殲我国桢

唐故循州司马申国公高君墓志

君讳某字某渤海蓀人也昔周天子命我太公受封东海钟鼎宝玉七百年故其公侯世有国祀曾祖勵字敬德北齐朔州太行台仆射袭爵清河王改封乐安王周授开府隋授扬楚洮三州刺史我唐有命崇宠典章贞观初贈恒定并赵四州刺史垂拱中又贈特进非明德上公孰享之哉祖宗俭字士廉皇朝太子太傅上柱国申国公食邑三千户贈司徒并州刺史永徽初贈太尉配享太宗文皇帝朝廷諡曰文献昔帝光天下公实佐之至是元勋克配清庙父慤字履行秦府军直千牛滑州刺史将作大匠金紫光禄大夫太常卿洪州都督上柱国申国公尚东阳长公主驸马都尉衣冠礼乐尽在是矣故帝乙归妹尚於中行公则驸马之元子也含章丹穴籍宠黄扉承礼训於公庭尽仪刑於士则年若干嗣封申国公十四解巾授千牛备身趋奉紫璋已有光矣秩满补海盐府左果毅都尉再迁游擊将军右帅府郎将遂昇荣禁卫承宠司阶千庐之务式遵八舍之荣攸袭又授朝散大夫尚辇奉御再迁尚衣奉御属宸宫构难巫蛊祸兴坐堂弟岐左迁循州司马苍梧南极桂海东浮是唯篁竹之区而有山夷之患永隆二年有盜攻南海广州边鄙被其灾皇帝哀洛越之人罹其凶害以公名家之子才足理戎廼命专征且令招讨【一作诗】公奉天子威令以喻越人越人来苏日有千计公乃惟南蛮不讨之日久矣国有大命将布远方欲巡御象林观兵海裔彼苍不吊夭我良图因追寇至广州遇疾薨於南海之旅次时年若干呜呼哀哉珠鼎之秀邦国之光负才能重书劒方将克崇旧业祇宠前人降年不长永坠厥绪呜呼哀哉夫人京兆韦氏银青光禄大夫太子詹事武阳侯琨之第某女也有淑慎之德窈窕之贤长於公宫少习妇道年十六归於申国凤台尊閤鹊巢斯在虽珠玉翡翠职是其仪而澣濯苹蘩不改其操故我君子琴瑟友之年三十仪凤二年先公而歿其年权殡先莹呜呼哀哉始公之适南裔也夫人逝矣死生言别永怀燕越之悲旌旒同归终沦松柏之路先是公有命合葬弘道岁灵櫟自南海还嗣子绍等追惟永终仰遵先志粤载初元年岁在摄提格始昭啓亡灵改卜迁祔某月日遂合葬於少陵原礼也呜呼哀哉霸山南望秦川满目紫台钟鼓方对於青春白杨丘陵独悲於玄夜绍等以东西之人惧冈陵之变古不树今则坟焉

率府録事孙君墓志铭【并序】

呜呼君讳?礼字过庭有唐之人也幼尚孝悌不及学文长而闻道不及从事禄值凶孽之灾四

十见君遭谗慝之议忠信实显而代不能明仁义实勤而物莫之贵陞厄贫病契濶良时养心恬然不染物累独考性命之理庶几天人之际将期老有述死且不朽宠荣之事於我何有哉志竟不遂遇暴疾卒於洛阳植业里之客舍时年若干呜呼天道岂欺也哉而所志卒不与其遂能无恸乎铭曰

嗟嗟孙生见尔迹不知尔灵天竟不遂子愿俾运用无成呜呼苍天吾欲诉夫幽明

故宣议郎骑都尉行曹州离狐县丞高府君墓志铭

君讳某字某先渤海蓼人也因仕居洛今为阳翟人昔赭鞭乘运袭炎帝之宗苍光应期承太公之?崇勋霸业光烈犹存曾祖某北齐太子中舍人赠冀州刺史青宫近侍光宠朝班皂盖追荣恩崇国礼祖钦仁隋左亲卫大都督检校秘书郎带七尺劒始游天子之阶持三寸笔终入芸香之阁父柚唐江州浔阳县令舒州怀寧县令弦歌之化身不下堂神明之威虫蝗避境君即怀寧府君之长子黄河一直青松万仞性惟仁孝行实温恭文义必以润身名节由其狗物唐龙朔元年有制举忠鯁君对策及第试守永州湘源县尉位卑黄绶志在清?秩满以常调补凤州黄花县丞梁竦长怀尚劳州县桓谭不乐空负琴书又转易州遂城县丞以管辂之材从赵典之任古人斯在君子居之大周革命任曹州离狐县丞春秋已高日月方出武尽美矣不得夷齐之臣文哉郁乎自邈夏商之道於是因阶秩满告老归闲闭郊扉於南野习岩居於东涧诗书琴酒以观先达之风山水丘园将为遗老之赏天授二年岁在单阏七月二十日考终厥命卒於陆浑县明高之山庄时年七十有二呜呼哀哉君雅尚节义素履元亨怀古人之远图慕先贤之遗烈以为桓魋石椁非则於礼经墨翟桐棺实宜於圣典遗令薄葬务取随时即以其年十月葬於北邙山平乐之原礼也嗣子思恭孝思罔极丧制过哀思封树而缅怀恐东西而不志白楸为椁爰遵古葬之仪丹漆题封即表永年之记铭曰

泱泱大风其太公兮穆穆君子绍厥宗兮忠鯁察廉仕汉宫兮高才位卑命考终兮哀哀孤子号苍穹兮归葬平陵栢松桐兮

唐故袁州参军李府君妻清河张氏墓志铭

夫人清河郡东武人也昔轩辕锡胤弧矢崇威畏其神者三百年得其姓者十四族金貂七叶汉天子之忠臣鼎足三公晋武皇之名相孤卿玉帛世有其庸曾祖某北齐太常卿徐兖二州刺史天人之礼位掌於秩宗侯伯之尊宠优於露冕祖某隋汾阴寿春阳城三县令袭公侯之瑞屈铜墨之班士元非百里之才太丘有三台之望父某唐户部侍郎复毫建三州刺史尚书北斗始赞於南宫方岳专城终荣於独坐夫人即刺史之第若干女也禀柔成性蕴粹含章承礼训於公庭习威仪於壺则夫其窈窕之秀婉变之姿贞节峻於寒松韶仪丽於温玉铅华不御饰环佩之容浣濯是衣勤黼黻之彩自作嫔於君子主中馈於家人三千之礼不违九十之仪无慝至乃恭於奉上顺於接下仁孝以承宗祀慈惠以睦闺门则雍雍跽跽必由其道矣呜呼府君不造遭此闵凶中年不图蚤世而殒青松摧折哀断女萝之心丹桂孤高终守栢舟之誓而府君食先人之德无後生之财夫人徇黔娄之贞阙丹台之产孀居永日蓬首终年处贫

素而弥坚保幽芳而不昧始府君之逝有四子焉少遭罔极之哀未奉过庭之训夫人保持名教终始礼经既勗之以义方又申之以远大皆能率由慈训克荷嘉声箕裘之业载隆燕翼之谋不殒非夫人淑明贤懿圣善温良崇妇道之深规弘母仪之至范孰能昭宣令闻若斯之盛哉彼苍不忧殒我眉寿春秋若干载初元年月日遘疾终於洛州某里之私第呜呼哀哉夫人令仪有穆惠闻无喧敦雅志於诗书婉绸情於琴瑟若乃姆师酒食之仪女工纂组之繁莫不總制清理弘宣懿则茂苹蘩之雅训协沼沚之芳猷古称敬姜诗云淑女论容比德殆无以过穠华不居松扃永閼嗣子某等悲摧桀棘思结寒泉永惟同穴之仪仰遵归祔之典以大周天授二年二月日朔迁祔於袁州君之旧茔礼也合葬非古奉周公之仪墓而为坟宗仲尼之训呜呼鸳鸯之树眇泣於松楸鼓吹之山缅然於丘壠原陵何代铭志无文有哀黄鸟之诗遂勒青乌之兆铭曰

诗云淑女君子好逑懿哉令德嘉仪聿修温容玉映峻节松楸妙心彤史洁志玄猷昭宣壺则惠穆苹洲共伯早逝贞姜独留?居蓬首哀深栢舟彼苍不憖此夜长幽怀南风之吹棘想北陇以同丘青春兮白日独昭昭以悠悠

上殇高氏墓志铭

维唐垂拱二年太岁丙戌七月二十日殇子高氏卒呜呼哀哉琮敷而不玉实者有矣夫吾观颢元机化出入夭寿之数荣落之原皆一成而不易者也悲夫古人之仁懿中庸不幸短命今复见之於高子子渤海蓼人也黄州府君之幼孙苑丘府君之叔子生而岐嶷实覃实华越在襁褓神明滋茂童蒙渊敏光润玉颜八岁始教方书受甲子已知孝悌之道诗礼之规苑丘府君鍾爱之他日尝趋庭与诸儿戲神情涵泳绰然如鸿雒鹄子有青云之意也府君美之曰能光我家者此儿十五通左氏春秋及尚书渊骞之志日新宏大矣不幸享年十七遇疾而夭呜呼哀哉苑丘府君感恻哀过於礼不恨尔寿之不长惜尔器之不彰夫何昔育今也则亡呜呼吾将老矣远尔何哉某年七月殡於家园日月云徂六载於兹矣天授二年龙集辛卯府君方大崇元域以安先兆诸子之枢皆祔焉其年一月癸卯朔十八日庚申启殡归瘞之茔礼也铭曰

来不可遏去不可止唯死与生由生以死於戏殇子噫何往矣伤慈父之肝情独冥冥而长已死而有知可也若其无知悲尔

堂弟孜墓志铭【并序】

君讳孜字无怠其先陈国人也六代祖太乐梁大同中为本郡大司马生五代祖方庆属梁乱始居新城郡武东山高祖汤为郡主簿生曾祖通蚤卒通生皇祖辩少习儒学然以豪英刚烈着闻是以名节为州国所服皇祖生考元爽保植先人茂德降生於君幼孤天资雄植英秀独迈性严简而尚倜傥之奇爱廉贞而不拘介独之操始通诗礼畧观史传即怀轨物之标希旷代之业故言不宿诺行不苟从率身克已服道崇德闺门穆穆如也乡党恂恂如也至乃雄以济义勇以存仁贞以立事毅以守节独断於心每若由已实为时辈所高而莫敢与伦也是以

乡里长幼望风而靡邦国贤豪闻名而悦服方谓拂羽乔木緬昇高云而遭大过栋桡而殒呜呼天降吊乎时年三十五是岁龙集癸巳有周天授二年七月卜兆不吉权殡於真谛寺之北园始以今甲午岁献春二月巳酉朔二十五日巳酉窆於石溪山之北冈陪考坟也君家世坟壠在武东山昭穆崇封松栢列盛至君考遗令独爱石溪之冈故君从先志祔葬於此呜呼哀哉始君伯父海内之文人也含纯刚之德高代之行每见君叹曰吾家世虽儒术传嗣然豪英雄秀济济不泯常惧後來光烈不象先风每一见尔慰吾家道实谓君有逸羣之骨拔俗之标超山越壑可以骏迈也岂其夭絕喪兹良图呜呼其元命坎遭命坎天不忱坎道固谬坎大圆苍苍大方茫茫贤圣同此尔之何伤古人有言珠玉而瘞是暴骸於中原况吾家道尚俭名训未坠封树之礼吾敢过焉是用锡尔瓦木之器涂刍之灵尧舜之典忠孝之经昭示後代以安尔形铭曰我祖之葳蕤兮邈於陈緬遥裔兮此江濱五代崇光兮至夫君徽烈英曜兮始氛氲何意严霜兮降青春玉树摧落兮成黄尘南山无隰兮永幽沦悠悠昭代兮卜尔辰吾恻感伤兮号苍旻问之蓍策兮立兹坟乃言千载兮衣冠来臻黄头兮勿伤神

馆陶郭公姬薛氏墓志铭【并序】

姬人姓薛氏本东明国王金氏之?也昔金王有爱子列食於薛因姓焉世与金氏为姻其高曾皆金王贵臣大人也父永冲有唐高宗时与金仁问归国帝畴厥庸拜左武将军姬人幼有玉色发於穠华若彩云朝升微月宵映也故家人美之少号僊子闻嬴台有孔雀凤凰之事瑶情悦之年十五大将军薨遂剪髮出家学金僊之道而见宝手菩萨静心六年青莲不至乃謠曰化云心兮思淑真洞寂灭兮不见人瑶草芳兮思芬葢将奈何兮分青春遂返初服而归我郭公郭公豪荡而好奇者也杂佩以迎之宝瑟以友之其相得如青鸟翡翠之婉娈矣华繁艷歇乐极悲来以长寿二年太岁癸巳二月十七日遇暴疾而卒於通泉县之官舍呜呼哀哉郭公恍然犹若未亡也宝珠以含之锦衾而举之故国途遥言归未迨留殡於县之惠普寺之南园不忘真也铭曰

高丘之白云兮愿一见之何期哀淑人之永逝感绀园之春时愿作青鸟长比翼魂魄归来游故国

唐陈州宛丘县令高府君夫人河南宇文氏墓志铭

夫人讳某河南郡人也昔吾君夏后氏之子霸有幽郡皇运北兴鼎国南起开宝符而帝天下抚璿玑而王中国则後周之受命武帝之云孙夫人四代祖也曾祖某失周子之封亡山阳之国虽存天子之?已类咸阳布衣植德蚤夭祖某隋朝官澧州澧阳令父某龙州司法皆承家席宠世有令名夫人贲穠华裘繁祉崇徽惠穆秀色苕苕自於幼年有令仪也十四适於高府君夫其温慈惠和信肃修穆行有法度动有礼经严恪以理家人?瑟以和君子则已含乎光大矣若乃宗庙哀敬仁孝也娣姒祗和谦顺也蠲洁酒食妇仪也黼黻玄黄女工也弘此四德而务六亲輶輶以文之杂佩以发之猗可以作范母仪昭宣壺则矣至於训子以睦教女以顺爱下以慈与人以让外以赞府君之德内以光中饋之政皆日闻其进不见其退也呜呼仁而不寿生也永终永淳元年五月遇疾終於宛丘县之官舍年二十七呜呼哀哉高府君?以事罢职山

莹未卜旌旆来归府君思北海之魂留东园而殡日月遂往九岁於兹府君方崇树先莹增封旧域以周天授二年太岁辛卯二月癸卯启殡於东园祔於洛州某原礼也哀哉夫人雅有高行终而不忘以为厚葬非礼也是以珠玉不饰塋瓦是藏高府君聿遵其志率以薄葬於戏非古之明德淑女金玉其光何以跻之吾忝门闾之宾覩其家道矣雍穆懿铄实有清风故叙之而未充德也铭曰

夭夭桃李有华兮灼灼淑人宜家兮修睦妇道不諱兮窈窕娉仪孔嘉兮荣采之方茂而云亡兮咨嗟

周故内供奉学士怀州河内县尉陈君硕人墓志铭【并序】

君讳该字彦表绵州显武人也其先自颍川迁蜀矣曾祖寄祖曾考永贵皆养高不仕君少好学能属文上元元年州贡进士对策高第释褐授将仕郎其明年制勅天下文儒司属少卿杨守讷荐君应词弹文律对策高第勅授茂州石泉县主簿开耀元年制举太子舍人司议郎大府少卿元知让应制荐君於朝堂对策高第勅授隆州苍溪县主簿垂拱四年又应制学综古今对策高第勅授怀州河内县尉凡历所职皆以清廉仁爱着闻有周革命天授三年恩勅自河内追入合供奉居未朞不幸遇疾於神都积善坊考终厥命年六十三归葬於豆图山之阳原礼也呜呼哀哉古人有云饰顔夷之行不逢青云之士而声名磨灭者有之矣呜呼陈君敦懿玄默洁清温良驯道执志好学博古恂恂焉行高职卑不改其操学优禄薄不怨於天四举有道三历下位晏如也非淳人淑士其谁能湮而不渝哉夫知命可谓君子矣好学可谓为文矣丹书不藏於勋府青史不昭於方册於戏一絕故老之口孰知夫子之贤哉某与君族人也服美其德尚矣昔子云称李元常璩叙令伯皆没而不朽後代称之斯非若人之徒欤吾岂默而无述其铭曰

閭閻君子好斯文兮縟藻輶章潜卿云兮栖迟下位允升闻兮金署玉堂见吾君兮鸾阶鸿渐期紫氛兮钟鸣漏尽竟兰焚兮儒行墨节将何云兮恭承遗言立石文兮金刻丹书记岁辰兮青龙甲午铭兹坟兮

燕然军人画像铭【并序】

龙集丙戌有唐制匈奴五十六载盖署其君长以郡县畜之荒服赖寧古所莫记是岁也金徽州都督仆固始槃鸞惑乱其人天子命左豹韬卫将军刘敬同发河西骑士自居延海入以讨之特勅左补阙乔知之摄侍御史护其军夏五月师舍於同城方絕大漠以临瀚海君子曰兵者凶器仁者恶之边人不靖厥自招咎今至尊不得已而顺伐尝闻西方之圣有能仁者凶吉之业各报以直则使元恶授首羣眚不孤立无血刃荒我底定岂不在於大雄乎诸将部校僉曰允哉将军乃飭躬率士卒自古祠庙图画形容有古之弥勒像也天人备容丹青毕彩盖以昭乎景福也乃作铭曰

耀天兵兮征荒服絕云汉兮出玄极白羽饰兮青云旗箫鼓鸣兮士马悲愿左右兮浮屠道备

丹青兮妙天宝功既毕兮业既成神不来兮福冥冥

冥冥君古坟志铭【为张昌寧作】

神功元年龙集丁酉我有周金革道息宝鼎功成朝廷大寧天下无事皇帝受紫阳之道延访玉京羣臣从白云之游载驰瑶水笙歌入至玄鹄飞来时余以银青光禄大夫忝在中侍拥青旄之节陪翠鸾之旗昔子孟以奉车独随武帝昌明为御史每侍轩游比之今日未足多幸是时屡从严祀遥谒秘封尝覩衆灵如云羣仙蔽日乃仰感王子晋俯接浮丘公行吹洞箫坐弄云凤窃欲邀羽袂导鸾舆求不死於金庭保长生於玉册上以尊圣寿下以息微躬因登缙山望少室寻古灵迹拟刻真容得王子晋之遗墟在永水之层曲且欲开石室营寿宫庀徒方兴畚鍤攸作乃得古藏焉其藏上无封壝内有甃瓦南北长二丈二尺东西濶八尺中有古劒一长尺余铜碗一并瓦器二其器文彩怪异非虫篆雕斲所能拟也又有古五铢钱朱漆片数十枚初开时文彩可见及柎拨之应手灰灭既无年代铭志不知爵里官族参验其事已曾为人所开於是抚之永怀念昔增密始知有形必敝涉器则毁钟鼎玉帛非度世之资名位宠章为累真之府未能独立物表超世长存与日月齐光天地比壽非夫道乎冥冥窅冥君久幽珍藏迨此昭发岂不欲感示玄契奇畅灵期昔王乔古坟唯留一劒令威荒塚又叹千年起予道心在乎此仰惟圣主仁慈恩被草木阳和掩骼既昭国典至德埋鬻又在周令今此藏亏露诚感仁惻谨历吉日協良辰即以其年十月甲子朔具物备容还定旧圻豚鷄在奠犧罇若歆哀其铭志磨灭姓位不显乃锡之名曰冥冥君其铭曰【缺】

陈拾遗集卷六

卷七

钦定四库全书

陈拾遗集卷七

唐 陈子昂 撰

杂着

上大周受命颂表【天授九年】

臣子昂言臣闻昔周道昌而颂声作遂能昭配天地光烈祖宗垂之无穷永为世典伏惟神圣皇帝陛下阐玄极昇紫图光有唐基以启周室不改旧物天下惟新皇王已来未尝覩也臣闻仲尼曰圣人吾不得而见之矣又曰舜禹之有天下而不与焉又曰凤鸟不至河不出图吾已矣夫皆伤不得见大道之行而鬱悒也臣草鄙愚陋生长休明亲逢圣人又覩昌运舜禹之政河洛之图悉皆目见幸亦多矣今者凤鸟来赤雀至庆云见休气昇大周受命之珍符也不稽元命探秘文采风谣挥象物纪天人之会以协颂声则臣下之过也有国彝典其可阙乎臣不揣朴固辄献神凤颂四章以言大周受命之事诚未足以润色鸿业揄扬盛美亦小臣区区丹慊之至谨辄诣洛城南门奉进尘冒旒冕伏表惭惶

大周受命颂【四章并序】

臣闻大人升阶神物绍至必有非人力所能存者上招飞鸟下动潜鱼古之元皇祇承上帝所以协人祉匹天休卓哉神明昭格上下莫不以之矣是故物有可则而道有可宗谓之文献其原上也缅哉有唐钦崇天命三祖继统品物咸章玄历改元黄瑞告神皇出地轴陟天阶历轩辕登太昊集乎初始之极以授我皇符鸟之肇开辟元台女希氏姓神功大哉莫不盛於兹日矣乃察璿玑稽宝命发玄?升紫图则天粲然皇文炳也非夫昇光之曜魄宝之精其孰能威神皇赫赫若斯者哉是时三阶底平百揆时序天下昌矣玄功溥矣西土耆老欣然来称曰至哉天子恤我元元勤劳下都升闻上帝臣闻天无二日土无二主皇帝嗣武以主匕鬯岂不宜乎神皇首然迺登崑仑之台修三统观五始探命历之纪则知元气之所造也方采锺龙象鸣凤协林黄之律以因生赐姓九月戊申朔六日巳卯朔神都耆老遐荒夷貊缁衣黄冠等万有二千余人云趋诣阙请曰臣等闻王者受命必有锡氏轩辕皇帝二十五子班为十二姓高阳氏才子二八命为十六族书云祇台德先不距朕行然则圣人起则命历昌必有锡氏之规臣等伏惟陛下受天之符为人圣母皇帝仁孝肃恭神明可以纂武承家以克永代陛下崇锡类垂宪章不易日月天人交际斯亦万代之一时臣等固陋不达大道敢昧死上闻神皇穆然方御珍图谦而未许也越翌日庚辰文武百寮又与耆老夷貊道俗等五万余人守阙固请曰盖臣

闻圣人则天以王顺人以昌今天命陛下以主人以陛下为母天之丕律元命也人之大猷定姓也陛下不应天不顺人独高谦让之道无所宪法臣等何所仰则敬冒昧万死固请是时目踵昆吾有凤鸟从南方来历端门羣鸟数千蔽之又有赤雀数百从东方来羣飞映云回翔紫闼或止庭树有黄雀从之者又有庆云休光半天倾都毕见羣臣咸覩於是衆眴云萃器声雷动庆天应之如响惊象物其犹神咸曰大哉非至德孰能覩此昔唐虞之瑞逖听矣今则见也天物来圣人革时哉况凤者阳鸟赤雀火精黄雀从之者土也土则火之子子随母所以纂母姓天意如彼人诚如此陛下曷可辞之昔金琴凤凰镐京黄鸟赤氏朱鴈有吴丹鸟皆纪之金册藏之瑞府以有事也陛下若遂辞之是推天而絶人将何以训於是皇帝霈然曰俞哉此亦天授也乃命有司正皇典恢帝纲建大周之统历革旧唐之遗号在宥天下咸与惟新赐皇帝姓曰武氏命为嗣皇崇乎绍天统物其赫胥大庭之上事已乃献颂曰

天命神凤降祚我周彩容有穆其仪孔休惟我有周实保天德上帝临命纂承唐极人曰天佑有皇女希造天立极缅然猷徽赫我皇帝乃先厥微匪天之命凤鸟谁归因生锡氏革号循机岂不顺乎天而应乎人帝曰俞哉

右神凤章

翩翩赤鸟朱火之光含神之务秘帝之祥在昔甲子降祚於昌今则庚辰翩翩来翔来翔维何作我圣皇提提黄鸟载飞载扬从火之母应土之王体仁资孝类我嗣皇恭膺锡氏稽首龙章天授万年圣帝煌煌

右赤雀章

崑仑元气实生庆云大人作矣五色氤氲昔在帝妣南风既薰蓂芳烂漭郁郁纷纷旷矣千祀庆云来止玉叶金柯祚我天子非我天子庆云谁昌非我圣母庆云谁光庆云应矣周道昌矣九万八千天授皇年

右庆云章

周道赫兮天宝开八方协兮万国来天人应兮雷雨作声教殷兮宇宙回璿图宝兮称万岁神皇穆兮崑仑台

右眴颂章

国殇文一首【并序】

丁酉岁三月庚辰前将军尚书王孝杰败王师於榆关峡口吾哀之故有此作

天未悔祸兮炽此山戎虐老昏幼兮人罹其穷帝用震怒兮言剪其凶出金虎兮曜天锋扫宇

宙之甲驰燕蓟之冲何士马之沸渭若云海之汹汹荆吴少年韩魏劲卒戈矛如林白羽若月且欲蹈乌丸之垒刈赤山之旗聯青丘之繳封黄龙之屍凶寇猖獗奸险是凭蛇伏泥滓蚁鬪丘陵哀我将之忤勇兮无筭畧以是膺陷天井之死地属云骑以相騰短兵既接长戟亦合星流飈驰树离【一作杂】山沓智无所施其巧勇不能制其怯顿金鼓之雄威沦輿尸之败业天乎哀哉矢石既尽白日颓主将已死士卒哀徒手奋呼谁救哉含愤沉怒志未回杀气凝兮苍云暮虎豹慄兮殇魂惧殇魂惧兮可奈何恨非其死兮弃山阿血流骨积殪荒楚思归道远不得语降不戮兮北不诛歿不赏兮功不图岂力士之未徇诚师律之见孤重曰壮士虽死精魂用凶丑尔讎不可纵我闻僵死能厉灾古有结草抗杜回苟前失之未远悦冥讎之在哉呜呼魂兮念归来

禡牙文

万岁通天二年三月朔日清边道大总管建安郡王某敢以牲牢告军牙之神盖先王作兵以讨有罪奸慝窃命戎夷不恭则必肆诸市朝大戮原野我皇周子育万国宠綏百蛮青云干吕白环入贡久有年矣契丹凶羯敢乱天常乃蜂屯丸山豕食辽野宴安鸩毒作为櫓枪天厌其凶国用致讨皇帝命我肃将王诛今大军已集吉辰叶应旄头首建羽旆前列夷貊咸威将士听誓方俟天休命为人殄灾惟尔有神尚殲乃丑召太一会雷公翼白虎乘青龙星流彗扫永清朔裔使兵不血刃戎夏大同以昭我天子之德允乃【盱本有尔字】神之功岂非正直克明哉无纵世讐以作神羞急急如律令

祭海文

万岁通天二年月日清边道军海运度支大使【盱本有兼字】虞部郎中正玄珪敢以牲酒沉浮海王之神神之听之我国家昭列象胥惠养戎貊百蛮率职万方攸同鲜卑猖狂忘道悖乱人弃不保王师用征故有度辽诸军横海之将天子命我赢粮景从今旌甲云屯楼船雾集且欲浮碣石凌方壶袭朔裔即幽都而涨海无倪云涛洄瀾孤山远岛鸿洞天波惟尔肃恭令典导鹄首骑鲸鱼呵风伯遏天吴使苍猊不惊皇师允济攘慝剿虐安人定灾苍苍羣生非神孰赖无昏汨乱流而作神羞急急如律令

吊塞上翁文

居延【蜀本作近】海南四余百里有南驛戍【集作有古城焉】土人云是塞上翁城今为戍其基局趾迹盖数千年也丙戌之岁兮我征匈奴恭闻北叟兮托国此都邇叟之生日月遐迈及今来思实获心契欣问於叟何德其愚【盱本作何德之愚】僻居幽漠浩与世殊忘情逸马胡宁而知福谢於隣人何达而不淑丁男既存君子知复人以为极也伊怀兹土既板且筑局禁天崇墉隍云矗今则荒秽世亦不毓其故何哉贤叟之德登叟之堂天道何远而兹理茫茫人代日故兮丘郭日荒??何家不归其乡【蜀本作??何为不归故乡盱本作??何家独不归其故乡】叟乎叟乎我心之伤

祭孙府君文

维年月日子昂谨以牲酒之奠致祭故延俊府折冲燕然军孙府君之灵惟君少驰英武早効成功声雄塞上名重关中憺棱威於敌国存大节於家风既挥金而退老方餌药於仙童何昊天之不吊随大化以长终白马故人青乌送往素车永诀黄垆谁赏絮酒盈觞魂兮尚飨

为建安王祭苗君文

维某年月日朔方道大总管建安郡王攸宜以酒饌之奠祭故壮武将军左玉钤卫中候左三军营主苗君之灵君忠勇兼资戎麾夙济乌丸作逆赤羽从军方且任君先锋仍驰後劲刈鲜卑之垒摧蹋顿之师执馘献俘归受国赏何图大勋未立随命先凋永怀咨嗟情用兼恻故命酒奠告尔殇魂君其有灵歆兹薄酌呜呼尚飨

祭黄州高府君文

维年月日朔孙女夫某等谨以清酌庶羞之奠敢昭告於故黄州高府君之灵惟府君含德元亨保和光大才堪济世而运属承平器允登台而命鍾流落有瑚璉之宝无廊庙之资岂图大位不跻幽灵永昧尊仪潜翳三十余年玄殡既开黄腸已古今青乌改卜丹旌来归窀穸即期幽明永诀某等忝承嘉惠奉事门阑兴言追慕实增感咽窃惟精意以享黍稷非馨敢陈薄酌以献明灵呜呼哀哉伏惟尚飨

祭韦府君文

维年月日左拾遗陈子昂谨以少牢清酌之奠致祭故人临海韦君之灵惟君孝友自天忠义由已有经世之畧怀轨物之量甘心苦节风雨不改常欲穷则独善其身達则兼济天下感激遐咏邈然青云何期良策未从大运奄忽呜呼哀哉昔君梦奠之时值余寘在丛棘狱户咫尺邈若山河话言空存白马不吊迨天网既开而宿草成列言笑无由梦寐不接永言感恻何时可忘今旌旆言归关河方远兴言永诀今古长辞邓攸无子天道何知洛阳旧陌拱木犹存京兆新阡孤松已植已矣韦生云何及矣大运之往贤圣同尘呜呼哀哉伏惟尚飨

祭外姑宇文夫人文

维年月日朔女夫某谨以清酌嘉蔬之奠奉祭于故高氏河南宇文夫人之灵恭闻夫人有清穆之德皓洁之行淳懿肃恭内外仰则而遗风素范蕙敷兰滋用能惠心光孚氤氲沼沚崇严壺训芬郁母仪中馈柔嘉娣姒有则岂图慈顏幽翳於今年辛未已拱尊灵廓然今吉辰协应幽殡方开容象如在器质已灰改卜礼典宅兆方迁山园既列祖载行焉哀子号咷女也蟬媛终天永诀泣血流涟某谬承嘉惠预叨姻戚生事早睽送终空积窃闻精意以享黍稷非馨敢陈薄酌以献明灵伏惟夫人明神尚飨

祭率府孙録事文

维年月日朔某等谨以【云云】古人叹息者恨有志不遂如吾子良图方兴青云自致何天道之微昧而仁德之攸孤忽中年而颠沛从天运而长徂惟君仁孝自天忠义由已诚不谢於昔人实有高於烈士然而人知信而必果有不识於中庸君不慙於贞纯乃洗心於名理元常既没墨妙不传君之逸翰旷代同仙岂图此妙未极中道而息怀衆宝而未摅永幽泉而掩色呜呼哀哉平生知己畴昔周旋我之数子君之百年相视而笑宛若昨日交臂而悲今焉已失人代如此天道罔然所恨君者枉夭当年嗣子孤藐贫窶聯翩无父何恃无母惻焉呜呼孙子山涛尚在嵇绍不孤君其知我无恨泉途呜呼哀哉尚飨

春台引【寒食集毕宅】

感伤春兮生碧草之油油怀宇宙以汤汤遂登高台而写忧迟美人兮不见恐青岁之还遒从毕公以酬饮寄林塘而一留采芳荪於北渚忆桂树於南州何云木之英丽而池馆之崇幽星台秀士月旦诸子嘉青鸟之辰迎火龙之始挟宝书与瑶瑟芳蕙华而兰靡乃掩白苹藉緑芷酒既醉乐未已擊青钟歌緑水怨青春之萎絶贈瑶华之旖旎愿一见而导意结衆芳之绸缪曷余情之荡漾独青云以增愁恨三山之飞鹤忆海上之白鸥重曰羣仙去兮青春颓岁华歇兮黄鸟哀富贵荣乐几时兮朱宫翠堂生青苔白云兮归来

彩树歌

嘉锦筵之珍树兮错衆彩之氛氲壮瑶台之微月点巫山之朝云青春兮不可逢况蕙色之增芬结芳意而谁赏怨絶世之无闻红荣碧艷坐看歇素华流年不见君故吾思崑仑之琪树厌桃李之缤纷

山水粉图

仙图之白云兮若巫山之高丘纷羣翠之鸿溶又似蓬瀛海水之周流信夫人之好道爱云山以幽求

复讎议状

臣伏见同州下邳人徐元庆者父爽为县吏赵师韞所杀卒能手刃父讐束身归罪议曰先王立礼所以进人也明罚所以齐政也夫枕干讐敌人子之义诛罪禁乱王政之纲然则无义不可以训人乱纲不可以明法故圣人修礼理内飭法防外使夫守法者不以礼废刑居礼者不以法伤义然後能暴乱不作廉耻以兴天下所以直道而行也窃见同州下邳人徐元庆先时父为县吏赵师韞所杀元庆鬻身庸保为父报讐手刃师韞束身归罪虽古烈者亦何以多诚足以激清名教旁感忍辱义士之靡者也然按之国章杀人者死则国家画一之法也法之不二元庆宜伏辜又按礼经父讐不同天亦国家劝人之教也教之不苟元庆不宜诛然臣闻昔

刑之所生本以遏乱仁之所利盖以崇德今元庆报父之仇意非乱也行子之道义能仁也仁而无利与乱同诛是日能刑未可以训元庆之可显宥於此矣然邪由正生理必乱作昔礼防至密其弊不胜先王所以明刑本实由此今徇义元庆之节废国之刑将为後图政必多难则元庆之罪不可废也何者人必有子子必有亲亲相讐其乱谁救圣人作始必图其终非一朝一夕之故所以全其政也故曰信人之义其政不行且夫以私义而害公法仁者不为以公法而徇私节王道不设元庆之所以仁高振古义伏当时以其能忘生而及於德也今若释元庆之罪以利其生是夺其德而亏其义非所谓杀身成仁全死无生之节也如臣等所见谓宜正国之法寘之以刑然後旌其闾墓嘉其徽烈可使天下直道而行编之於令永为国典谨议

为建安王誓衆词

诸总管部将旗长队正各听命夫圣人用兵以讨有罪奸慝窃命戎夷不恭则必肆诸市朝大戮原野我皇周子育万国宠绥百蛮遐荒戎狄莫不率职兵屯甲聚非欲劳人盖逆不可纵乱不可长所以屈已推轂垂涕泣辜诚恐苍生颠坠涂炭今契丹凶羯敢乱天常为封豕长蛇荐食上国玉帛皮币弃而不贡名器正朔僭而有谋乃将给神虐人暴殄天物故皇帝命我肃将王诛今大师已集方将问罪公等诸将及士卒已上须各严职事肃恭天命契丹凶贼本为中国奴隶昏狂不道劳我师徒今与公等及士卒久勤干戈冒犯霜露夫四郊多垒士大夫之耻蕞尔凶狡一劒可屠况皇帝义兵克期诛剪此犹泰山压卵鸿毛在炉今日之伐须如雷霆之震虎豹之擊搆旗斩馘扫孽除凶上以摅至尊之愤下以息边人之患鼓以作气旗以应机公等各宜戮力务当其任若能奋不顾命陷坚摧锋金紫玉帛国有重赏若进退留顾向背失机斧钺严诛军有大戮各宜勉励无犯典刑

金门饯东平序

昔者汉朝卿士供帐饯於东都晋国名贤倾城祖於西郊虽时称盛观而人非帝族东平紫微英胄朱邸天人蕴岐嶷之瓌姿得山河之宝气刘君爱士常致礼於幽人曹植论文每交欢於数子属銮輿拜日来朝太室之前玉检停刊言返章华之路羣公以眷深王粲思邀祖道之欢下走以遇重荀慈谬奉芳筵之醴於时青阳二月黄鸟羣飞残霞将落日交晖远树与孤烟共色江山万里渺然荆楚之涂城邑三春去矣伊瀍之地既而朱轩不驻緑盖行遥琴樽之清讌已疲珠玉之芳言未赠请各陈志以序离

梁王池亭宴序

子昂少游白屋未历朱门闻王孙之游空怀春草见公子之兴每隔青霄弋阳公座辟青轩饰开朱邸金筵玉瑟相邀北里之欢明月琴樽即对西园之赏鄙人幽介酒醴知惭王子爱才文章见许白日已驰欢娱难恃平生之乐其在兹乎

薛大夫山亭宴序

夫贫贱之交而不可忘珠玉满堂而不足贵闭门无事对黄卷以终年高论不疲逢故人而永夜薛大夫其人也下官昔承颜色早蒙车骑之知晚接恩光不异平津之旧蔡邕书史许以相资张载文章见称於代尔其华堂别业秀木清泉去朝廷而不遥与江湖而自远名流不杂既入芙蓉之池君子有邻还得芝兰之室披翠微而列坐左对青山俯盘石而开襟右澄流水斟绿酒弄清弦索皓月而按歌追凉风而解带谈高趣逸体静心闲神眇眇而临云思飘飘而寓物林轩寂寞星汉纵横思欲垂汗漫而羣游与真精而合契欢穷兴洽乐往悲来怅鸾鹤之不存哀鸕鷀之久没徘徊永叹慷慨长怀东方明而毕?升北阁曙而天云静悲夫向之所得已失於无何今之所游复羈於有物诗言志也可得闻乎

送中岳二三真人序【时龙集乙未十二月二十日】

夫爱名山歌长往世有之矣放身霄岭宴景云林卑俗不可得而闻时士不可得而见则吾欲高视终古一笑昔人嵩山有二仙人自浮丘公王子晋上朝玉帝遗迹金坛凤箫悠悠千载无响吾每以是临霞永慨抚膺叹息常谓烟驾不逢羽人长往去嚣世走青云登玉女之峯窥石人之庙见司马子微冯大和霓裳眇然冥壑独立真朋羽会金浆玉液则有杨仙翁玄默洞天贾上士幽栖牝谷玉笙吟凤瑶衣驻鹤方且迷轩辕之驾期汗漫之游吾亦何人躬接兹赏实欲执青节从白蜺陪饮崑仑之庭观化玄元之府宿心遂矣冥骨甘焉岂知琼都命浅金格道微攀倒景而迷途顾中峯而失路尘荣俗累复汨吾和仙人真侣永幽灵契翳青芝而延伫遥会何期结丹桂而徘徊远心空絶紫烟去黄庭极仰寥廓而无光视寰区而寡色悠悠何往白头名利之交咄咄谁嗟玄运盛衰之感始知杨朱岐路墨翟素丝尚平辞家而不归鲍焦抱木而枯死可以恻可以悲古人之心吾今得之也

送著作佐郎崔融等从梁王东征序

古者凉风至白露下天子命将帅训甲兵将以外威荒戎内辑中夏时义远矣自我大君受命百蛮蚁伏匈奴舍蒲桃之宫越裳重翡翠之贡虎符不发象译攸同实欲高议灵台偃伯天下而林胡遗孽蓬乱边氓驱蚊蚋之师忽雷霆之伐乃窃海裔弄燕陲皇帝哀北鄙之人罹其辛螫以东征之义降彼偏裨犹恐威令未孚亭塞仍梗乃谋元帅命佐军得朱邱之天人乃黄阁之元老庙堂授钺凿门申命建梁国之旌旗吟汉庭之箫鼓东向而拜北道长驱蜺旌羽骑之殷戈翻落日突鬣蒙轮之勇剑决浮云方且猎九都穷踏顿存肃慎吊姑余彷徨赤山巡御日域以昭我王师恭天讨也岁七月军出国门天晶无云朔风清海时比部郎中唐奉一考功员外郎李迥季著作佐郎崔融并参帷幕之宾掌书记之任燕南怅别洛北思懽顿旌节而少留倾朝廷而出饯永昌丞房思玄衣冠之秀乃张蕙圃席兰堂环曲榭罗羽觞写中京之望纵候亭之赏尔乃投壶习射博奕观兵鎗金铙戛瑶琴歌易水之慷慨奏关山以徘徊颓阳半林微陰出座思长风以破浪恐白日之蹉跎酒中乐酣拔劒起舞则已气横辽碣志扫獯戎抗手何言赋诗以赠

送吉州杜司户审言序

嗟夫德则有隣才不必贵昔有耕於岩石而名动京师词感帝王乃位昇武骑夫岂不遭昌运哉盖时命不齐奇偶有数当用贤之世贾谊窜於长沙居好文之朝崔駰放於辽海况大圣提象羣臣守规杜司户炳灵翰林研几策府有重名於天下而独秀於朝端徐陈应刘不得劇其垒何王沈谢适足靡其旗而载笔下寮三十余载秉不羈之操物莫同尘含絕唱之音人皆寡和羣公爱祢衡之俊留在京师天子以桓譚之非谪居外郡苍龙阁茂扁舟入吴告别千秋之亭回棹五湖之曲朝廷相送驻旌盖於城隅之子孤游淼风帆於天际白云自出苍梧渐远帝台半隐坐隔丹霄巴山一望魂断淥水於是邀白日藉青苹追潇湘之游寄洞庭之乐吴歛楚舞右琴左壶将以缓燕客之心慰越人之思杜君乃挟琴起舞抗手高歌哀皓首而未遇恐青春之蹉跎且欲攜幽兰结芳桂漱石泉以节味咏商山以卒岁返耕餌术吾将老焉羣公嘉之赋诗以赠凡四十五人具题爵里

冬夜宴临邛李録事宅序

下官游京国久矣接轩裳衆矣池台钟鼓虽有会於终朝琴酒管弦未穷欢於永夕岂非殊我亲爱异我风謡而使临台有怀闻乐增叹者也何功曹旧州耆老迹尚於沉冥李録事吾土贤豪义多於游侠高轩置酒甲第迎宾丝竹纷於綺窗琅玕盛於雕俎楼台若画临故国之城池轩盖如云总名都之车马於是乘兴自此而游安得不放意留欢遗老忘死金壶漏晚银烛花微北林之烟月无光南浦之星河向曙赤车使者下官虽谢於古人锦里名家羣公岂慙於昔彦我之怀矣实在於斯同赋一言俱为四韵

忠州江亭喜重遇吴参军见牛司仓序

日月交分春秋代谢昔岁居单阏适言别於兹都今龙集昭阳复相逢於此地山川未改容貌俱非叙名宦而犹嗟问乡关而不乐云天遂解琴酒还开新交与旧识俱欢林壑共烟霞对赏江亭迴瞰罗新树於阶基山榭遥临列羣峯於户牖尔其丹藤緑筱俯映长筵翠渚洪澜交流合座神融兴洽望直情高觉清溪之仙洞不遥见苍海之神山乍出既而行舟有限嗟此会之难留别日无期叹分岐之易远徘徊北渚惆悵南津江陵之道路方賒巴徼之云山渐异嗟乎离言可赠所愿保於千金别曲何謡各请陈於五字

晖上人房饯齐少府使入京府序

永淳二年四月孟夏东海齐子宦於此州虽黄绶位轻而青云器重故能委邦君而坐啸屈刺史而知名属乎銮驾巡方诸侯纳贡将欲对扬天子命我行人执玉帛而当朝拥駟驂而戒道指途河渭发引岷嶓粤以丙丁之日次於晖公别舍盖言离也尔其岩泉列坐竹树交筵吐青霭於轩窗栖白云於左右参差池榭乱山水之清陰缭绕阶庭杂峯崖之异势入禅林而避暑肃风景於中庭开水殿而追凉彻氛埃於户外瑶琴合奏翠铎时行譚窈窕於天人极留连於晷刻既而欢乐极良辰征攀白日而不回唱浮云而告别山光黯黯凝緑树之将曛岚气沉沉结苍云而遂晚虽同交未阻风月可留岐路方乖关山成恨嗟乎朝廷子入期富贵於崇朝林岭吾栖学神仙而未毕青霞路絶朱绂途遥言此会之何时愿相逢而谁代永怀千古岂知仁

者之交凡我三人盍崇不朽之迹斯文未丧题之此山同疏六韵云尔

春晦饯陶七於江南序

蜀江分袂巴山望别南津坐恨叹仙帆之方遥北渚长怀见离亭之欲晚白云去矣黄鹤何之杨柳青而三春暮我之怀矣能无赠乎同赋一言俱题四韵

夏日晖上人房别李参军序

考察天人旁罗变动东西南北贤圣不能定其居寒暑晦明陰阳不能革其数莫不云离雨散奔驰於宇宙之间宋远燕遥泣别於关山之际自古然矣李参军白云英胄紫气仙人爱江海而高寻顿风尘而未息来从许下月旦出於龙泉言入蜀中星文见於牛斗野亭相遇逆旅承欢谢鲲之山水暂开乐广之云天自乐思道林而不见怅若有亡诣祇树而从游衆然旧欸高僧展袂大士临筵披云路之天书坐琉璃之宝地帘帷後辟拂鸚鵡之香林栏檻前开照芙蓉之綠水讨论儒墨探览真玄觉周孔之犹述知老庄之未悟遂欲高攀宝坐伏奏金仙开不二之法门观大千之世界欢娱恍晚离别行催红霞生而白日归青气凝而碧山暮骊歌断引抗手将辞江汉浩浩而长流天地居然而不动嗟乎色为何色悲乐忽而因生谁去谁来离会纷而妄作俗之迷也不亦烦乎各述所怀不拘章韵

秋日遇荆府崔兵曹使讌序

若夫尊卑位隔荣贱途分使卿士大夫倚轩裳而傲物山栖木食负林壑而骄人未有能屈富貴於沉冥杂薜萝於簪笏天人坐契相从云雾之游风雨不疲高纵琴罇之赏崔兵曹紫庭公胄青云貴人以钟鼎不足致奇才烟霞可以交名士皇华昭国怀凤綵而高寻白桂追游邀兔置而下顾大矣哉生年未识一见而交道遂存此日披怀千载之风期坐合支道林之雅论妙理沉微崔子玉之雄才斯文未丧属乎金龙掌气石雁惊秋天沈寥而烟日无光野寂寞而山川变色芸其黄矣悲白露於苍葭木叶落兮惨红霜於綠树尔其高兴洽芳酒阑顿羲和而不留顾华堂而欲晚长歌何托思传稽古之文爰命小人率记当时之事人探一字六韵成篇

喜遇冀侍御崔司议二使序

昂独坐一隅孤愤五蠹虽身在江海而心驰魏阙岁时仲春幽卧未起忽闻二星入井四牡临亭邀使者之车乃故人之驾隐儿一笑把臂入林既闻朝廷之事复此琴罇之乐山林幽疾钟鼎旧游语默谭咏今复一得况北堂夜永西轩月微巴山有望别之嗟洛阳无寄载之客江关离会三千余里名位宠辱一百年中欢娱如何日月其迈不为目的之赏以增别後之思蟋蟀笑人夫子何叹

别冀侍御崔司议序

朝廷欢娱山林幽瘁思魏阙魂已九飞饮岷江情复三乐进不忘匡救於国退不慙无闷在林冀侍御崔司议至公至平许我以语默於是矣夫達则以公济天下穷则以大道理身嗟乎子昂岂敢负古人哉蜀国酒醺无以娱客至於挟清瑟登高山白云在天清江极目可以散孤愤可以游太清为一世之逸人寄千里之道友吾欲不谢於崔冀二公矣所恨酒未醉琴方清王事靡盬驿骑遄速不尽平原十日之饮又谢叔度累日之欢云山悠悠叹不及也载想房陆毕子为轩冕之人不知蜀山有云巴水可兴睽阙良会我心惄然请以此酣寄谢诸子为巴山别引也陈子昂醉词曰有道君匡国无闷余在林白云岷峨上岁晚来相寻

洪崖子鸾鸟诗序

鸾鸟篇者晋人洪崖子之所作也洪崖子遁我玄魁责其默行矫迹汾水习隐洛阳乘白驴衣羽褐游朝市之际杂缙绅之间时人或将袭青牛师蓊子训之陈迹也尝以翠鸾时栖明主之瑞君子独立矫世之方於是和墨澹情洒翰縟意寄孤兴於露月沉浮标於山海乃集瑶圃洗玉池翩翩然又以自得也时尚辇奉御梁国乔侃闻其风而悦之乃刻羽翦商飞毫掞牍扣归昌之律协朝阳之音率诸君子属而和之者十有五余始未知夫洪崖也乔子慕义命余叙之凡若干首

登蓊城西北楼送崔着作入都序

仆尝倦游伤别久矣况登楼远国衔酒故人愤胡孽之侵边从王师之出塞元戎按甲方刈鲜卑之垒天子赐书且有相君之召而崔侯佩剑即謁承明羣公负戈方絶大漠燕山北望辽海东浮云台与碣馆天殊亭障共衣冠地隔抚剑何道长謡增叹以身许国我则当仁论道匡君子思报主【一作国】仲冬寒苦幽朔初平苍茫天兵之气冥灭戎云之色白羽一指可扫丸都赤墀九重伫观献凯必期我愿斯遂君心共有策勋饮至方同廊庙之欢偃武橐弓借尔文儒之首蓊丘故事可以赠言同赋登蓊楼送崔子云尔

送麴郎将使默啜序

盖北夷不羈之日久矣天子垂玄默穆皇风而狼居革心蚁伏请职岁一月上将恤戎乃以金章假麴公为司宾卿载驰锦车谕意云幕且欲顿单于之膝受呼韩之朝不踰青春复命紫阙其忠臣烈士之节感激壮士矣朝廷以赴此絶国追送近郊登熊山望鴈塞黄云千里亭臯悠然金日赋诗絶句以赠

嘉【一作喜】马参军相遇醉歌序

吾无用久矣进不能以义补国退不能以道隐身天子哀矜居於侍省且欲以芝桂为伍麋鹿同曹轩裳钟鼎如梦中也南荣暴背北林设置有客扣门云吾道存孺子孺子黄中通理时玄冬遇夜微月在天白云半山志逸海上酒既醉琴方清陶然玄畅浩尔太素则欲狎青鸟寄丹仙矣日月云迈蟋蟀谓何夫诗可以比兴也不言曷着时醉书散洒乃昏见清庙台令知此有

蜀云气也毕大拾遗陆六侍御崔议司崔兵曹鲜于晋崔湏子怀一道人当知吾此评是实録也若东莱王仲烈见之必以为真醉歌曰独幽黙以三月兮深林潜居时岁忽兮孤愤遐吟谁知我心孺子孺子其可与理兮

偶遇巴西姜主簿序

予疲茶永久未尝解顔正欲登高山望远壑挥斥幽瘴以酈太清姜主簿倏自绵中至於林下乃饰琴酒之事杂文章之娱将蠲我忧颓靡取乐夫浩浩之白不可独也青春之诗又谁咎也逢太平之化寄当年之欢同人在焉而我何叹南国橘柚阳月初荣北梁山水良辰复别挥手何赠诗以永言云尔

饯陈少府从军序

夫岁月易得古人疾没代不称功业未成君子以自强不息岂非怀其宝思其用然後以取海内之名以定当年之策展其才力受以驱驰少府叔凤彩龙章才高位下班超远慕每言关塞之勲梁竦长怀耻为州县之职属胡兵犯塞汉将临边商君用耕战之谋充国起屯田之策皇华出使言收疆场之功白水开筵遂为云雨之别尔其苍龙解角朱鸟司晨溽景薰天炎光折地山川渐远行人动游子之歌罇酒未空送客起贫交之赠嗟呼杨朱所以泣岐路苏武所以悲絶国古之来矣盍各言志以叙离歌

荊州大崇福观记

维大周揖让受唐有天下十载施化育德扬光显仁天下咸和中外胥谧僊门法?泽罔不暨粤若无上太祖孝明皇帝神明睿哲龙德而隐君子勿用於我诸宫葳蕤春风霏霖时雨讴歌归之允矣太王王季岐镐之渐也於戏西伯潜圣而遗其三龄故我太祖姑安时处顺乘彼白云以归帝乡方城之人嗟咨涕洟灵魄罔遘乃以珠襦玉匣閼兹衣冠谷林方崇乔山未掩龙輶梓寝在兹观者七月余灭化北顔涂暨积逮皇帝顺人乐推凤翔虎变追革显号宗祀于明堂跃试所历莫不昭晰宠光也长史弘农杨元琰雅量川濬贞节岳立有倚相坟典之博子囊增名之忠遂稽皇图徵文献以为会稽之庙大庭之初其事尚矣乃表上遗迹祈饰山阶司宾卿于惟谦地官主事鲁玄杰咸经沐浴邦宪昇官周京亦恢廓徽猷任佐诚请时皇帝方垂拱璇渊之中以思大化故书奏不荅道士孟安排者玄禀真骨记上阶黄裳羽袂囊中窃感苍梧遗化长沙旧寝不可以不昭发圣世复重理前状伏奉阙下至于再三天子乃悯然迁思回虑旌别斯观锡名曰大崇福焉时龙集己亥圣历之二年也翌日又优制褒崇时降银榜仙书凤篆飞集王宫天文昭回瑞我鄢郢则有踰岐山越梁境梯衡霍浮潇湘郁荆門隴江徼莫不翼戴拚舞澡雪心目者已安排乃喟然叹曰道恶乎在名恶乎在茅茨文轩未始离也朱宫玄圃未始乖也损之而又损之思乎思无为而无不为知乎知则我何拘於常见哉而不谓熙帝庸也遂经玄都爰代琴瑟作为仙观之宫文彩构?砮砮砌阶栌栱森郁以宏合藻井翥翥以天开瑶坛跻於上清银阙表於中界高步玄云肃然灵风髣髴紫阳之天也然後璇题显曜金格道相朝浮彩云夕沍清露眇哉邈乎信皇灵之所感发矣盖金简玉牒可存而不可知崑仑方壺可

闻而不可阶也犹且曰遂録贵乎真经况皇明帝载昭铄日月而已乃刊作记以传罔极

陈拾遗集卷七

卷八

<集部,别集类,汉至五代,陈拾遗集>

钦定四库全书

陈拾遗集卷八

唐 陈子昂 撰

杂着

答制问事八条

臣今月十九日蒙恩敕召见令臣论当今政要行何道可以适时不须远引上古具状进者微臣智识浅短实昧政源然尝洗心精意静观人理窃见国之政要兴废在人能知人机顺而施化趋时适变静而勿动政要之实可得而行今陛下以应天命而受宝图建立明堂施布大化勤恤人隐存问高年报功树德顺时兴务至公至仁垂训天下可谓典章大备制度弘远五帝三王所不及也愚臣何敢有知政要然天恩降问贵采刍蕘谨竭愚直悉心以奏凡用贤之道未广仰成之化尚劳然则取士之方任贤之事固陛下素所深知应亦倦谭亦倦听不待臣更一二烦说也

请措刑科

臣闻言有顺君意而害天下者有逆君意而利天下者唯忠臣能逆意唯圣君能从利恩敕不以臣愚微降问当今政要臣伏惟当今之政大体已备矣但刑狱尚急法网未宽恐非当今圣政之要者臣观圣人用刑贵适时变有用舍不专任之且圣人初制天下必有凶乱之贼叛逆之臣而为驱除以显圣德圣人诛凶殄逆济人宁乱必资刑杀以清天下故所以务用刑也凶乱既灭圣道既昌则必顺人施化赦过宥罪所以致措刑也然则圣人用刑本以禁乱乱静刑息不为昇平所设何者太平之人悦乐于德不悦乐于刑以刑穷於人人必惨怛故圣人贵措刑不贵烦刑今神皇应运授图临御天下逆臣贼子顿伏严诛所以虺蜺羣党同恶就戮此盖天意将显神皇威灵岂此凶徒所能自乱今魁首已灭朋党已屠圣政惟昌天下咸服神皇又降文昌鸿恩涤荡羣罪天下昭庆企望日新措刑崇德正在今日实圣政之至要者也臣伏见近来诏狱推穷稍复滋长追捕支党颇及远方天下士庶未敢安止臣伏惟神皇圣意务在措刑安恤天下不务察法以损昇平然今刑狱未息者应是狱吏未识天意所以至於此也伏愿神皇垂恺悌之德务仁寿之恩敕法慎罚以省刑典臣伏见当今天下士庶思愿安寧途謡巷歌皆称万岁此其怀乐圣化愿保永年欲与子孙同此仁寿今神皇不以此时崇德务仁使刑

措不用乃任有司明察专务威刑臣窃恐非神皇措刑之道且臣闻杀一人则千人恐滥一罪则百夫愁人情大端畏惧於此今天下至广万国至繁神皇虽妙察狱固不可门告户说令一一知者若使有一不知以神皇好任刑法则非太平安人之务当今圣政之要者也此是臣赤心至诚敢言其实冒死犯奏所冀天鉴务求措刑察臣所言非敢苟顺

重任刑科

臣伏惟刑措之政在能官人官人惟贤政所以理此固神皇深知倦问不假臣一二烦说今臣所更重说者实以天下之政非贤不理天下之业非贤不成固愿神皇务在任贤诚得衆贤而任之则天下之务自化理也然贤人既任须信既信须终既终须赏夫任而不信其才无由展信而不终其业无由成终而不赏其功无由别必神皇如此任贤则天下之贤云集矣何以知其然君子小人各尚其类者也若神皇徒务好贤而不能任能任而不能信能信而不能终能终而不能赏虽有贤人终不可用矣神皇降问小臣当今政理之要者臣窃以此为政要之至极何以言之神皇大业已成天下已平尊名已显大礼已备所未足者在於忠贤若得忠贤相与而守之太平之功可以於此而就斯实天地神灵赞助神皇而致此时也当此时不成千岁之业立万代之规小臣诚愚窃为神皇所惜

明必得贤科

臣伏惟刑措之道政在任贤议者皆云贤不可知人不可识臣独以为贤固可易知人固可易识但是议者不精思之耳夫尚德行者必恶凶险之类务公正者必无邪佞之朋保廉节者必憎贪冒之党有信义者必疾苟且之徒智者不为愚者谋勇者不为怯者死犹枭鸾不接翼薰莸不同器此天地之性物类之情其理自然不可改易何者以德事凶两不相入以正接佞两不相利以信质伪两不相从以廉说贪两不相和智者尚谋愚者不听勇者徇死怯者贪生皆事业不同趋向各异矣贤人之道固可预知诚能尚贤贤可至矣然则贤人之业须贤人達之贤人之才须贤人用之公正廉节信义勇谋皆待其人然後获展苟非其类道不虚行凡贤人君子未尝不思效用但无其类获进所以湮没於时今神皇诚能信任贤良旌纳忠正知左右之臣灼然有贤行者赐之尊爵厚禄以荣宠之使其以类相举责成其政合度者进失度者贬神皇但垂拱明堂保神和志天下之事臣必见日就无为不言而治也今神皇忧恤万几日不暇给昧旦丕显中夜以思诚是羣臣未称圣任伏愿神皇审察贤能垂恩信任夫忠贤事君必諫君失奸佞事主必顺主情直道曲事惟圣鉴所察

贤不可疑科

臣伏惟神皇圣明具知得贤须任既任须信既信须终既终须赏悉备知也然今未多信任者应以经信任无效所以致疑如裴炎刘禕之蹇【本传作蹇】味道周思茂固蒙神皇信任之矣然竟背德辜恩神皇以此有疑於信任贤也以臣愚诚则谓不然何者圣必藉贤以明国必待贤以昌人必待贤以理物必待贤以寧若神皇疑於任贤欲以圣谋自断臣恐勤劳圣躬而天下不可独理况圣躬不可劳弊神心不可细用此最须任贤者也臣闻鄙人云有人以食噎

而得病者欲絕食以去病乃不知食絕而身毙此言近小可以喻远臣窃谓贤人於国亦犹食之在人固不为一噎而絕餽粮亦不可以谬贤而远正士此实神皇圣鉴可明知也不待愚臣一二言之伏愿任贤无疑求士不倦以此为务天下诚不足理也若外有信贤之名而内实有疑贤之心臣窃谓神皇虽日得百贤终是无益适足以损贤伤政也伏惟熟察可信者信之

招谏科

臣伏惟圣人制天下贵能至公能至公者当务直道臣伏见神皇至公应物直道容贤然朝廷尚未见敢谏之臣骨鯁之士天下直道未得公行臣闻圣人大德在能听谏古典所说盖不足陈臣伏见太宗文武圣皇德冠三王名高五帝实由能容魏徵愚直获尽忠诚国史书之明若日月直言之路啓从谏之道开贞观已来此实为美今神皇坐明堂布大政神功圣业能事备矣夫骨鯁之士能美圣功伏惟神皇广延直臣旌赏谏士使大圣之德引纳日新书之金板万代有述非神皇卓荦仁圣臣不可献此言也

劝赏科

臣闻劳臣不赏不可劝功死士不赏不可励勇当今或有勤劳之臣死难之卒策功委命颁赏未蒙优异臣伏惟人臣徇节在爵与名死节勤公名爵不及偷荣尸禄宠秩或加故不可以进贤显能旌功励行伏愿神皇广求此色【本传作表显徇节】劝励百寮以及将士此最当今圣政之所宜先也古人云赏一人而千万人悦者盖言其功当也夫赏而不知贤者不务也伏愿神皇陛下特垂省察

请息兵科

臣伏以当今国家事最大者在兵甲岁兴赋役不省神皇欲安人思化理不可得何者兵之所聚必有所资千里运粮万里应敌十万兵在境则百万家不得安业以此徭役人何敢安臣伏见国家自有事北狄于今十有余年兵甲岁兴竟不闻其利岂中国无制胜之策朝廷无奇画之臣哉臣窃谓不然是未计之庙筭尔臣伏惟神皇圣武天威若神突厥小丑何足诛灭然今未灭者臣恐庸将无智未审庙筭之机故使兵甲日多徭役日广今国家又命将出师臣愿神皇审图庙筭量其损益计其利害若事必不可请兵不虚行兵不虚行赋役自省以此安人得贤可理若失之於此而救之於彼臣恐人日以疲劳不得安息伏愿熟察臣言审图妙筭则戎狄不足灭中国可永寧

安宗子科

臣伏惟陛下以至仁为政以至公应物天下士庶莫不咸知虺贞等干纪乱常自取屠灭陛下唯罪其构逆者更无他坐宗室子弟获以安寧自非陛下恩念慈仁敦睦九族岂得宗室蒙此寧庆实大圣之德崇重宗枝然臣更愿陛下务安慰之惠以恩信使其显然明知陛下慈念之至上感圣德下得自安臣闻人情不能自明则心疑虑疑虑则必不安不安则必危惧危惧积

则???过生伏愿陛下明恩赐垂恺悌之德使天下居无过之地万姓知陛下必信任贤是天下有庆然贤人之业皆务直道於奸邪不利奸邪不利必有谗譖此贤人之灾厄如是也一人之行十人谤之未有不遭祸患者自古忠良贤達罹此患者不可胜言

臣子昂言臣本草茅微陋才无可取陛下乃越次假以恩光将同近臣延问政要臣实愚昧何堪此宠顿首死罪然臣之诚直实自愚衷与君子言犹且不妄况天子之问敢不悉蝼蚁之诚真实罄尽然臣所奏前件状者固是陛下所悉见知然臣复重言者贵以微诚披露肝胆不知忌讳实战战惶惶

上蜀川安危事【三条】

臣伏见四月三十日勅废同昌军蜀川百姓每见免五十万丁运粮实大苏息然松茂等州诸羌首领二十年来利得此军财帛粮饷以富已润屋今一旦停废失其大利必是勾引生羌诈作警问以恐动茂翼等州复使国家徵兵镇守若松茂等州无好都督则此诈必行旦夕警问必有发者一发已後警动蜀州朝廷不知徵兵赴救兵至贼散靡弊更甚伏乞选择茂州都督严加斥堠乃命御史一人专在按察若有诈妄即録奏称加法以惩其奸庶可久长安帖不然受其弊

蜀中运粮既停百姓更无重役至於租庸合富府库今诸州逃走户有三万余在蓬渠果合遂等州山林之中不属州县土豪大族阿隐相容徵敛驱役皆入国用其中游手惰业亡命之徒结为光火大贼依凭林险巢穴其中若以甲兵捕之则鸟散山谷如州县怠慢则刼杀公行比来访闻有人说逃在其中者攻城刼县徒衆日多诚可特降严加勅令州县长官与使人设法大招此户则刼贼徒党自然除殄其三万户租赋即可富国若纵而不括以养贼徒蜀州大弊必是未息天恩允此请乞作条例括法

蜀中诸州百姓所以逃亡者实缘官人贪暴不奉国法典吏游客因此侵渔剥夺既深人不堪命百姓失业因即逃亡凶险之徒聚为刼贼今国家若不清官人虽杀获贼终无益天恩前使右丞宋爽按察蜀州者乞早发遣除屏贪残则公私俱寧国用可富若官人未清刼贼之徒必是未息以前劔南蠹弊如斯即日圣恩停军息役若官人清正刼贼剪除百姓安寧实堪富国惟乞早降使按察谨状圣历元年五月十四日通直郎行右拾遗陈子昂状

上蜀中军事【一条】

臣伏见劔南诸州缘通轨军屯在松潘等州千里运粮百姓困弊臣不自恤窃为国家惜之伏以国家富有巴蜀是天府之藏自陇右及河西诸州军国所资邮驿所给商旅莫不皆取於蜀又京都府库岁月珍贡尚在其外此诚蜀国之珍府今边郡主将乃通轨一军徭役弊之使百姓贫穷国用不贍河西陇右资给亦减臣伏惟松潘诸军自屯镇已来於今相继百十余年竟未闻盗贼大侵而有尺寸之效今国家甘心竭力以事之臣不知其故伏惟念惜臣闻上有圣君下得直言贱臣敢越次冒昧以奏臣在蜀时见相传云闻松潘等州屯军数不逾万计粮给

饷年则不过七万余硕可盈足边郡主将不审支度乃每岁向役十六万夫夫担粮轮送一?之米价钱四百使百姓老弱未得其所比年以来多以逃亡臣伏以吐蕃陛下未忍即灭松潘屯兵未可废散若准此赋敛每年以十六万夫运粮臣恐更三年吐蕃未殄灭劔南百姓不堪此役愚臣恐非圣母神皇制敌安人富国强兵之神筭者也愚臣窃见蜀中耆老平议劔南诸州比来以夫运粮者且一切并停请为九等税钱以市骡马差州县富户各为屯主税钱者以充脚价各次第四番运辇不用一年夫运之费可得数年军食盈足比於常运减省二十余倍蜀川百姓永得休息通轨军人保安边镇京台府库河西军马得利供输其资臣伏审计便宜体大非一二状俱尽陛下若以此奏非虚或可采者请勒臣付所司对议得失然後具条目一一奏闻若臣苟为谬妄无益国家请罪死不赦

上益国事【一条】

臣闻古者富国强兵未尝不用山泽之利臣伏见西戎未灭兵镇用广内少资储外勤转饷山泽之利伏而未通臣愚不识大体伏见劔南诸山多有铜鑛采之铸钱可以富国今诸山皆闭官无采铜军国资用惟敛下人乃使公府虚竭私室贫弊而天地珍藏委废不用以臣所见请依旧式尽令劔南诸州准前采铜於益府铸钱其松潘诸军所须用度皆取以资给用有余者然後使缘江诸州递运散纳荆衡沔鄂诸州每岁便以和籴令漕运委神都大仓此皆顺流乘便无所劳扰外得以事西山诸军内得以实中都仓廩蜀之百姓免於赋敛军国大利公私所切要者非神皇大圣谁能用之管仲云圣人用无穷之府盖言此也

臣某言臣伏见神皇陛下恭己受图遐想至理将欲制御戎狄永安黎元不欲烦挠蒸人故为无益贱臣朝不坐宴不预军国大事非臣合言伏见松潘军粮费过甚太平百姓未得安居臣忝班一命庶几仁类不敢自见避讳忍之不言所以不惧身诛区区上奏冒越非次伏待显戮惶栗死罪死罪

上军国机要事【一条】

臣窃闻宗怀昌等军失律者乃彼逆贼诈造官军文牒诬召怀昌等颺愚无备陷没今诸军败失东蕃固知然恐安东阻隔未审此诈国家若无私契与安东往来臣恐凶贼多端诈伪复设万一被其矫命更失其图乃是资长贼权没?府城此固宜天恩已应先有处分然臣愚见不敢不言又贼初胜不即西侵者深恐围畧安东以自全计若安东被围畧则辽东以来非国所制伏乞天恩早为图之臣闻天子义兵不可以怒发怒则衆惧急则人摇人摇则贼得其势故昔者圣人守静以制乱持重以伏奸大义常存人无忧惧臣伏见恩制免天下罪人及募诸色奴充兵讨击者是捷急之计非天子之兵且比来刑狱久清罪人全少奴多怯弱非惯征行纵其募集未足可用况当今天下忠臣勇士万分未用其一契丹小孽假命待诛何劳免罪赎奴损国大义且陛下富有四海一战未胜遂即免罪募奴若更有他虞复何徵发臣恐此不可威示天下臣闻圣人制事必理未萌所以奸不敢谋贼不得起臣闻吐蕃近日将兵围瓜州数日即退或云此贼通使默啜恐瓜州止遏故以此兵送之臣虽未信然惟国家比来勅敌在此两蕃至於契丹小丑未足以比类今国家为契丹大发河东道及六胡州绥延丹隰等州稽胡精

兵悉赴营州而缘塞空虚灵夏独立今水生河合草秋马肥秦中北据陇右亦关东隣党凶羯奸谋觐知此隙驱其丑类大盗秦关陇右马羣是国所宝防备远策良宜预图不可竭塞上之兵使凶寇得计伏愿详审臣闻所养非所用所用非所养理家必弊在国必危故明君不畜无用之臣慈父不畜无益之子今朝廷三品五品受国宠荣天恩赏赐府库虚耗食人之禄死人之事恩养圣朝甚矣厚矣及边有小贼则云无人驱使又劳圣恩远访外人外人先无宠禄临难又不肯殉节然则国之所养者总无用之臣朝之所遗者乃有用之士今不收有用厚养无用欲令忠贤効力凶贼灭亡以臣愚见理不可得近者辽军张立遇等丧律实由内外不同心宰相或卖国树恩近臣或附势私谒禄重者以拱默为智任权者以倾巧为贤羣居雷同以殉私为能媚妻保子以奉国为愚陛下又寛刑漏网【一作纲】不循名实遂令纲纪日废姦宄滋多今国家第一要者在稍寛兵期山南淮南去幽州四千里所司使十月上旬到计日行百里四十日方到即今水雨如此又徵符到彼未久当日便发犹不及期况未便发且日行不可百里若违限者死国有常刑到不及期惧罪逃散为贼此更生一患纵倍程趣期亦恐不及若违不诛则军不可统若违必诛则全衆皆怨况兵疲不堪用吴广陈胜为盗由此切急切急即日江南淮南诸州租船数千艘已至巩洛计有百余万斛所司便勒往幽州纳充军粮其船夫多是客户游手堕业无赖杂色人发家来时唯作入都资料今已到京又勒往幽州幽州去此二千余里还又二千余里方寒冰冻一无资粮国家更无优恤但切勒赴限比闻丁夫皆甚愁叹又诸州行纲承前多僦向【一作勾】至都采纳今傥有此类向沧瀛采纳则山东米必二百已上百姓必骚动今国家不优恤又无识事明了人检点勾当知租米见在虚实又未宣恩旨慰劳兵夫惟切勒赴限傥在道逃亡此粮有万一非意损失则东军二十万衆坐自取败为贼所图切急切急杨玄感以此为乱实军国大命山东百姓国家比以供军矜不点募近闻东军失利山东人骄慢乃谓国家怕其粗豪不敢徵发今街谈巷议多有苟且之心伺国瑕隙颇摇风俗国家大政须人无二心若纵怀二奸乱必渐臣伏思即日山东愚人有亡命不事产业者有游侠聚盗者有姦豪强宗者有交通州县造罪过者如此等色皆是奸雄国家又不以法制役之臣恐无赖子弟暴横日广上不为国法所制下不为州县所羁又不从军又不守业坐观成败养其姦心在於国家甚非长计以臣愚见望降墨勅使臣与州县相知子细采访有粗豪游侠亡命姦盗失业浮浪富族强宗者并稍优与赐物悉募从军仍宣恩旨慰劳以礼发遣若如此则山东淳人安於太山一者以慴姦豪异心二者得精兵讨贼不须免奴稽胡等又身既在军则父兄子弟自不敢为过昔汉祖征山东使萧何镇关中汉军数败萧何每发关中子弟以助汉军三秦无盗乱之患汉军有强雄之势盖以此道是也夫乱羣败衆者惟在奸雄奸雄既羈乱弊自息伏乞圣慈早图之诗云无纵诡随式遏寇虐紫袍绯袍绿袍金带牙笏告身金银器物等即日军衆已集入贼有期臣欲募死士三万人长驱贼庭一战扫定军中未有高爵重赏无以励勇使贪伏望天恩赐给前件袍带告身器物二千事庶以劝励士衆未敢虚用比来将军不明赏罚所以兵不齐心今聚十五万衆戈甲粮饷日费万金不早克定恐所费弥广山东百姓贫弊不可再役特乞天恩允臣所请

上军国利害事【三条】

出使

臣伏见陛下忧劳天下百姓恐不得所又发明诏将降九道大使巡察天下诸州兼申黜陟以求人瘼甚大惠也天下百姓幸甚臣窃以为美矣未尽善也何以言之陛下所以降明使岂非欲令天下黎元衆庶知陛下夙兴夜寐忧勤念之邪欲天下贤良忠孝知陛下夙兴夜寐思任用之邪欲使天下奸人暴吏亦知陛下夙兴夜寐务欲除之邪陛下圣意必若以此而发使乎则臣愚昧见陛下之使有未尽善也若愚臣所谓使者皆先当雅合时望为衆人所推仁爱足以存恤孤惇贤明足以进拔幽滞刚直足以不避强御明智足以照察奸非然後使天下奸人畏其明而不敢为恶也天下强御惮其直不敢为过也天下英奇慕其德而乐为之用也天下孤寡赖其仁而欣戴其恩也夫如是然後可以论出使故輶轩未动於京师天下翕然皆已知矣今陛下使犹未出朝廷行路市井之人皆以为非任朝廷有识者亦不称之夫天子之使未出魏阙朝廷之人皆以轻之何况天下之衆哉夫欲黜陟求瘼岂可得也陛下所以有此失者在不选人亦轻此使非天下之大任故陛下遂大失至於此也宰相复以为常但奉诏而行之苟以出使为名不求任使之实故使愈出而天下愈弊使弥多而天下弥不寧其故何哉是朝廷轻其任也轻其任则不择人不择人则其使非实其使非实则黜陟不明刑罚不中朋党者进贞直者退徒使天下百姓修饰道路送往迎来无益於圣教尔臣久为百姓实委知之陛下欲令天下黎庶知陛下夙兴夜寐忧勤政化不可得也故臣以陛下大失在於此也夫欲正其末者必先端其本清其流者必先洁其源自然之符也国家兹弊亦已久矣今陛下若不重选此使贵得其人天下黎元必以为陛下尚行寻常之政不能革此弊也则贤人必不出贪吏必得志惇独必哀吟天下百姓无荷赖於陛下此使也臣不胜有愿愿陛下与宰相更妙选朝廷百官使有威重名节为衆人所推者陛下因大朝日亲御正殿集百寮公卿设礼仪以使者之礼见之於是告以出使之意殷勤儆诫无敢或???遂授以旌节而发遣之先自京师而访豺狼然後揽辔登车以清天下若如是臣必知陛下圣教不旬月之间天下家见而户习也昔尧舜氏不下席而天下理者盖黜陟幽明能折中尔今陛下方开中兴之化建万代之功天下瞻望冀见圣政此之一使是陛下为政之大端也谚曰欲知其人观其所使不可不慎也若陛下必知不可得其人则不如不出使出使烦数无益於化但劳天下之人是犹烹小鲜而数挠之尔伏惟陛下察照

牧宰

臣伏惟陛下当今所共理天下欲致太平者岂非宰相与诸州刺史县令邪陛下若重此而理天下乎臣见天下理也若陛下轻此而理天下乎臣见天下不得理也何者宰相陛下之腹心刺史县令陛下之手足未有无腹心手足而能独理者也臣窃观当今宰相已畧得其人矣独刺史县令陛下犹甚轻之未见得其人是以腹心虽安而手足犹病而天下至今所以未有大利尔臣窃惟刺史县令之职实陛下政教之首也陛下布德泽下明诏将示天下百姓必待刺史县令为陛下谨宣之故得其人则百姓家见而户闻不得其人但委弃有司而挂墙壁尔陛下欲使家兴礼让吏勗清勤不重选刺史县令将何道以致之邪愚臣窃见陛下未有舟楫而欲济河河不可济也臣比在草茅为百姓久矣刺史县令之化臣实委知国之兴衰莫不在此职也何者一州得贤明刺史以至公循良为政者则千万家赖其福若得贪暴刺史以徇私苛虐为政者千万家受其祸矣夫一州祸福且如此况天下之衆岂得胜道哉故臣以为陛下政化之首国之兴衰在此职者也臣伏见陛下忧勤政理欲安天下百姓无使疾苦然犹未以刺

史县令为念何可得哉臣何知陛下未以刺史县令为念窃见吏部选人补一县令如补一县尉尔但以资次考第从官游历即补之不论贤良德行可以化人而拔擢见用者纵吏部侍郎时有知此弊而欲超越用人则天下小人嚣然相谤矣所以然者习於常而有惊怪也所以天下庸流莫不能得为县令庸流一杂贤不肖莫分但以县令庸流资次为选不以才能任职所以天下凌迟百姓无由知陛下圣德勤劳夙夜之念但以愁怨以为天子之令遣如此也自有国来此弊最深而未能除也岂不甚【甚下一有可惜二字】哉昔汉宣帝有言曰朕之所共理天下者岂非良二千石乎故宣帝之时能委任矣伏愿陛下与宰相深知妙选以救正此弊使天下之人稍得以安臣有计然甚鄙近未能着於书愿陛下兴念与明宰相图之以安天下幸甚幸甚

人机

臣闻天下有危机祸福因之而生机静则有福机动则有祸天下百姓是也夫百姓安则乐其生不安则轻其死轻其死则无所不至也故曰人不可使穷穷之则奸宄生人不可数动动之则灾变起奸宄不息灾变日兴叛逆乘衅天下乱矣当今天下百姓虽未穷困军旅之弊不得安者向五六年矣夫妻不得相保父子不得相养自剑以南爰至河陇秦凉之间山东则有青徐曹汴河北则有沧瀛恒赵莫不或被饥荒或遭水旱兵役转输疾疫死亡流离分散十至四五可谓不安矣幸得陛下以仁圣之恩悯其失业所在边境有兵战之役一切且停遂使穷困之人尚得与妻子相见父兄相保各复其业获以救穷人心稍安殆半年矣天下可谓幸甚愚臣窃贺陛下得天下之机能密静之非陛下至圣大明不能如此也愚臣今所以为陛下更论天下之危机者恐将相有贪夷狄之利又说陛下以广地强武为威谋动甲兵以事边塞陛下或未知天下有危机万一听之臣惧机失祸构则天下有无可奈何也诗不云乎人亦劳止汔可小康惠此中国以绥四方故臣愿陛下垂衣裳修文德去刑罚劝农桑以息天下之人务与之共安然後使遐荒蛮夷自知中国有圣人重译而入贡愚臣窃以为当今天下之大计也伏惟陛下念之近者隋炀帝不知天下有危机自以为威德广大欲建万代之业动天下之衆殫万人之力兵役相仍转输不絶北讨戎狄东伐辽人於是天下百姓穷困人不堪命机动祸构遂丧天下此是不知天下有危机而信贪佞之臣冀收夷狄之利卒以灭亡者也隋氏之失可以殷鉴岂不大哉伏惟陛下察之国家所伐吐蕃有大失策中国之衆半天下受其弊然遂事不谏当复何言陛下不以臣愚刍蕘可采一赐召臣至玉陛得以口论天下幸甚臣子昂言臣本下愚未知大体今月十六日特奉恩勅赐臣纸笔遣于中书言天下利害天之降命敢不对扬而孤负圣恩万一无补死罪死罪谨率愚见封进以闻尘听玉阶伏阙累息臣子昂诚惶诚恐顿首顿首谨言

上西蕃边州安危事【三条】

臣闻圣人制事贵於未乱所以用成功光济天下大业臣伏见国家顷以北蕃九姓亡叛有诏出师讨之田扬名发金山道十姓诸兵自西边入臣闻十姓君长奉诏之日若报私讐莫不为国家克翦凶丑遂数年之内自率兵马二万余骑经途六月自食私粮诚是国家威德早申蕃戎得効忠赤今者军事已毕情愿入朝国家乃以其不奉玺书妄破回纥部落责其专擅不许

入朝便於凉州发遣各还蕃部臣愚见窃为国家危之深恐此等自兹成隙何以言之国家所以制有十姓者本为九姓大归服圣朝十姓微弱势不能动故所以委命臣妾为国忠良今者九姓叛亡北蕃丧乱君长无主莫知所归回纥金水又被残破磧北诸姓已非国家所有今欲犄角亡叛谁将边疆惟倚金山诸蕃尚【本传作共】为形势有司不察此理乃以田扬名妄破回纥之罪坐及十姓诸豪拒而遣还不许朝覲臣愚以为非善御戎狄制於未乱之长策也夫蕃戎之性人面兽心亲之则顺疑之则乱盖易动难安古所莫制也今阻其善意逆其欢心古人所谓放虎遗患不可不察自臣昨於甘州日见金山军首领拟入朝者自蕃中至已负其功见燕军汉兵不多颇有骄色察其志意所望殊高与其言宴又词多不顺今更不许入朝谒疑以罪与回纥部落复为大讐此则内无国家亲信之恩外有回纥报讐之患怀不自安鸟骇狼顾亡叛沙漠则河西诸蕃恐非国家所有且夷狄相攻中国之福今回纥已破既往难追十姓无罪不宜自絶今若妄破回纥有司止罪扬名在於蕃情足以为慰十姓首领国家理合羁縻许其入朝实为得计今北蕃既失虏不自安庙胜之策良恐未尔事既机速伏乞早为图之

臣伏见今年五月勅以同城权置安北府此地逼磧南口是制匈奴要冲国家守边实得上策臣在府日窃见磧北归降突厥已有五千余帐後之来者道路相望又甘州先有降户四十余帐奉勅亦令同城安置磧北丧乱先被饥荒涂炭之余无所依仰国家开安北府招纳归降诚是圣恩洪流覆育戎狄然臣窃见突厥者莫非伤残羸饿并无人色有羊马者百无一二然其所以携幼扶老远来归降实将以国家绥怀必有赈赡冀望恩覆获以安存故其来者日以益衆然同城先无储蓄虽有降附皆未复矜蕃落嗷嗷不免饥饿所以时有刼掠自相屠戮君长既不能相制以此盗亦稍多甘州顷者抄窃尤甚今安北府见有官羊及牛六千头口兵粮粟麦万有余硕安北初置庶事草创孤城兵少未定威怀国家不贍恤来降之徒空委此府安抚臣恐降者日衆盗者日多戎情桀黠必为祸乱夫人情莫不以乘生为急今不以此粟麦不以此羊牛大为其饵而不救其死人无生路安得不为羣盗乎羣盗一兴则安北府城必无全理府城一坏则甘凉已北恐非国家所有後为边患祸未可量是乃国家故诱其为乱便其为贼非谓绥怀经远之长策也且磧北诸蕃今见大乱乱而思理生人大情国家既开绥抚之恩广置安北之府将理其乱者以慰喻诸蕃取乱存亡可谓圣图弘远矣然时则为得事则未行何者国家来不能怀去不能制空竭国用为患於边取乱之策有失於此况夷狄代有其雄与中国抗行自古所病倘令今有勃起遂雄於边招集遗散收强抚弱臣恐丧乱之衆必有景从此亦国家之大机不可轻而失也机事不密则必害成圣人之至诚今北蕃未定降者未安国家不早为良图恐坐而生变乞得命奏指陈其利害边境幸甚幸甚

臣窃见河西诸州地居边远左右寇贼并当军兴顷年已来师旅未静百姓辛苦殆不堪役公私储蓄足可忧嗟顷至凉州问其仓贮惟有六万余石以支兵防才周今岁虽云屯田收者犹在此外畧问其数得亦不多今国家欲制河西定戎寇此用不足未可速图又至甘州责其粮数称见在所贮积者四十余万石今年屯收犹不入计臣观其冲要视其山川信是河西扼喉之地今北当九姓南逼吐蕃二虏奸回凶猾未测朝夕警问颇有窥觐甘州地广粮多左右受敌其所管户不满三千堪胜兵者不足百数屯田广远仓蓄狼籍一贼为盗恐成大忧凉府虽曰雄藩其实已甚虚竭夷狄有变不堪军兴以河西诸州又自守不足今瓜肃镇防御仰食甘州一句不给便至饥馁然则河西之命今并悬於甘州矣此机一失深足忧危又得甘州状称

今年屯收用为善熟为兵防数少百姓不多屯田广远收获难遍时节既过遂有凋困所以三分收不过二人力又少未入仓储纵已收刈尚多在野臣伏惟吐蕃桀黠之情自为边寇未尝败衄顷缘其国有乱君臣不和又遭天灾戎马未盛所以数求和好寢息边兵其实本畏国家乘其此弊故卑辞诈伪苟免天诛今又闻其赞普已擅国权上下和好兵久不出其意难量比者国家所以制其不得东侵实由甘凉素有蓄积士马强盛以扼其喉故其力屈势不能动今则不然甘州仓粮积以万计兵防镇守不足威边若使此虏探知潜怀逆意纵兵大入以寇甘凉虽未能刼掠土人围守城邑但烧甘州蓄积蹂践诸屯臣必知河西诸州国家难可复守也此机不可一失一失之後虽贤圣之智亦无奈何臣愚不习边事窃谓甘州宜便加兵内得营农外得防盗甘州委积必当更倍何以言之甘州诸屯皆因水利浊河溉灌良沃不待天时四十余屯并为奥壤故每收获常不减二十万但以人功不备犹有荒芜今若加兵务穷地利岁三十万不为难得国家若以此计为便遂即行之臣以河西不出数年之间百万之兵食无不足而致仓廩既实边境又强则天兵所临何求不得管仲云圣人用无穷之府积不涸之仓似非虚言也

陈拾遗集卷八

卷九

钦定四库全书

陈拾遗集卷九

唐 陈子昂 撰

书

谏灵驾入京书

梓州射洪县草莽臣陈子昂谨顿首冒死献书阙下臣闻明王不恶切直之言以纳忠烈士不憚死亡之诛以极谏故有非常之策者必待非常之时有非常之时者必待非常之主然後危言正色抗议直辞赴汤镬而不回至诛夷而无悔岂徒欲诡世夸俗厌生乐死者哉实以为杀身之害小存国之利大故审计定议而甘心焉况乎得非常之时遇非常之主言必获用死亦何惊千载之迹将不朽於今日矣伏惟大行皇帝之遗天下弃群臣万国震惊百姓屠裂陛下以循齐之圣承宗庙之重天下之望喁喁如也莫不冀蒙圣化获保余年太平之主将复在於今日矣况皇太后又以文母之贤协轩宫之耀军国大事遗诏决之唐虞之际於斯盛矣臣伏见诏书梓宫将迁坐京师銮舆亦欲陪幸计非上策智者失图庙堂未闻骨鲠之谋朝廷多有顺从之议愚臣窃惑以为过矣伏自思之生灵日沐皇风摩顶至踵莫非亭育不能历丹凤抵濯龙北面玉阶东望金屋抗音而正谏者圣王之罪人也所以不顾万死乞献一言愿蒙听览甘就鼎镬伏惟陛下察之臣闻秦据咸阳之时汉都长安之日山河为固天下服矣然犹北假大宛之利南资巴蜀之饶自渭入河转关东之粟踰沙絶漠致山西之宝然後削平天下弹压诸侯长轡【本传作羈】利策横制宇宙今则不然燕代迫匈奴之侵巴陇婴吐蕃之患西蜀疲老千里运粮北国丁男十五乘塞岁月奔命其弊不堪秦之首尾今不完矣即所余者独三辅之间尔顷遭荒馑人被荐饥自河而西无非赤地循陇以北罕逢青草莫不父兄转徙妻子流离委家丧业膏原润莽此朝廷之所备知也赖以宗庙神灵皇天悔祸去岁薄稔前秋稍登使羸饿之余得保性命天下幸甚可谓厚矣然则流人未返田野尚茆白骨纵横阡陌无主至於蓄积犹可哀伤陛下不料其难贵从先意遂欲长駟大驾按节秦京千乘万骑何方取给况山陵初制穿复未央土木工匠必资徒役今欲率疲弊之衆兴数万之兵徵发近畿鞭朴羸老凿山采石驱以就功但恐春作无时秋成絶望凋瘵遗噍再罹饥苦倘不堪其弊有一逋逃子来之颂其将何词以述此亦宗庙之大机不可不深图也况国无兼岁之储家鲜过时之蓄一旬不雨犹可深忧忽加水旱人何以济陛下不深察始终独违羣议臣恐三辅之弊不止如前日矣且天子以四海为家圣人包六合为宇历观邃古以至於今何尝不以三王为仁五帝为圣故虽周公制作夫子着明莫不祖述尧舜宪章文武为百王之鸿烈作千载之雄图然而舜死陟方葬苍梧而不返禹会羣后歿稽山而永终岂其爱蛮夷之乡而鄙中国哉实将欲示圣

人之无外也故能使坟籍以为美谈帝王以为高范况我巍巍大圣轸帝登皇日月所照莫不率俾何独秦丰之地可置山陵河洛之都不堪园寝陛下岂不察之愚臣窃为陛下惜也且景山崇丽秀冠羣峯北对嵩邙西望汝海居祝融之故地连太昊之遗墟帝王图迹纵横左右园陵之美复何加焉陛下曾未察之谓其不可愚臣鄙见良足尚矣灋洛之中天地交会北有太行之险南有宛叶之饶东压江淮食湖海之利西驰崤澠据关河之宝以聪明之主养淳粹之人天下和平恭已正南面而已陛下不思灋洛之壮观关陇之荒芜遂欲弃於太山之安履焦原之险忘神器之大宝循曾闵之小节臣愚昧以为甚也陛下何不览谏臣之策采行路之謠谘谋太后平章宰辅使苍生之望知有所安天下岂不幸甚昔者平王迁周光武都洛山陵寝庙不在东京宗社坟莹并居西土然而春秋美为始王汉书载为代祖岂其不愿孝哉何圣贤褒贬於斯滥矣实以时有不可事有必然盖欲遗小存大去祸归福圣人所以为贵也夫小不忍而乱大谋仲尼之至诚愿陛下察之若以臣愚不用朝议遂行臣恐关陇之忧未时休也臣又闻太原蓄钜万之仓洛口积天下之粟国家之宝斯为大矣今欲舍而不顾背以长驱使有识惊嗟天下失望倘鼠窃狗盗万一不图西入陕州之郊东犯武牢之镇盗敖仓一杯之粟陛下何以遏之此天下之至机不可不深惟也虽则盗未旋踵诛刑已及灭其九族焚其妻子泣辜虽恨将何及焉故曰先谋後事者逸先事後图者失然而国之利器不可以示人斯言不徒设也愿陛下念之臣西蜀野人本在林藪幸属交泰得游王国故知不在其位者不谋其政亦欲退身岩谷灭迹朝廷窃感委敬委辂不非其议图汉策於万全取鸿名於千古臣何独怯而不及之哉所以敢触龙鳞死而无恨庶万有一中或垂察焉臣子昂诚惶诚恐顿首

諫雅州讨生羌书

将仕郎守麟台正字臣陈子昂昧死上言窃闻道路云国家欲开蜀山自雅州道入讨生羌因以袭撃吐蕃执事者不审图其利害遂发凉风巴延兵以徇之臣愚以为西蜀之祸自此结矣臣闻乱生必由怨起雅州边羌自国初已来未尝一日为盗今一旦无罪受戮其怨必甚怨甚惧诛必蜂骇西山西山盗起则蜀之边邑不得不连兵备守兵久不解则蜀之祸构矣昔後汉末西京丧败盖由此诸羌此一事也且臣闻吐蕃桀黠之寇君长相信而多奸谋自敢抗天诛迺来向二十余载大战则大胜小战则小胜未尝败一队亡一矢国家往以薛仁贵郭待封为虢武之将屠十万衆於大井之川一甲不归又以李敬玄刘审礼为廊庙之宰辱十八万衆於青海之泽身为囚执是时精甲勇士势如云雷然竟不擒一戎馘一丑至今而关陇为空今乃欲以李处一为将驱顛顛之兵将袭吐蕃臣窃忧之而为此虏所笑此二事也且夫事有求利而得害者则蜀昔时不通中国秦惠王欲帝天下而并诸侯以为不兼賁不敢取蜀势未可举乃用张仪计饰美女谲金牛因间以啖蜀侯蜀侯果贪其利使五丁力士凿山通谷栈褒斜置道於秦自是险阻不关山谷不闭张仪蹶踵乘便纵兵大破之蜀侯诛賁邑灭至今蜀为中州是贪利而亡此三事也且臣闻吐蕃戎羯爱蜀之珍富欲盗之久有日矣然其势不能举者徒以山川阻絶障隘不通此其所以顿饿狼之喙而不得窃食也今国家乃撤边羌开隘道使其收奔亡之种为向导以攻边是乃借寇兵而为贼除道举全蜀以遗之此四事也臣窃观蜀为西南一都会国家之宝库天下珍货聚出其中又人富粟多顺江而下可以兼济中国今执事者乃图侥幸之利悉以委事西羌得西羌地不足以稼穡财不足以富国徒杀无辜之衆以伤陛下之仁靡费随之无益圣德又况侥幸之利未可图哉此五事也夫蜀之所宝恃险也人

之所安无役也今国家乃开其险役其人险开则便寇人役则伤财臣恐未及见羌戎而已有奸盗在其中矣往年益州长史李崇真将图此奸利传檄称吐蕃欲寇松州遂使国家盛军以待之转饷以备之未二三年巴蜀二十余州骚然大弊竟不见吐蕃之面而崇真赃钱以计钜万矣蜀人残破几不堪命此乃近事犹在人口陛下所亲知臣愚意者得非有奸臣欲图此利复以生羌为计者哉此六事也且蜀人阉孱不习兵战一敌持矛百人不敢当又山川阻旷去中夏精兵处远今国家若擊西羌掩吐蕃遂能破灭其国囚执其人使其君长系首北阙计亦可矣若不到如此臣方见蜀之边陲不守而为羌夷所横暴昔辛有见被髮而祭伊川者以为不出百年此其为戎乎臣恐不及百年而蜀为戎此七事也且国家近者废安北拔单于弃龟兹放疏勒天下翕然谓之盛德所以者何盖以陛下务在仁不在广务在养不在杀将以此息边鄙休甲兵行乎三皇五帝之事者也今又徇贪夫之议谋动兵戈将诛无罪之戎而遗全蜀之患将何以令天下乎此愚臣所不甚悟者也况当今山东饥关陇敝历岁枯旱人有流亡诚是圣人寧静思和天人之时不可动甲兵兴大役以自生乱臣又流闻西军失守北军不利边人忙动情有不安今复驱此兵投之不测臣闻自古国亡家败未尝不由黷兵今小人议夷狄之利非帝王之至德也况弊中夏哉臣闻古人善为天下者计大而不计小务德而不务刑图其安则思其危谋其利则虑其善然後能享福祿伏愿陛下熟计之

諫刑书

承务郎守右卫曹参军臣陈子昂谨顿首昧死上言臣闻昔者圣人理天下者美在太平太平之美者在於刑措臣伏见陛下务太平之理而未美太平之功贱臣顽微窃惑下列臣前蒙天恩召见恩制赐臣曰既遇非常之主何不进非常之策臣草木微品天恩降休伏刻肌骨不敢忘舍今陛下创三皇之业务三皇之理大统已集神化光明虽伏羲神农昔有天下诚未足比臣敢不竭节以効愚忠臣闻自古圣王谓之大圣者皆云尚德崇礼贵仁贱刑刑措不用谓之圣德不称严刑猛制用狱为理者也故周有天下八百余岁而惟颂成康汉有天下四百余岁而独称文景皆由几致刑措者也何者刑政之末节非太平之资臣窃考之於天天贵生成验之於人人爱生育旁稽於圣圣务胜残皆不云以刑为德者然则圣王养天下者固当上务顺天下务济人不天不人不可谓理故曰惟天为大唯尧则之又曰天地万物父母唯人万物之灵亶聪明作元后元后作民父母然则为民父母固当贵於德养不可务於刑杀臣伏惟陛下圣德至大矣应天受命有三皇之功顺天正位有三皇之业拜图巡洛有三皇之符尊名显号有三皇之策明堂神构万象宣威风雨顺时百谷昌熟可谓足为万代之规也今天下百姓抱孙弄子鼓腹以望太平之政矣陛下为天地父母固将务德以顺养之登于太和以协皇极今陛下之政虽尽善矣然太平之理犹屈於狱官何以言之太平之朝务上下乐化不宜乱臣贼子自犯天诛比者大狱增多逆徒滋广愚臣顽昧初谓皆实乃去月十五日陛下特察诏囚李珍等无罪明魏真宰有功召见高正臣又重推元万顷百寮庆悦皆贺圣明臣乃知亦有无罪之人挂於疎网者陛下务在寬典狱官务在急刑以伤陛下之仁以诬太平之政臣窃私恨之赖陛下又独决天断寬蕩羣刑死囚张楚金郭正一弓彭祖王令基等以凶恶之罪特蒙全活朽骨更肉万死再生天地人祇实用同庆何以知之臣伏见去年八月已来天苦霖雨自陛下赦李珍等罪天朗气清万品咸观宇宙同庆又某月二十一日恩勅免楚金等死初有风雨变为景云司刑官属皆所共见臣闻陰慘者刑也阳舒者德也庆云者喜气也臣伏考之洪范验

之六经圣人法天天亦助圣休咎之应必不虚来陛下法天垂仁天助陛下仁化狱吏急法则惨而陰雨陛下赦罪则舒而阳和君臣欢娱则喜而见庆云天意如此陛下岂可不承顺之夫刑者怒也可以承喜气今又陰雨臣恐过在狱官况陛下明堂之理本以崇德配天之业不以务刑今垂拱法宫且犹议杀布政衢室而未措刑贱臣顽愚尚疑未可况巍巍大圣光宅天下哉今者系狱囚徒多极法者道路之议或是或非陛下何不悉召见之自诘其罪罪真实者显示明刑罪有滥者严诛狱吏使天下咸服人知政刑以清太平之基用登仁寿之域岂非至德克明哉昔邓太后以天降旱亲决洛阳狱囚徒良史书之而以为德况陛下大圣亿万超於邓后者矣夫狱吏不可信多弄国权自古败亡圣王所诫陛下万代之业千载之名故不可使竹帛书之有亏於此也伏愿熟察以美太平之风贱臣不胜愚恳忠愤之至辄投谏匭昧死上闻【云云】

諫政理书

月日梓州射洪县草莽愚臣陈子昂谨冒死稽首再拜献书阙下臣子昂西蜀草茅贱臣也以事亲余暇得读书窃少好三皇五帝霸王之经历观丘坟旁览代史原其政理察其兴亡自伏羲神农之初至於周隋之际驰骋数千年虽未得其详而畧可知也莫不先本人情而後化之过此已往亦无神异独轩辕氏之代欲问广成子以至道之精理于天下臣虽奇之然其说未经未得信也至殷高宗亦延问傅说然才救弊未能宏远自此之後殆不足称臣每在山谷有愿朝廷常恐没代而不得见也岂知沾沐圣化未终天年幸得游京师覩皇化亲逢大圣之诏布于天下问于贤士大夫曰何道可以调元气贱臣孤陋诚未足知然臣窃观自古帝王开政之原备矣未有能深思远虑独絶古今如陛下者也故贱臣不胜区区愿竭固陋以闻见言之虽未足对扬天休然或万一有可观者敢冒昧阙廷奏书以闻伏惟皇太后陛下少加察焉臣闻之於师曰元气者天地之始万物之祖王政之大端也天地之道莫大乎陰阳万物之灵莫大乎黔首王政之贵莫大乎安人故人安则陰阳和陰阳和则天地平天地平则元气正矣是以古先帝王见人之通於天也天之应乎人也天人相感陰阳相和灾害之所以不生嘉祥之所以迭作遂则观象於天察法於地财成天地之道辅相天地之宜以左右民於是养成羣生奉顺天德故人得安其俗乐其业甘其食美其服陰阳太和元气以正天瑞降地符异风雨以时草木不落龟龙麟凤在郊藪矣洎颡顓唐虞之间不敢荒寧亦克用理故其书曰百姓昭明协和万邦黎民於变时雍乃命羲和钦若昊天历象日月星辰敬授人时和之得也至夏德衰亡殷政微丧桀纣昏暴乱于天道杀戮无罪放弃忠良遂竭天下之力殫天下之货作为瑶台起乎琼室极荒淫之乐穷耳目之玩倾宫之女至数千人奇伎淫巧以亿万计信巫鬼听谗邪遂为糟丘酒池炮烙之刑一朝牛饮者三千人龙逢不胜其忧諫而死箕子不堪其愤囚为奴是以陰阳乖天地震怒山川鬼神发见灾异疾疫大兴妖孽并作而桀纣不悔卒以灭亡和之失也逮周文武创业顺天应人诚信忠厚加于百姓德泽休泰兴乎颂声成康之时刑措三十余年天下之道始和矣幽厉之末复乱厥常苛慝暴虐诟黷天地百川沸腾山豳崩人以愁怨疾厉为作故其诗曰昊天不佣降此鞠凶昊天不惠降此大戾不先不後为虐为瘵天地生人之理复悖於兹矣呜呼岂不哀哉岂不哀哉近有隋氏亦不克终厥初隋高帝之有天下也以六合为家方将对越天人传之万代至炀帝承平自以贵为天子富有四海欲穷宇?之观极游宴之乐以为人主之急务也于是乃凿御渠决黄河自伊洛之间而属之扬州生人之力

既弊天地之藏又泄炀帝方忻然以为得计将後宫彩女数百千人遂泛龙舟游三江五湖之间当其得意也视天下如脱屣尔其後百姓骚弊灾变数兴吏人贪暴其政日乱陰阳感怒彗孛以出炀帝不悟自以为天下安於泰山方率百万之师而有事于辽当时山东父子不得相保也天厌暴政人怀乱亡故辽东之役未归而中国之难已起身死逆手宗庙以隳其故何哉逆天人之理也是以臣每察天人之际观祸乱之由迹帝王之事念先师之说昭然着明信不欺尔不意陛下以大圣之虑见天人之心将欲调元气之纲返淳和之始自非陛下合天地之德有日月之明谁能眇然远思欲求太和於元气哉此昔者伏羲氏之所以本天人而为三皇首也愚臣暗昧不胜大愿愿陛下亟为大唐建万代之策恢三圣之功传乎子孙永祚鸿业千百年间使继文之主有所守也非甚无道不失厥嗣陛下可不务之哉臣伏见天皇大帝得天地之统封于泰山功德大业与天比崇矣然尚未建明堂之宫遂朝上帝使万代鸿业今犹阙然臣愚意者岂非天皇大帝知陛下圣明必能起中兴之化留此盛德以发挥陛下哉不然何所与让而未作也今陛下欲调元气睦人伦跻俗仁寿兴风礼让舍此道也于何理哉故臣不胜区区蝼蚁之诚思愿陛下念先帝之休意恢大唐之鸿业於国南郊建立明堂使宇宙黎元荒夷貊昆虫草木天地鬼神粲然知陛下方兴三皇五帝之事与天下更始不其盛哉昔者黄帝合宫有虞总期【期一作章】唐尧衢室夏后世室羣圣之所以调元气理陰阳於此教也臣虽未学窃尝闻明堂之制也有天地之则焉有陰阳之统焉二十四气八风十二月四时五行二十八宿莫不率备故顺其时月而为政则风雨时寒暑平万物茂畅五谷登稔元气不错陰阳以和逆其时而为政也则水旱兴疾疫起虫螟为害霜雹成灾陰阳不和元气以错故昔者圣人所以为教之大业也是以臣愿陛下为大唐建万代之策者意在兹乎意在兹乎陛下若不以臣微而废其言乞以臣此章与三公九卿贤士大夫议之於庭倘事便於今道不远【一作违】古即请陛下徵天下鸿生钜儒贤良豪俊之士博通古今皇王政理之术者与之按周礼月令而建之臣必知天下庶人子来不日而成也乃正月孟春陛下乘銮輿驾苍龙载青旗佩苍玉从三公九卿贤士大夫鸿儒硕老衣冠之伦朝於青阳左个负斧扆凭玉几南面以听天下之政於是遂发大号宣布四方使各顺十二月之令无敢有逆乃命太史守典奉法司天日月星辰之行无失经纪以初为常陛下遂躬籍田亲蚕以劝天下之农桑养三老五更以教天下之孝悌明讼恤狱以息天下之淫刑除害去暴以正天下之仁寿修文尚德以止天下之干戈察孝兴廉以除天下之贪吏矜寡孤独疲羸老不能自存者賑恤之後宫美人非三妃九嫔八十一御女之数者出嫁之珠玉锦绣雕琢技巧之饰非益於理者悉弃之巫鬼淫祀诬惑【传作营惑】良人者禁杀之陛下务以至诚躬服质素以为天下先愚臣以为不出数年之间将见太平之化也天人之际既洽鬼神之望允塞然後作雅乐洁粢盛宗祀天皇於明堂以配上帝使万国各以其职来祭岂不休哉臣伏惟陛下至德明圣未有能越行此道者也故臣窃以为此化一成则人伦之道自睦刑罚之原自息兵革之事不兴还淳之途可见仁寿礼让稼穡农桑不言而自致也是以贱臣未得为陛下一二论之何者圣人之教在於可大可久者故臣欲陛下振领提纲使天下自理也然臣窃独有私恨陛下方欲兴崇大化而不知国家太学之废积岁月矣堂宇芜秽殆无人踪诗书礼乐罕闻习者陛下明诏尚未及之愚臣所以有私恨也臣闻天子立太学可以聚天下英贤为政教之首故君臣上下之礼於是兴焉揖让樽俎之师於此生焉是以天子得贤臣由此道也今则荒废委而不论而欲睦人伦兴礼让失之於本而求之於末岂可得哉况君子三年不为礼礼必坏三年不为乐乐必崩奈何天子之政而轻礼乐哉臣所以独窃有私恨者也陛下何不诏天下胄子使归太学而习业乎斯亦

国家之大务也臣愚蒙所言事未曲尽者恐烦圣览必陛下恕臣昏愚请赐他日别具奏闻

谏用刑书

将仕郎守麟台正字臣陈子昂谨顿首冒死诣阙上疏臣本蜀之匹夫官不望达陛下过意擢臣草莽之下升在麟台之合光宠自天卓若日月微臣固陋将何克负然臣闻忠臣事君有死无二怀佞不谏罪莫大焉况在明圣之朝当不讳之日方复钳口下列俛仰偷荣非臣之始愿也不胜愚惑辄奏狂昧之说伏惟陛下少加察焉臣闻古之御天下者其政有三王者化之用仁义也霸者威之任权智也强国胁之务刑罚也是以化之不足然後威之威之不变然後刑之故至於刑则非王者所贵矣况欲光宅天下追功上皇专任刑杀以为威断可谓策之失者也伏观陛下圣德聪明游心太古将制静宇宙保乂黎民发号施令出於诚谦天下苍生莫不想望圣风冀见神化道德为政将待於陛下矣且臣闻之圣人出必有驱除天人之符休命也日者东南微孽敢谋乱常陛下顺天行诛罪恶咸服岂非天意欲彰陛下神武之功哉而执事者不察天心以为人意恶其首乱倡祸法合诛屠将息奸源穷其党与遂使陛下大开诏狱重设严刑冀以惩创劝於天下逆党亲属及其交游有迹涉嫌疑辞相逮引莫不穷捕考讯枝叶蟠拏大或流血小御魑魅至有奸人荧惑乘险相诬紕告疑似冀图爵赏叫于阙下者日有数矣于时朝廷皇皇莫有自固海内倾听以相惊恐赖陛下仁慈悯斯危惧赐以恩诏许其大功已上一切勿论时人获泰谓生再造愚臣窃亦欣然贺陛下圣明得天下之机也不谓议者异见又执前图比者刑狱纷纷复起陛下不深思天意以顺休期尚以督察为理威刑为务使前者之诏不信於人愚臣昧焉窃恐非三皇五帝伐罪吊人之意也臣窃观当今天下百姓思安久矣曩属北狄侵塞西戎寇边兵革相屠向历十载关河自北转输幽燕秦蜀之西驰骛惶海当时天下疲极矣重以大兵之後屡遭凶年流离饥饿死丧畧半幸赖陛下以至圣之德抚宁兆人边境获安中国无事陰阳大顺年谷屡登天下父子始得相养矣故扬州构祸殆踰五旬而海内晏然纖尘不动岂非天下蒸庶厌凶乱哉臣以此卜之知百姓思安久矣今陛下不务玄默以救疲人而反任威刑以失其望欲察察为政肃理寰区臣愚暗昧窃有大惑且臣闻刑者政之末节也先王以禁暴整乱不得已而用之今天下幸安万物思泰陛下乃以末节之法察理平人臣愚以为非适变随时之议也顷年以来伏见诸方告密囚累百千辈大抵所告皆以扬州为名及其穷究百无一实陛下仁恕又屈法容之傍诉他事亦为推劾遂使奸恶之党决意相讐睚眦之嫌即称有密一人被讼百人满狱使者推捕冠盖如云或谓陛下爱一人而害百人天下喁喁莫知寧所臣闻自古圣人不可有外患必有内忧物理之自然也臣亦不敢以远古言之请借隋而况臣闻长老言隋之末代天下犹平炆帝不龚穷毒威武厌居皇极自总元戎以百万之师观兵辽海天下始骚然矣遂使杨玄感挟不臣之势有大盗之心欲因人谋以窃皇业乃称兵中夏将据洛阳哮阬之势倾宇宙矣然乱未踰月而首足异处何者天下之弊未有土崩蒸民之心犹望乐业炆帝不悟暗忽人机自以为元恶既诛天下无巨猾也皇极之任可以刑罚理之遂使兵部尚书樊子盖专行屠戮大穷党与海内豪士无不罹殃遂至杀人如麻血流成泽天下靡然始思为乱矣於是萧铣朱粲起於荆南李密窦建德乱於河北四海云摇遂并起而隋族亡矣岂不哀哉长老至今谈之委曲如是臣窃以此上观三代夏殷周兴亡下逮秦汉魏晋理乱莫不皆以毒刑而致败坏也夫大狱一起不能无滥何者刀笔之吏寡识大方断狱能者名在急刻文深网密则共称至公爰及人主亦谓其奉法於是利在杀人

害在平恕故狱吏相诫以杀为词非憎於人也而利在已故上以希人主之旨下以图荣身之利徇利既多则不能无滥滥及良善则淫刑逞矣夫人情莫不自爱其身陛下以此察之岂能无滥也冤人吁嗟感伤和气和气悖乱羣生疴疫水旱随之则有凶年人既失业则祸乱之心忧焉而生矣顷来亢阳愆候密云而不雨农夫释耒瞻望嗷嗷岂不由陛下之有圣德而不降泽於下人也倘旱遂过春废於蒔种今年稼穡必有损矣陛下何不敬承天意以泽恤人臣闻古者明王重慎刑罚盖惧此也书不云乎与其杀不辜寧失不经陛下奈何以堂堂之圣犹务强霸之威哉愚臣窃为陛下不取也且愚人安则乐生危则思变故事有招祸而法有起奸倘大狱未休支党日广天下疑惑相恐无辜人情之变不可不察昔汉武帝时巫蛊狱起江充行诈惑乱京师致使太子奔走兵交宫阙无辜被害者以千万数刘氏宗庙几倾覆矣赖武帝得壶关三老上书廓然感悟夷江充三族余狱不论天下以安尔臣每读汉书至此未尝不为戾太子流涕也古人云前事之不忘後事之师伏愿陛下念之臣不避汤镬之罪以蝼蚁之命轻触宸严臣非不恶死而贪生也诚恐负陛下恩遇臣不敢以微命蔽塞聪明亦非敢欲陛下顿息刑罚望在恤刑尔乞三事大夫图其可否往者不可谏来者犹可追无以臣微而忽其奏天下幸甚臣子昂诚惶诚恐死罪死罪

申宗人冤狱书

臣闻古人言为国忠臣者半死而为国谏臣者必死然而至忠之臣不避死以谏主至圣之主不恶直以废忠臣幸逢陛下至圣大明好忠爱直每正言直谏特见优容今陛下方御宝图以临阳馆崇阐玄化寧济苍生固臣精心洁意愿陛下至德与三皇比矣然臣伏见陛下有至圣之德至忠之臣犹使上下不通内外壅隔臣窃惧之恐後代或以圣朝无至忠之臣敢冒万死越职上奏伏乞天恩寬臣喘息毕尽忠言臣闻上有圣君下无枉臣昔舜去四凶尧不罪舜周公诛管蔡成王不罪周公霍光诛燕王昭帝不罪子孟何者此数公者为国讨贼为君殄讐假虽擅权犹不可罪况奉君命而执法者乎臣伏见宗人嘉言有至忠之诚徇公之节执法不挠为国殄讐顷者逆子贼臣陰构祸难潜图密计将危社稷当时逆节初露朝野震惊赖陛下神武之威天机电断得奉圣决?顺天诛不顾躯命不避强御唯法是守唯恶是讐幸能察罪明辜穷奸极党使伏法者自首情实天衢得以清泰万国得以欢寧诚是陛下神断之明抑亦尽忠之効陛下所以自监察御史擢拜为凤阁舍人者岂不以表其臣节报其竭诚使天下之人知其忠恳者也当此之时忠必见信行必见明自谓专一事君无贰也今乃遭诬罔之罪被构架之词陷见疑之辜困无验之诘幽穷诏狱吏不见明肝血赤心无所控告母年八十老病在床抱疾喘息朝不保夕今日身幽狱户死生断絶朝蒙国荣夕为孤囚臣窃痛之顷者至忠而今日受赂辜负圣主忧及慈亲诚足痛恨臣比者固知不免此祸不能度德量力贪荣昧进以讼受服谁能免尤向使辞宠让荣陈力下列雷同衆輩勤恪在公与全躯保妻子之臣恭默圣代臣固知今日未招此患何者古人云盗憎主人被诛者不能无怨顷来执法诛罪多是国之权豪父讐子怨岂可胜道亲党陰结同恶相从使肝为朝脯肉为菹醢宗族灭肝脑涂地彼凶讐也未足以快其心况蒙国宠荣位显朝列凶讐切齿怨黷何穷臣窃恐今日之辜已是讐怨者相结构矣陛下至圣明察岂不为之降照哉倘万一讐诬滥罪使凶囂者得计忠正者见辜为贼报讐岂不枉苦夫孤直者衆邪所憎至公者羣恶之所疾寡不敌衆孤不胜羣羣诬成罪圣不能救自古所有非止於今古者吴起事楚抑削庶族以尊楚君楚国既强吴起蒙戮商鞅

事秦专讨庶孽以明秦法秦国既霸商鞅极刑晁错事汉诸侯威强七国骄奢将凌宗室错削弱其势以尊汉景帝不悟惑奸臣之说遂族灭晁氏此三臣岂不尽忠愿保其君然而身死族灭为讐者快皆当代不觉而後代伤之圣主明君可不为之痛伤邪臣以嘉言虽无三子之智窃恐获罪或与之同伏惟陛下仁慈矜怜悯察其忠臣闻汉高祖谋楚与陈平四万金及其为帝不问金之出入何者立大功略小过夫有大忠者不求小过所谓圣主之至道者也陛下豁達大度至圣寬仁观于汉祖固已远矣齷齪小吏何足为陛下深责哉伏愿天恩矜愚赦罪念功补过乞将终养老母获尽余年岂非圣主之恩仁君之惠有礼有训善始善终哉臣於嘉言亲非骨肉同姓相善臣知其忠然非是丘园之贤道德之茂大雅明哲能保其身假使获罪於天身首异处盖如一蝼蚁尔亦何足可称然臣念其曾一日承恩蒙圣主驱使不以赤诚取信今乃驾罪见疑臣实痛之恐累圣主之明伤其老母之寿身污明法为後代所悲臣知其忠岂能无惜所以敢冒万死乞见矜怜臣若言非至忠苟有侥幸请受诛斩伏表惶怖魂魄飞扬

諫曹仁师出军书

臣伏见诏书发怀远军令郎将曹仁师讯勒以征匈奴臣闻古之天子方建大礼必先振兵释旅以告成功故汉孝武皇帝将封禅乃徵精卒十万北巡朔方略地而还此盖遵古先哲王之礼也今神皇陛下应天受籙将欲郊祭天地巡拜河洛建明堂朝万国斯迈古之盛礼也诚合式遵旧典耀武塞上毕境而还臣犹虑曹仁师未识典礼肆兵长驱穷极砂磧不恤士马专以务得为利不以全兵为上今朝廷百僚虽有疑者无敢言之臣诚愚昧不识忌讳曾闻事君之道所贵尽心心以为非安可不言臣料仁师到云内城发兵之日合至九月初到突利城回兵之日合至十月初胡地隆冬草枯泉涸南中士马不耐祁寒计仁师所将士马从灵州常时所发之处却回到云内城已行四千余里云南城中又先未有支度焉既疲瘦经冬无粟以臣愚算十不存二若送南中散就诸州路程益远疲瘦更极以臣愚算十不存五紫蒙之军类例相似且仁师此行计迟发速至於应会不甚精备以臣计料恐未成功脱若功未克成士马先丧尽中土求士卒又难得且自古与匈奴战非士马相资不可臣恐马既虚用致尽贼又窜远未平但虑後之谋臣悔於今事且古来絕漠多丧士马非臣臆度輒敢陈闻昔汉室以卫青出塞是时汉马三十万匹旋师之日唯余四万四十年不得事匈奴盖由此臣愿陛下考验前古取臣愚诚望与三公大臣审更详议

陈拾遗集卷九

卷十

<集部,别集类,汉至五代,陈拾遗集>

钦定四库全书

陈拾遗集卷十

唐 陈子昂 撰

书后

为建安王与辽东书

月日清边道大总管建安郡王攸宜致书於辽东州高都督蕃府贤甥某至仰知破逆贼孙万斩十有余阵并生获夷贼一千人三军庆快万里同欢都督体英伟之才抱忠义之节遂能身先士卒为国讨讎以数百之兵当二万之寇指麾电扫逆党云销非都督智勇过人威名远振谁能以少撃衆陷丑摧凶使国家无东顾之忧是都督之力也贤甥俊酷似其舅遂能与某等应机破敌効节立功此已各赏金带绯袍薄荅诚効更自録奏拟加荣官愿都督远知此意也今贼饥饿灾衅日滋天降其殃尽灭已死人厌其祸万斩方诛营州士人及城傍子弟近送密欸准待官军某令将蕃汉精兵四十万衆克取某月日百道齐驱分五万蕃汉精兵令中郎将薛讷取海路东入舟楫已具来月亦发请都督励兵秣马以待此期共登九山看殄凶寇书勋竹帛开国传家是都督建功之日也中间克期同会当更别使知闻正属有军事未能委曲初春向暖愿动静胜常所有都督官属及大首领并左右立功人等并申此问相见在近预以慰怀

为建安王答王尚书送生口书

使至所传斩首及生擒获马等具如来状仰以欣快三军共之狡寇逋诛此未擒馘师徒企踵争望先锋尚书远略英谋临机果断僭制凶丑梟首伏辜在此诸军实增募勇既壮尚书之节又美先登之功幽州士人尤以庆快破竹之势自此为阶某方擐甲负戈为尚书後列登高临阵坐观俘执此期在即预以慰怀初春犹寒愿保休胜裨将已下各慰问之【云云】

为建安王与诸将书

使至辱书仰知都督率兵马摧破凶寇远闻庆快实慰永怀非公等忠勇兼资统率多筭同心戮力殉节忘躯以克剪逋凶扬国威武在此将士闻公等殊战贼不当锋莫不西望愤勇钦美

独克甚善甚善即日契丹逆丑天降其灾尽病水肿命在旦夕营州饥饿人不聊生唯待官军即拟归顺某此训励兵马袭擎有期六军长驱此月将发恨不得与诸公等共观诸将斩馘献俘旦夕严寒愿各休胜契丹破了便望回兵平殄默啜与公等相见有日预以慰怀临使忽忽书不尽意

为建安王与安东诸军州书

日月清边道行军大总管建安郡王攸宜致书安东诸州刺史并诸将部族官属等初春犹寒公等久统兵马勤国扞边不至劳弊也某如常比贼中频有人出来异口同词皆云逆贼李尽灭已死营州饥饿人不聊生诸蕃首领百姓等唯望官军即拟归顺前後继至非止一人某先使人向营州回具得父老密状云贼势穷蹙去正月上旬有妖星落孙万斩营中其声如雷贼党离心各以猜贰天殃如此人事又然平殄凶渠正在今日大军即以二月上旬六道并入指期剋剪同立大勋请公等训励兵马共为犄角开国封侯其机在此幸各勉力以图厥功寻当更使人续往先此不具

为建安王荅王尚书书

使至辱书知初出黄龙即擒白鼠凶贼灭兆事乃先徵凡百士衆莫不喜跃鼠者坎精穿窃为盗夜游昼伏乃是其常今白日投躯素质委命贼降之象理必无疑近再有贼中信来亲离衆溃期在旦夕尚书宜训兵励士秣马严威因其凶乱之机乘取败亡之势事同破竹无待剪茅坐听凯歌预用欣慰

与韦五虚己书

命之不来也圣人犹无可奈何况於贤者哉仆尝窃不自量每以为得失在人欲揭闻见抗衡当代之士不知事有大谬异於此望者乃令人慙愧悔赧不自知大笑颠蹶怪其所以者尔虚己足下何可言耶夫道之将行也命也道之将废也命也子昂其如命何雄笔雄笔弃尔归吾东山无汨我思无乱我心从此遁矣属病不得面谈书以述言子昂白

为苏令本与岑内史啓

某启某闻子以母贵自古通方礼以亲荣在昔恒理岂非奉上之道休泰必同膝下之恩亲爱先及伏惟尊舅宠居密戚位列崇班实富贵於当今允尊荣於前代居得言之地据至要之途九族同欣皆凭於獎眄六亲咸赖仰沐於恩波莫不拂拭增其羽仪譚荐长其光价某自惟末品忝在甥徒早蒙抚育之恩不殊骨肉之爱自痛无福家祸遂纏爰在孤遗载延慈眷爰同诸子礼越常流遂得教训成人策名从宦舅又曲垂顾念恩甚庭闈渭阳之情实多荷戴猥以庸薄叨累周行自委质戎班昭名果毅经今一十三岁矣而竟未一迁仰望济流莫不皆居显位旋观时辈亦已再历荣班独某一人空嗟留滞虽命涂乖舛良或甘心然亲贵盈朝岂忘提獎所以仰瞻恩惠不弃於疎微冀降慈流有怜於孤贱伏愿舅大弘收采之眷特垂咳唾之恩矜

惓小子使得官及朋友宠以亲荣私门载昌幽冥是赖岂不幸甚岂不幸甚无任企仰之至谨奉启不宣某再拜

上薛令文章启

某启一昨恭承显命再索拙文祇奉恩荣心?若励幸甚幸甚某闻鸿钟在听不足论擊缶之音太牢斯烹安可荐藜羹之味然则文章薄伎固弃於高贤刀笔小能不容於先達岂非大人君子以为道德之薄哉某实鄙能未窥作者斐然狂简虽有劳人之歌怅尔咏怀曾无阮籍之思徒恨迹荒淫丽名陷俳优长为童子之羣无望壮夫之列岂图曲蒙荣獎躬奉德音以小人之浅才承令君之嘉惠岂不幸甚岂不幸甚伏惟君侯星云诞秀金火间成衣冠礼乐范仪朝野致明君於尧舜皇极允谐当重寄於阿衡中阶协泰非夫聪明博達体变知机如其仁如其仁方当拔俊赏奇使拾遗补阙坐开黄阁高视赤松然後与稷契夔龙比功并德岂徒萧曹魏丙屑屑区区而已哉某实细人过蒙知遇顾循微薄何敢祇承谨当毕力竭诚策駑磨钝期効忠以报德奉知己以周旋文章小能何足观者不任感荷之至

陈拾遗集卷十

附录

附录

唐书列传 宋祁撰

陈子昂字伯玉梓州射洪人其先居新城六世祖太乐当齐时兄弟竞豪杰梁武帝命为郡司马父元敬世高赀岁饥出粟万石赈乡里举明经调文林郎子昂十八未知书以富家子尚气侠弋博自如它日入乡校感悔即痛修饬文明初举进士时高宗崩将迁梓宫长安於时关中无岁子昂盛言东都胜圯可营山陵上书曰臣闻秦据咸阳汉都长安山河为固而天下服者以北假胡宛之利南资巴蜀之饶转关东之粟而收山西之宝长羁利策横制宇宙今则不然燕代逼匈奴巴陇婴吐蕃西老千里赢粮北丁十五乘塞岁月奔命秦之首尾不完所余独三辅间耳顷遭荒谨百姓荐饥薄河而右惟有赤地循陇以北不逢青草父兄转徙妻子流离赖天悔祸去年薄稔羸耗之余几不沈命然流亡未还白骨纵横阡陌无主至於蓄积尤可哀伤陛下以先帝遗意方大驾长驱按节西京千乘万骑何从仰给山陵穿复必资徒役率羸弊之衆兴数万之军调发近畿督扶稚老铲山辇石驱以就功春作无时何望有秋雕眈遗噍再罹艰苦有不堪其困则逸为盗贼揭挺叫噉可不深图哉且天子以四海为家舜葬苍梧禹葬会稽岂爱夷裔而鄙中国耶示无外也周平王汉光武都洛而山陵寝庙并在西土者实以时有不可故遗小存大去祸取福也今景山崇秀北对嵩邱右眄汝海祝融太昊之故墟在焉园陵之美复何以加且太原廩钜万之仓洛口储天下之粟乃欲舍而不顾悦鼠窃狗盗西入陕郊东犯虎牢取敖仓一杯粟陛下何与遏之武后奇其才召见金华殿子昂貌柔野少威仪而占对慷慨擢麟台正字垂拱初诏问羣臣调元气当以何道子昂因是劝后兴明堂太学即上言臣闻之於师曰元气天地之始万物之祖王政之大端也天地莫大於陰阳万物莫灵於人王政莫先於安人故人安则陰阳和陰阳和则天地平天地平则元气正先王以人之通於天也於是养成羣生顺天德使人乐其业甘其食美其服然後天瑞降地符升风雨时草木茂遂故顓頊唐虞不敢荒寧其书曰百姓昭明协和万邦黎民於变时雍廼命羲和钦若昊天历象日月星辰敬授人时和之得也夏商之衰桀纣昏暴陰阳乖行天地震怒山川神鬼发妖见灾疫大兴终以灭亡和之失也迨周文武创业诚信忠厚加于百姓故成康刑措四十余年天人方和而幽厉乱常苛慝暴虐诟黷天地川豕沸崩人用咨怨其诗曰昊天不惠降此大戾不先不後为虐为瘵顾不哀哉近隋炀帝恃四海之富凿渠决河自伊洛属之扬州疲生人之力泄天地之藏中国之难起故身死人手宗庙为墟逆元气之理也臣观祸乱之动天人之际先师之说昭然着明不可欺也陛下合天地之德日月之明眇然远思欲求太和此伏羲氏所以为三皇首也昔者天皇大帝揽元符东封太山然未建明堂享上帝使万世鸿业阙而不昭殆留此盛德以发挥陛下哉臣谓和元气睦人伦舍此则无以为也昔黄帝合宫有虞总章尧衢室夏世室皆所以调元气治陰阳也臣闻明堂有天地之制陰阳之统二十四气八风十二月四时五行二十八宿莫不率备王者政失则灾政顺则祥臣愿陛下为唐恢万世之业相国南郊建明堂与天下更始按周礼月令而成之廼月孟春乘鸾辂驾苍龙朝三公九卿大夫于青阳

左个负斧戢凭玉几听天下之政躬籍田亲蚕以劝农桑养三更五老以教孝悌明讼恤狱以息淫刑修文德以止干戈察孝廉以除贪吏後宫非妃嫔御女者出之珠玉锦绣雕琢伎巧无益者弃之巫鬼淫祀荧惑於人者禁之臣谓不数朞且见太平云又言陛下方兴大化而太学久废堂皇埃芜诗书不闻明诏尚未及之愚臣所以私恨也太学者政教之地也君臣上下之取则也俎豆揖让之所兴也天子于此得贤臣焉今委而不论虽欲睦人伦兴治纲失之本而求之末不可得也君子三年不为礼礼必坏三年不为乐乐必崩奈何为天下而轻礼乐哉愿引胄子使归太学国家之大务不可废已后召见赐笔札中书省令条上利害子昂对三事其一言九道出大使巡按天下申黜陟求民瘼臣谓计有未尽也且九道发使必欲使百姓知天子夙夜忧勤之也羣臣知考绩而任之也奸暴不逞知将除之也则莫如择仁可以恤孤明可以振滞刚不避强御智足以照奸者然後以为使故輶轩未动而天下翹然待之矣今使且未出道路之人皆已指笑欲望进贤下不肖岂可得邪宰相奉诏书有遣使之名无任使之实使愈出天下愈弊徒令百姓治道路送往迎来不见其益也臣愿陛下更选有威重风槩为衆推者因御前殿以使者之礼礼之谆谆戒敕所以出使之意乃授以节自京师及州县登拔才良求民瘼宣布上意令若家见而户晓昔尧舜不下席而化天下盖黜陟幽明能折衷者陛下知难得人则不如少出使彼烦数而无益於化是烹小鲜而数挠之矣其二言刺史县令政教之首陛下布德泽下诏书必待刺史县令谨宣而奉行之不得其人则委弃有司挂墙屋耳百姓安得知之一州得才刺史十万户赖其福得不才刺史十万户受其困国家兴衰在此臧也今吏部调县令如补一尉但计资考不求贤良有如不次用之则天下嚣然相谤矣狃于常而不变也故庸人皆任县令教化之陵迟顾不甚哉其三言天下有危机祸福因之而生机静则有福动则有祸百姓安则乐生不安则轻生者是也今军旅之弊夫妻不得安父子不相养五六年矣自劔南尽河陇山东由青徐曹汴河北举沧瀛赵郑或困水旱或顿兵疫死亡流离略尽尚赖陛下悯其失臧凡兵戍调发一切罢之使人得妻子相见父兄相保可谓能静其机也然臣恐将相有贪夷狄利以广地强武说陛下者欲动其机机动则祸构宜修文德去刑罚劝农桑以息疲民蛮夷知中国有圣王必累译至矣于时吐蕃九姓叛诏田扬名发金山道十姓兵讨之十姓君长以三万骑战有功遂请入朝后责其尝不奉命擅破回纥不听子昂上疏曰国家能制十姓者繇九姓强大臣服中国故势微弱委命下吏今九姓叛亡北蕃丧乱君长无主回纥残破磧北诸姓已非国有欲犄角亡叛唯金山诸蕃共为形势有司乃以扬名擅破回纥归十姓之罪拒而遣还不使入朝恐非羁戎之长策也夫戎有鸟兽心亲之则顺疑之则乱今阻其善意则十姓内无国家亲信之恩外有回纥报讐之患怀不自安鸟骇狼顾则河西诸蕃自此拒命矣且夷狄相攻中国之福今回纥已破既无可言十姓非罪又不当絶罪止扬名足以慰其酋领矣近诏同城权置安北府其地当磧南口制匈奴之冲常为剧镇臣顷闻磧北突厥之归者已千余帐来者未止甘州降户四千帐亦置同城今磧北丧乱荒馑之余无所存仰陛下开府招纳诚覆全戎狄之仁也然同城本无储峙而降附蕃落不免寒饥更相劫掠今安北有官牛羊六千粟麦万斛城孤兵少降者日衆不加救恤盗刼日多夫人情以求生为急今有粟麦牛羊为之饵而不救其死安得不为盗乎盗兴则安北不全甘凉以往蹻以待陷後为边患祸未可量是则诱使乱海之盗也且夷狄代有雄杰与中国抗有如勃起招合遗散衆将繁兴此国家大机不可失也又谓河西诸州军兴以来公私储蓄尤可嗟痛凉州岁食六万斛屯田所收不能偿垦陛下欲制河西定乱戎此州空虚未可动也甘州所积四十万斛观其山川诚河西咽喉地北当九姓南逼吐蕃奸回不测伺我边罅故甘州地广粟多左右受敌门户

止三千胜兵者少屯田广夷仓庾丰衍瓜肃以西皆仰其餽一旬不往士已枵饥是河西之命系于甘州矣且其四十余屯水泉良沃不待天时岁取二十万斛但人力寡乏未尽垦发异时吐蕃不敢来侵者繇甘凉土马强盛以抗其入今甘州积粟万计兵少不足以制贼若吐蕃敢大入燔蓄谷蹂诸屯则河西诸州我何以守宜益屯兵外得以防盗内得以营农取数年之收可饱七百万则天兵所临何求不得哉其後吐蕃果入寇终后世为边患最甚后方谋开蜀山由雅州道翦生羌因以袭吐蕃子昂上书以七验谏止之曰臣闻乱生必由於怨雅州羌未尝一日为盗今无罪蒙戮怨必甚怨甚则蜂骇且亡而边邑连兵守备不解蜀之祸构矣东汉丧败乱始诸羌一验也吐蕃黠狁抗天诛者二十余年前日薛仁贵郭待封以十万衆败大井川一甲不返李敬玄刘审礼举十八万衆困青海身执贼廷关陇为空今廼欲建李处一为上将驱疲兵袭不可幸之吐蕃举为贼笑二验也夫事有求利而得害者昔蜀与中国不通秦以金牛美女啖蜀侯侯使五丁力士栈褒斜凿通谷迎秦之馈秦随以兵而地入中州三验也吐蕃爱蜀富思盗之矣徒以障隧隘絶顿饿喙不得噬今撤山羌开阪险使贼得收奔亡以攻边是除道待贼举蜀以遗之四验也蜀为西南一都会国之宝府又人富粟多浮江而下可济中国今图侥幸之利以事西羌得羌地不足耕得羌财不足富是过杀无辜之衆以伤陛下之仁五验也蜀所恃有险也蜀所安无役也今开蜀险役蜀人险开则便寇人役则伤财臣恐未及见羌而奸盗在其中矣异时益州长史李崇真托言吐蕃寇松州天子为盛军师趣转饷以备之不三年巴蜀大困不见一贼而崇真奸赃已钜万今得非有奸臣图利复以生羌为资六验也蜀土阡疇不知兵一敌持矛百人不敌当若西戎不即破灭臣见蜀之边陲且不守而为羌夷所暴七验也国家近废安北拔单于弃龟兹疏勒天下以为务仁不务广务养不务杀行太古三皇事今徇贪夫之议诛无罪之羌遗全蜀患此臣所未喻方山东饥关陇敝人流亡诚陛下寧静思和天人之时安可动甲兵兴大役以自生乱又西军失守北屯不利边人骇情今复举輿师投不测小人徒知议夷狄之利非帝王至德也善为天下者计大而不计小务德而不务刑据安念危值利思害愿陛下审计之后复召见使论为政之要适时不便者毋援上古角空言子昂乃奏八科一措刑二官人三知贤四去疑五招谏六劝赏七息兵八安宗子其大樞谓今百度已备但刑急网密非为政之要凡大人初制天下必有凶乱叛逆之人为我驱除以明天诛凶叛已灭则顺人情赦过宥罪盖刑以禁乱乱静而刑息不为承平设也太平之人乐德而恶刑刑之所加人必惨怛故圣人贵措刑也比大赦澡荡羣罪天下蒙庆咸得自新近日诏狱稍滋鈎捕支党株蔓推穷盖狱吏不识天意以抵惨刻诚宜广恺悌之道敕法慎罚省白诬冤此太平安人之务也官人惟贤政所以治也然君子小人各尚其类若陛下好贤而不任任而不能信信而不能终终而不赏虽有贤人终不肯至又不肯劝反是则天下之贤集矣议者乃云贤不可知人不易识臣以为固易知固易识夫尚德行者无凶险务公正者无邪朋廉者憎贪信者疾伪智不为愚者谋勇不为怯者死犹鸾隼不接翼薰蕕不共器其理自然何者以德并凶势不相入以正攻佞势不相利以廉劝贪势不相售以信质伪势不相和智者尚谋愚者所不听勇者殉死怯者所不从此趣向之反也贤人未尝不思効用顾无其类则难进是以湮汨于时诚能信任俊良知左右有灼然贤行者赐之尊爵厚禄使以类相举则天下之理得矣陛下知得贤须任今未能者盖以常信任者不效如裴炎刘禕之周思茂蹇味道固蒙用矣皆孤恩前死以是陛下疑於信贤臣固不然昔人有以噎得病乃欲絶食不知食絶而身殒贤人於国犹食在人人不可以一噎而止餐国不可以谬一贤而远正士此神鉴所知也圣人大德在能纳谏太宗德参三王而能容魏徵之直今诚有敢谏骨鲠之臣陛下广延顺纳以新

盛德则万世有述臣闻劳臣不赏不可劝功死士不赏不可劝勇今或勤劳死难名爵不及偷荣尸禄宠秩妄加非所以表庸励行者也愿表显殉节励勉百僚古之赏一人千万人悦者盖云当也今事之最大者患兵甲岁兴赋役不省兴师十万则百万之家不得安业自有事北狄于今十年不闻中国之胜以庸将御冗兵徭役日广兵甲日敝愿审量损益计利害势有不可毋虚出兵则人安矣虺贼干纪自取屠灭罪止魁逆无复缘坐宗室子弟皆得更生然臣愿陛下重晓慰之使明知天子慈仁下得自安臣闻人情不能自明则疑疑则惧惧则罪生惟赐恺悌之德使居无过之地俄迁右卫胄曹参军后既称皇帝改号周子昂上周受命颂以媚悦后虽数召见问政事论亦详切故奏闻辄罢以母丧去官服终擢右拾遗子昂多病居职不乐会武攸宜讨契丹高置幕府表子昂参谋次渔阳前军败举军震恐攸宜轻易无将略子昂谏曰陛下发天下兵以属大王安危成败在此举安可忽哉今大王法制不立如小儿戏愿审智愚量勇怯度众寡以长攻短此刷耻之道也夫按军尚威严择亲信以虞不测大王提重兵精甲顿之境上朱亥窃发之变良可惧也王能听愚计分麾下万人为前驱契丹小丑指日可擒攸宜以其儒者谢不纳居数日复进计攸宜怒徙署军曹子昂知不合不复言圣历初以父老表解官归侍诏以官供养会父丧庐塚次每哀恸闻者流涕县令段简贪暴闻其富欲害子昂家人纳钱二十万缗简薄其赂捕送狱中子昂之见捕自筮卦成惊曰天命不佑吾殆死乎果死狱中年四十三子昂资?躁然轻财好施笃朋友与陆余庆王无竞房融崔泰之卢藏用赵元最厚唐兴文章承徐庾余风天下祖尚子昂始变雅正初为感遇诗三十八章王适曰是必为海内文宗乃请交子昂所论着当世以为法大历中东川节度使李叔明为立旌德碑於梓州而学堂至今犹存子光复与赵元子少微相善俱以文称光终商州刺史子易甫简甫皆位御史

赞曰子昂说武后兴明堂太学其言甚高殊可怪笑后窃威柄诛大臣宗室胁迫长君而夺之权子昂乃以王者之术勉之卒为妇人讪侮不用可谓荐圭璧於房闼以脂泽污漫之也瞽者不见泰山聋者不闻雷霆子昂之于言其聋瞽欤

陈氏别传

陈子昂字伯玉梓州射洪县人也本居颍川四世祖方庆得墨翟秘书隐於武东山子孙家焉世为豪族父元敬瑰伟倜傥年二十以豪侠闻属乡人阻饥一朝散万锺之粟而不求报於是远近归之若龟鱼之赴渊也以明经擢第受文林郎因究览坟籍居家园以求其志饵地骨链云膏四十余年嗣子子昂奇杰过人姿状岳立始以豪子驰侠使气至年十七八未知书尝从博徒入乡学慨然立志因谢絶门客专精坟典数年之间经史百家罔不该览尤善属文雅有相如子云之风骨初为诗幽人王适见而惊曰此子必为文宗矣年二十一始东入咸京游太学历抵羣公都邑靡然属目矣由是为远近所称籍甚以进士对策高第属唐高宗太帝崩于洛阳宫灵驾将西归子昂乃献书阙下时皇上以太后居摄览其书而壮之召见问状子昂貌寝寡援然言王霸大畧君臣之际甚慷慨焉上壮其言而未深知也乃勅曰梓州人陈子昂地籍英灵文称伟晔拜麟台正字时洛中传写其书市肆间巷吟讽相属乃至转相货鬻飞驰远迓秩满随常牒补右卫曹上数召问政事言多切直书奏辄罢之以继母忧解官服阙拜右拾遗子昂晚爱黄老言尤耽味易象往往精诣在职默然不乐私有挂冠之意属契丹以营州叛建安郡王攸宜亲总戎律台阁英妙皆置在军麾时勅子昂参谋帷幕军次渔阳前军王孝杰

等相次陷没三军震懼子昂进谏曰主上应天顺人百蛮向化契丹小丑敢谋乱常天意将空东北之隅以资中国也大王以元老懿亲威略迈世受律庙堂吊人问罪具精甲百万以临蓟门运海陵之仓驰陇山之马积南方之甲发西山之雄倾天下以事一隅此由举太山而压卵建瓴破竹之势也然而张玄遇王孝杰等不谨师律授首虏庭由此长寇威而殆战士夫寇威长则难以争锋战士殆则无以制变今败军之後天下侧耳草野倾听国政今大王冲谦退让法制不申每事同前何以统衆前如儿戏後如儿戏岂徒为贼所轻亦生天下奸雄之心圣人威制六合故用声尔非能家至户到然後可服况兵贵先声今发半天下兵以属王安危成败在百日之内何可轻以为寻常大王若听愚计即可行若不听必无功矣须期成功报国可欲送身误国耶伏乞审听请尽至忠之言凡事须先比量智愚衆寡勇怯强弱部校将帅之势然後可合战求利以长攻短今皆同前不量力又不简练暗驱乌合败後怯兵欲讨贼何由取胜仆一愚夫犹言不可况奸贼胜气十倍未可当也且统衆御奸须有法制亲信若单独一身则朱亥金鎚有窃发之势不可不畏人有负琬琰之宝行於途必被刼贼何者为宝重人爱之今大王位衆人上总半天下兵岂直琬琰而已天下利器不可一失失即後有圣智之力难为功也故愿大王於此决策非小让儿戏可了若此不用忠言则至时机已失机与时一失不可再得愿大王熟察大王诚能听愚计乞分麾下万人以为前驱则王之功可立也建安方求鬪士以子昂素是书生谢而不纳子昂体弱多疾感激忠义常欲奋身以荅国士自以官在近侍又参预军谋不可见危而惜身苟容他日又进谏言甚切至建安谢絶之乃署以军曹子昂知不合因緘默下列但兼掌书记而已因登蓟北楼感昔乐生燕昭之事赋诗数首乃泫然流涕歌曰前不见古人後不见来者念天地之悠悠独怆然而涕下时人莫之知也及军罢以父老表乞罢职归侍天子优之听带官取给而归遂於射洪西山构茅宇数十间种树采药以为养恨国史芜杂乃自汉孝武之後以迄於唐为後史记纲纪粗立笔削未终丁文林府君忧其书中废子昂性至孝哀号柴毁气息不逮属本县令段简贪暴残忍闻其家有财乃附会文法将欲害之子昂惶惧使家人纳钱二十万而简意未已数輿曳就吏子昂素羸疾又哀毁杖不能起外迫苛政自度气力恐不全因命蓍自筮卦成仰而号曰天命不佑吾其死矣於是遂絶年四十三子昂有天下大名而不以矜人刚果强毅而未尝忤物好施轻财而不求报性不饮酒至於契情会理兀然而醉工为文而不好作其立言措意在王霸大略而已时人不知之也尤重交友之分意气一合虽白刃不可夺也友人赵贞固凤阁舍人陆余庆殿中侍御史王无竞亳州长史房融右史崔泰之处士太原郭袭徵道人史怀一皆笃岁寒之交与藏用游最久饱于其论故其事可得而述也其文章散落多得之於人口今所存者十卷尝着江上文论将磅礴机化而与造物者游遭家难亡之荆州仓曹槐里马拯曰拯昔从父友王适获陈君欣然忘我幼龄矣榆关之役君筹其谋戎安累年不接晤语圣历初君归寧旧山有挂冠之志予怀役南游遘兹欢甚幽林清泉醉歌弦咏周览所计倏徧岷峨予旋未几陈君将化悲夫言絶道冥杳然若丧之几延陵心许而彼已亡天丧斯文我恨何及君故人范阳卢藏用集其遗文为序传识者称其实録呜呼陈君为不亡矣遂为赞曰

岷山导江回薄万里浩瀚鸿溶东注沧海灵光氛氲上薄紫云其瑰宝所育则生异人於戏才可兼济屈而不伸行通神明困於庸尘子曰道之将丧也命矣夫大唐剑南东州节度观察处置等使户部尚书兼梓州刺史兼御史大夫鲜于公为故右拾遗陈公建旌德之碑

前監察御史趙儋撰

公諱子昂字伯玉梓州射洪縣人也其先居於潁川五世祖方慶好道得墨子五行秘書白虎七變隱於郡武東山子孫因家焉生高祖湯湯為郡主簿湯生曾祖通通早卒生祖辯為郡豪傑辯生元敬瑰偉倜儻弱冠以豪俠聞屬鄉人阻飢一朝散粟萬斛以賑貧者而不求報年二十二鄉貢明經擢第拜文林郎屬青龍末天后居攝遂山栖餌術殆十八年玄圖大象無不達嘗擬張平子風鑑比郭林宗公即文林元子也英傑過人強學冠世詩可以諷筆可以削人罕雙全我能兼有年二十四文明元年進士射策高第其年高宗崩於洛陽宮靈駕將西歸於乾陵公乃獻書闕下天后覽其書而壯之召見金華殿因言王霸大畧君臣明道拜麟台正字由是海內詞人靡然向風乃謂司馬相如揚子雲復起於岷峨之間矣秩滿補右衛曹每上疏言政事詞旨切直因而解罷稍遷右拾遺屬契丹以營州叛建安郡王武攸宜親總戎律特詔左補闕屬之迨及公參謀帷幄軍次漁陽前軍王孝杰等相次陷沒三軍震懼公乃進諫感激忠義料敵決策請分麾下萬人以為前驅奮不顧身上報於建安建安懷諫禮謝絕之但署以軍曹掌記而已公知不合因登薊北樓感昔樂生燕昭之事賦詩而流涕及軍罷以父年老表乞歸侍至數月文林卒公至性純孝遂廬墓側杖而後起柴毀滅性天下之人莫不傷嘆年四十有三葬於射洪獨坐山有詩若干入正聲集十卷着於代友人黃門侍郎范陽盧藏用為之序以為文章道喪五百年得陳君焉由是大中之詞紙貴天下矣有子二人并進士及第長曰光官至膳部郎中商州刺史仲曰斐歷河東藍田長安三尉卒官光有二子其長曰易甫監察御史次曰簡甫殿中侍御史斐生三子長曰靈甫次曰兢甫衆甫皆守緒業有名於代劍南東川節度使兼御史大夫梓州刺史鮮于公自受分阨之政也初年謀始立法二年人富知教三年魯變於道乃謂幕賓曰陳文林散粟萬斛以賑鄉人得非司城子罕貸而不書乎拾遺之文四海之內家藏一本得非臧文仲立言歿而不朽乎於戲陳君道可以濟天下而命不通於天下才可以致堯舜而運不合於堯舜悲夫昔孔文舉為鄭玄署通德門蔡伯喈為陳實立太丘頌異代思賢之意也況陳君顏閔之行管樂之材而守牧之臣久闕旌表何哉爰命不學第叙丰碑表厥後來是則是效其頌曰

有勛之後封於陳國根深苗長世載明德文林大器質匪雕刻學術鉤深風鑑詣極代公耿光喬玄藻識施不求報退身自默岷峨降靈拾遺挺生氣總三象秀發五行才同入室學匪猜精明明天后羣龍効庭矯矯長離軒飛梁益封章屢抗矢陳刑辟匪君伊順惟鱗是逆九德未行三命惟錫帝命建安遠征不服咨公幕畫騁此驥足惟王玩兵懷諫違卜忠言不納前軍欲覆遂登薊樓冀寫我忧大運茫茫天地悠悠沙麓氣冲大陰光流義士食薇人誰造周嗟乎道不可合運不可諧遂放言於感遇亦阮公之咏懷已而已而陳公之微意在斯表辭右省來歸溫清如何風樹不寧不令廬墓之側柴毀滅性管輅之才管輅之命惟國不幸非君之病我鮮于公中肅恭懿光明不融為君頌德穆如清風日月運安江漢流東不閉其文永昭文雄大曆六年歲次辛亥十月癸丑朔日建

應天廣運聖文神武明道至德仁孝皇帝陛下辟統之九載威加政和風淳俗厚冬十月詔天下牧守修前代聖帝功臣賢士陵墓之毀圯者斯以崇至仁而修闕典也化為異物者尚藻飾之縻之好爵者則亭毒之恩可見矣延謂權典是州亦奉斯命由是不俟駕而按其部至獨坐

山前过有唐故右拾遗陈公之坟嘻文集之巾尝饱其词学志气矣下马一奠能不凄然因赋
恶诗一章以吊之【畧曰魂逐东流水昼夜独坐山时同官皆邮寄工文者甚有继和】封树
茂不劳增筑而加植也故节度使鲜于公所立旌德之碑苔藓侵剥文字磨灭因徵旧本命良
工重勒于石岂祇显此公之懿行且欲副吾君褒贤之意云尔开宝戊辰岁十二月十五日推
诚保节翊戴功臣静江军节度观察留後光禄大夫检校太傅知梓州军州事兼御史大夫上
柱国太原郡开国侯食邑一千三百户郭延谓

祭陈公文

黄门侍郎卢藏用撰

子之生也珠圆流兮玉方洁子之没也太山颓兮梁木折士林阒寂兮人物疎门馆萧条兮宾
侣絶叹佳城之不返辞玉阶而长别呜呼置酒祭子子不顾沉声哭子子不回唯天道而无托
但抚心而已摧尚飨

陈拾遗集附錄